

Aningaasaqarnermut Nunamullu Namminermut Naalakkersuisoqarfik

Aningaasaqarnikkut ingerlatsineq pillugu

Nalunaarut

2013

Missingersuutinut inatsit naapertorlugu Naalakkersuisut pisussaapput Aningaasaqarnikkut ingerlatsineq pillugu nalunaarusiartik ukiumoortoq Inatsisartut upernaakkut ataatsimiinneranni saqqummiutissallugu.

Kalaallit Nunaanni Namminersorlutik Oqartussat aningaasaqarnerat kiisalu isertitat aningaasartuutillu ataatsimut isigalugit ineriarornerup misissuiffigineqarnerisa saniatigut qitiusoqarfimmi ataatsimi arlalinniluunniit aningaasaqarnerup aningaasartuutit isertitallu misissuiffigeqqissaarneqartarnissaat siunertaavoq, matumanit aningaasanut inatsimmi anguniakkat ilanngullugit eqqarsaatigalugit.

Kalaallit Nunaanni Namminersorlutik Oqartussani aningaasaqarnerup annerusumik paasissutissiissutiginissaa nalunaarusiapi siunertaraa, taamaalillunilu Namminersorlutik Oqartussani Kalaallillu Nunaat tamaat isigalugu oqallinnissamut tunngavissiissalluni.

Nalunaarummi aamma siunertaavoq immikkut ajornartorsiuteqarfiusut ineriarorfiusussallu erseqqissarneqarnissaat, inatsisillu malillugit imatut iluseqassallutik taanna aningaasaqarnikkut ineriarorneq pingaarnersiuinerlu pillugu Naalakkersuisut Inatsisartullu eqqarsaataannut ilaasinnaalluni.

Naalakkersuisut Aningaasaqarnikkut Ingerlatsineq pillugu Nalunaarutaat 2013 manna Naalakkersuisut 2014-mut aningaasanut inatsisisssamut siunnersuusiornissaannut atatillugu isigineqassaaq. Taanna august 2013-mi saqqummiunneqassaq.

Aallaqqaasiut

2013-mi Inatsisartunut kommuninilu qinersisoqarpoq. Taasinerit naatsorsorneqarmata paasinarsivoq illikartoqarnissaanik innuttaasut kissaateqartut.

Naalakkersuisut nutaat nunatsinni oqimaaqatigiinnerusumik ilaatigut suliniarput, ilinniartitaanerup qaffassisusia nalinginnaasumik qaffassarlugu, suliffissaaleqinerup akiorniarneqarnera isiginiarlugu, qanga inuussutissarsiutit aamma inuussutissarsiutit nutaat ineriartortillugit, aatsitassat pillugit naalakkersuinikkut ingerlatsineq allanngortillugu, tassunga ilanngullugit aatsitassanit atortussiani tunisassiortutut akileraarutip atulersinnera aamma suliniutinik annertuunik ingerlataqartarneq pillugu inatsit iluarsillugu.



Inuiaqatigiit aningaasaqarnerannik patajaatsumik akisussaassuseqartumillu aqtsinissaq aamma ilinniartitaanermik ingerlataqarfimmi piginnaasap annertusinissaq kulakteerniarlugit aamma suliffimmik sungiusarfiit amerlanerusut kulakteerniarlugit aningaasaliissutit annertusineqarnissaannik tamanna pisariaqartitsivoq. Aammattaaq nunatta iluani aamma nunatsinnut nunatsinniillu ilaasunik usinillu pitsaasumik unammillersinnaassuseqartumillu assartuisunik umiarsualiviit mittarfiillu naleqquttumik aaqqissuunneqarneri kulakkiissallutigik.

Anguniakkat taakku angussavavut naak aningaasaqarnikkut annertuumik unamminartoqaraluartoq. Amerlavallaartut suliffeqarfifit avataaniippuit, peqatigisaanillu sulisinnaasunik amerlavallaartunik tikisitsisarluta. Taamatut pisoqarpoq ilaatigut ilinniartitaanerup qaffassisusia appasippallaarmat, aamma suliffinnik pilersitsineq naligiimmik agguarsimanngimmat. Tassunga ilanngutissaaq ukiut inuuffigineqartartut amerliartorneri aamma ukioqatigiaat arlallit ukioqqortusiartorneri naapertorlugit utoqqaat qujanartumik amerliartormata.

Tamakku tamarmik uagut Naalakkersuisuni, Inatsisartuni aamma communalbestyrelsini qinikkatut akisussaasutut pilersaarusrorluarnikkut pingaarutilinnik aalajangiisarnissatsinnik aamma inuiaqatigiit qanoq naleqqussarnissaat pillugit aalajangiisarnissatsinnik pisariaqartitsippuit. Tamanna pissaaq pingarnertigut politikkikkut anguniakkat aallaavigalugit aamma pingartitat ataatsimoorussat napatisitsut tunuliaqtalarlugit, taamaalilluta toqqisisimalluta siunissaq ornissinnaallutigu aamma nunatsinni pisuussutitigut periarfissavut iluaqutigalugit.

Isumannaatsumik ineriartornissaq pisariaqarpoq, aningaasarsiornikkut, inooqataanikkut, kulturikkut avatangiisitigullu. Tamanna pisariaqartutigut nutarterinerit aamma pingarnersiuinerit pillugit ammasumik oqaloqatigiinnissamik pisariaqartitsivoq, aamma suliat naammassiniarnerini ingerlataqarfifit assigiinngitsut suliniuteqarlutik. Namminersorlutik Oqartussat aamma kommunit akornanni suleqatigiinneq nukitorsassavarput aamma namminersortut pisortallu ingerlataqarfisa

akornanni pitsaasumik ataqatigiittoqarluni. Tamanna siumut isigisumik aalajangiisinnaanermik sulisinnaassuseqarluarnermillu pisariaqartitsivoq. Nutarterinermi suliniuitit ilaat ajornakusuussapput oqallitsitsissallutillu, tamatumali qanoq iliorsinnaajunnaartissanngilaatigut – akerlianilli oqallisiginissaannut ajunngitsumik periarfissaqassalluta.

Ajoraluartumik suliffissaaleqisut amerliartorput. Ajornartorsiuat aaqqiiffiginiarlugu suliniuteqartoqarsimavoq, ilaatigut maannakkorpiaq suliffissaaleqisunut neqerooruteqarnikkut, piginnaanngorsaalluni suliniuteqarnikkut aamma nunami maani tunisassiorneq annertusiniarlugu aalisarneq pillugu naalakkersuinikkut ingerlatsinermi naleqqussaasoqarneratigut. Illoqarfiit nunaqarfiillu ilaat allanit sakkortunerusumik eqqorneqarput, sulilu kommunit akornanni assigiinngissuseq annertusiartorluni. Nunarput oqimaaqtigiiqsumik ineriartussaaq, taamaalilluni kommunit sisamat tamarmik siuariarnermik misigisaqarlutik. Tamanna ilaatigut isumaqarpoq pisortat sanaartornikkut suliassaataat naligiinnerusumik agguarneqassasut, sanaartorniaannarneq pissutiginagu soorunami pissutsit piviusut aallaavigalugit sanaartussalluta.

Siunissami ungasinnerusumi inuiqaqtigiinni siuariartorneq aatsitassarsiornermi ineriaartornermit pingaartumik ingerlanneqassaaq. Periarfissat takkuttut atorutsigik siunissami Nunarput peqatigiilluta pilersissavarput, tassani suliffissanik pilersitsilluta aamma atugarissaarnermut ilinniartitaanermullu aningaasalersuisinnaalluta. Aatsitassarsiorneq ineriaartortissagipput isumaqanngilaq qangatut inuussutissarsiut alassagivut, tassunga ilanngullugit aalisarneq, piniartutut inuussutissarsioreq aamma nunalerinermik ingerlataqartut. Akerlianilli inuussutissanik tunissiortut inuussutissarsiorerit taakku naleqqussarlugillu ineriaartorteqqissavavut isertitaqarfiunerulersillugit, soorlu aamma takornariaqarnikkut inuussutissarsiut siunissami piorsarneqaqqissasut.

Avammut niuernermit isertitat taamaalillutik ingerlataqarfimmit ataasiinnarmit isumalluuteqassanngillat, soorlu ullumikkut pivusumik taamaattoq. Inuussutissarsiuut pingaernerit malitsigisaannik inuussutissarsiuutnik pilersitsinissaq pillugu siunnerfeqartumik sulissaagut. Assersutigalugu aatsitassarsiorneq aallartippat tamatuma malitsigisaanik inuussutissarsiuutnik tamatigoortunik annertuumik pisariaqarttsisoqalissaq. Taamaattumik sumiiffinni suliffeqarfii piareersimanissaat qulakkiissavavut, aamma ingerlatsiviit nunaqavissut atugaat naleqqulluassallutik, taamaalilluni suliffeqarfii nunanit allaneersut kisimik suliakkiutinik tigusinatik.

Ineriaartorneq inuaqatigiinni siunnerfeqartumik suliniuteqarnermik piumasaqarpoq aamma ataasiakkaanut piumasaqaateqarluni. Annertunerusumik akisussaaneq piginnaanngorsarnerlu Nunatta siunissaanut pingaaruteqarput. Patajaatsumik ataavartumillu ilinniartitaanikkut suliniuteqanngikkutta piginnaasanik piumasarineqartunik suliffissuarnut neqerooruteqarsinnaanngilagut, aamma pisortat ingerlataqarfiini atorfii pingaaruteqartut nammineq sulisinnaasutsinnik inuttalersinnaanagit. Nammineq ilinniarnitsinnut tamatta akisussaassaagut, inuaqatigiittullu sapinngisamik amerlanerpaat inuussutissarsiuutinut piginnaalersitsisumik ilinniarermik naammassisqaarnissaat qulakkiissallutigu.

Siunissami Nunarput maannakkut ajornartorsiutit aaqqiiffignerisigut pilersinneqassaaq. Taakku ilaat tassaavoq 16-19-inik ukioqartut 70 %-iisa missaat meeqqat atuarfiata kingorna inuusuttunut ilinniarfinni aallartissimannginnerat. Tamanna aningaasaqarnitsinnut aarlerinarpoq, inuussutissarsiortutsinnut aarlerinarpoq pingaartumillu inuusuttup nammineq inuuneranut aarlerinarluni. Uagut inuiaqatigiittut tunngaviusumik atuarfeqarsinnaanngilagut aamma ilinniartitaanermik piginnaasaqarsinnaanngilagut, affaat sinnerlugit ilinniarfeqarfinnut ingerlaqqinnissaminnik ajornartorsiuteqarlutik, taamaalillutillu nammineq inuunertik aalajangiiffigisinnaanagu. Ilinniartitaanermut tunngasut ukiuni aggersuni salliutitassatsinni pingarnerit ilagaat.

Meeqqat atuarfiat annertunerusumik isigniassavarput, atuartullu naammaginartumik atuartinneqarnissaannut pisariaqartunik, ataavartumik unammillernartunillu piginnaanngorsaasunik aalajangiissalluta. Nunatsinni ilinniartitsisutigut nukiit aamma paassisutissiinikkut nalunaarasuartaateqarnikkullu atortorissaarutini nutaaliani ukiuni makkunani ammaassisut periarfissat pitsaanerusumik iluaqtiginiarlugit qarasaasianik atuinissamut periarfissat siunnerfeqartumik iluaqtigalutigik. Ullumikkut taakkuninnga atuineq qujanartumik siaruariartopoq, ilaatigut aningaasaateqarfinniit aningaasaliisoqarluartoqarneratigut. Uagut Naalakkersuisuniit immikkoortup taassuma ineriartinnissaanut pimoorussilluta peqataarusuprugut aamma kommunini tamani ilinniarfeqarfinnilu tamani atuartitsinermi qarasaasiat annertunerusumik atugaaneri qulakteerniarsaralugit. Qarasaasiaqarnikkut periusissap aamma ilinniartitaaneq pillugu pilersaarutissap nutarterneqarneratigut tamanna suliniuteqarfinni salliutinnejnarnerpaajussaaq.

Aamma meeqqat ilaquaat avatangiisiisalu meeqqat atuarfiini meeqqat aallartinneraniillu ikiunnissamut tapersersuinissamullu piareersimanissaat qulakkiissavarput. Taamaattumik meeqqanut suli atualinngitsunut sammisumik pitsaliuineq nukitorsarnissaa pingarpoq. Meeqqat atualertussatut ukioqalernissaasa tungaannut isigniassaagut ilaqtariinnik katsorsaaviiit nukitorsarlugit aamma innuttaasoq qitiutillugu ataatsimut sammisumik aaqqiisassalluta. Angajoqqaatut akisussaaffik pingaaruteqartoq isumagissavarput ilaatigut ilaqtariinnut ilitsersuisutigut aamma ilaqtariinnut tamanut sammisumik katsorsaasarnikkut nutaanik suliniuteqarnikkut.

Naalakkersuisut akisussaapput kinguneqartitsillutillu. Aningaasanut inatsimmi aningaasat immikkoortinneqartut pillugit isumannaatsumik tunngaveqartumik ineriartortsineq Naalakkersuisut qulakteerniarpaat. Ineriartornerup nunatsinni alianaatsumi, angisuumi isorartuumilu tunngaveqarnissaanut tamatta akisussaassaagut.

Atuarluarina oqalliseqataalluarinalu.

Vittus Qujaukitsoq
Aningaasaqarnermut Nunamullu Namminermut Naalakkersuisoq

Imarisai

Aallaqqaasiut.....	3
1. Aningaasatigut inissisimaneq.....	8
1.1 Akit aningaasarsiornikkullu pissutsit	8
1.2 Inuiaqatigiit aningaasaqarneranni pingaarutillit.....	12
1.3 Pisortat ingerlataqarfiisa aningaasaqarnerat.....	13
1.4 Inuiaqatigiit akiitsoqalernerri	16
2. Politikkut aningaasaqarnikkullu anguniakkat.....	18
2.1. 2014-imut aningaasanut inatsit	23
2.2 Pisortat ingerlataqarfiinik iluarsartuussineq.....	25
2.2.1 Akiligassanit akilinngitsuukkatt.....	28
2.2.2 Digitalinngortitsineq aamma IKT-mi periusissaq nutaaq	30
2.2.3 Namminersorlutik Oqartussat aktiatigut ingerlatseqatigiffii	32
2.2.4 Pisiortornermk ingerlatsineq.....	34
2.3 Akileraartarneq, Soraarnerussutisiat, Ineqarnermut aamma Isumaginninnermut tunngasut ...	35
2.3.1 Soraarnerussutissiaqartarnermk iluarsartuussineq	36
2.3.2 Isumaginninnermi tunniuttakkanik iluarsartuussineq	36
2.3.3 Akileraartarnermk iluarsartuussineq	38
2.3.4 Ineqarnermut tunngasut.....	39
2.3.5 Innaallagiamut, imermut kiassarnermullu akeqartitsinernik iluarsartuussineq.....	39
2.3.6 Aaqqissuussineq.....	39
2.3.7 Iluarsartuussinerit sunniutaat	40
2.4 Sanaartorneq.....	41
2.4.1 Aningaasaliineq pillugu ilitsersuut.....	42
2.4.2 Nuummi Umiarsualivik.....	43
2.4.3 Mittarfii pingarnertigut aaqqissugaanerat	44
2.4.4 Qaqortumi Mittarfik	44
2.5 Inuussutissarsiorneq suliffeqarnerlu	45
2.5.1 Nunatsinni suliffeqarfiit aatsitassarsiorfinnut piginnaanngorsarneri	46
2.5.2 Inuussutissarsiutinik siuarsaneq pillugu inatsit	47
2.5.3 Isumalluutit uumassuseqartut.....	47
2.5.4 Nunap immikkoortuisa ineriartortinnissaannik periusissaq.....	47
2.5.5 Takornariaqarneq	48
2.5.6 Suliniuitit annertuut pillugit pilersaarutit, tassunga ilanngullugu Isuani piiaaffik.....	49
2.5.7 Ujaqqat qaqtigoortut pillugit periusissaq	51
2.5.8 Aalisarnermk inuussutissarsiu	52
2.5.9 Sulineq	53

2.6 Ilinniartitaaneq	57
2.6.1 Suli atulianngitsut	57
2.6.2 Meeqqat atuarfiat	58
2.6.3 Oqaatsit pillugit periusissaq	59
2.6.4 15-18-inik ukiullit	59
2.6.5 Inuuusuttunut ilinniarfiit	60
2.7 Meeqqat Inuuusuttullu	61
2.8 Utoqqaat	62
2.9 KNR	63
2.10 Uumasut nakorsaqarnikkut aamma nerisassat isumannaatsuunissaannut upalungaarsimanerup nukittorsarnera	64
2.11 Nuna Tamakkerlugu Peqqissutsimut Periusissap piareersarnera	66
2.12 Silap pissusaa, Nukissiorneq Avatangiisillu	68
2.12.1 Silap pissusaa pillugu isumaqatigiissut nutaaq	69
2.12.2 Nukissiorfiit aktiatigut piginneqatigiiffinngorlugit allanngortissinnaanerat	70
2.12.3 Eqqakkanik passussineq	71
2.13 Nunanut allanut naalakkersuinikkut ingerlatsineq aamma niuerneq	73

1. Aningaasatigut inissisimaneq

Aningaasaqarnikkut ineriarnermi unamminartut annertuujupput. Silap pissusaata allanngornera, inuit katitigaanermikkut ineriarnerat aamma aatsitassanik piaanermi immikkoortut siuariartfiusinnaasut annertunerusumik piumasaqaateqarput aamma periarfissanut nutaanut ammaassillutik. Nunatta ataatsimoortumik tapiissutinik isumalluuteqarunnaarnissamut ingerlanerata peqatigisaanik silap pissusaata allanngornerata kingunerisaa tassaavoq qangatut inuussutissarsiummut soorlu aalisarnermut piumasaqaatit allanngornerat. Uuliasiornermi aamma aatsitassatigut atortussianik piaanermi siuariartornissamut periarfissaqarpoq, kisiannili nunanit allanit annertuunik aningaasaliisoqarnissaanik pisariaqartitsilluni aamma nunanut allanut aammalu isumannaallisaanikkut naalakkersuinikkut ingerlatsineq pillugu oqallinnermut ammaassilluni.

Inuit katitigaanikkut ineriarnerisa kingunerisaannik innuttaasut utoqqaanerulerput. Taamaalilluni pilersuisussat ikinnerulerput pilersorneqartussallu amerlanerulerlutik. Peqatigisaanik aningaasaqarnikkut naalakkersuinikkut ingerlatsineq pillugu siunissamut ungasinnerusumut anguniakkat tassaallutik aningaasatigut aqutsinerup piffissami sivisunerusumi atasinnaassuseqarnissaa aamma inuiaqatigiit aningaasaqarneranni piviusumik siuariartornissaq. Inuiaqatigiit atugarissaarnikkut ingerlalluartut qulakkeerniarlugit aningaasarsiornermi nutarterisoqarnissaanik aamma inuiaqatigiinni aaqqissugaanikkut allannguisoqarnissaanik pisariaqartitsisoqarpoq, amerlanerusunik sulilersitsisumik aamma suliffeqarfintti namminersortuni siuariartortitsisumik.

1.1 Akit aningaasarsiornikkullu pissutsit

Nunarsuaq tamakkerlugu ajornartoorneq, nunarsuarmioqatigiinnik 2008-mi eqquisoq, anniktsuinnarmik Nunatsinni equivoq. 2009-mi ingerlatat appariaraluartut Kalaallit Nunaata tunisassiaasa 2011-mi ataatsimut nalingat 2007-imit malunnaatilimmik qaffasinneruvoq, Danmarkimi aamma Europami nunani allani arlalinni taamaattoqarnani. Siuarneq pingaartumik ujaasilluni ingerlatani aningaasaliinernit, immap naqqatigut kabeliliinermit aamma allatigut annertuunik sanaartornikkut aningaasaliinernit kiisalu patajaatsumik aalisarnermit tunngaveqarpoq. Ataatsimoortumik tapiissutit aamma EU-mit isumaqatigiissutit aamma isertitaapput aalajaatsut, isertitanik patajaatsitsisut.

Tabeli 1. Aningaasaqarnermi kisitsisit tunngaviit (2006-2013)

	2006	2007	2008	2009	2010	2011	2012	2013
BNP siuariartorneq, pct.*	5,4	3,4	2,1	-2,7	4,9	3,2	-3,3*	-2
Illoqarfinni suliffissaaleqisut, amerl.	2.387	2.199	1.783	2.008	2.408	2.791	2.980	3.000*
Aningaasat naleerukkiartornerat, pct.	2,8	1,7	9,3	0,6	2,3	2,1	4,3	2,0*
IST, mio.kr.	-40	-267	-318	-950	3	-161	-65	-114
IS, mio. kr.	65	28	-94	-515	207	49	149	1

Oqaaseqaat: Kisitsisit ulloriaasanik nalunaaqutsikkat tassaapput Aningaasaqarnermut Siunnersuisoqatigiit missingersuutaat. 2013-imi suliffissaaleqisut kiisalu 2013-imi aningaasat naleerukkiartornerat Aningaasaqarnermut Naalakkersuisoqarfip missingersorpai. Aningaasat naleerukkiartornerat ukiut marluk akornanni junimiit julimut atuisunut akit takussutissat qaffariartornerattut naatsorsorneqarput. BNP-mi siuariartornermi nunap naatsorsuutaani Naatsorsueqqissaartarfimmit kisitsisaagallartut tunngavigineqarput (2012: 1 . 3.12.2012 aaqqinnejartut). Illoqarfinni suliffissaaleqisut pillugit kisitsisit ukiumi pineqartumi qaammatini ataasiakkaani agguaqatigiissitsinerupput.

Tabel 1-imi takutinneqarpoq akin aningaasarsiornikkullu pissutsini arlalinni ineriartorneq.

Uuliamik ujaasinermut atatillugu aningaasaliinerit apparneri aamma raajartassiissutit appasinnerusut pissutigalugit Aningaasarsiornikkut siunnersuisoqatigiit 2012-imi ukiakkut naliliipput 2012-imi siuarneq killormut sammisoq, aamma 2013-imi siuarneq appasissasoq. Raajartassiissutit appariaqqinnerisa aamma aatsitassanik ujaasinerup appariarnerata kingunerisaannik 2013-imi aningaasarsiornikkut ingerlatat appariassasut maannakkut takussutissaqarpoq. 2013-imi sanaartornikkut ingerlatat appariassasut ilimagineqarpoq.

Akissarsiat annikitsumik qaffariarneri, inuussutissallu nukissiornermilu akit qaffannerinut ataqtigisiikkanni akissarsiat pisissutaasinnaasut millisippai taamaallunilu aningaasarsiornikkut ingerlatat tamarmiusut aamma. Ataatsimut isigalugu 2012-imi aamma 2013-imi killormut sammisumik aningaasarsiornikkut siuariartoqarnissaa ilimagineqarpoq.

Ukiunut aggersunut ilmagisanut apeqquaalluinnarpoq aatsitassarsiornikkut ujarlernerit aallartissanersut pingaartumillu aatsitassarsiorfinnik nutaanik pilersitsisoqassanersoq. ingerlatat taamatut ittut siuariarnermut nutaamut sulisullu amerlinerannut tunngaviliisinnaapput. Assigiinngitsunilli peqquteqartumik kingumut eqqorneqassappata aningaasarsiornikkut ingerlatani tamarmiusuni suli appariartoqaaqqissinnaavoq.

Aningaasat naleerukkiartornerat

Akinut naleqqersuut januar 2012-imiit januar 2013-imut 1,6 %-imik qaffariarpoq qaammatini aqqaneq marlunni siuliini 4,8 %-imik qaffariartoq. Akit appasissumik naleerukkiartorneri isumaqarpoq akissarsiat pisissutaasinnaasut siusinnerusutut millisinneqanngitsut.

Akinut naleqqersuut pingaartumik nunarsuaq tamakkerlugu uuliat akiisa qaffanneri pissutigalugit inissianut assartuinermullu aningaasartuutit annertusinerisa kingunerisaannik qaffakkiartorput.

Aalisarneq

Aalisakkat akii 2010 qiteqqummalli sakkortuumik qaffassimapput, taamaalillutillu aalisarnermit isertitat qaffannerinut iluaqutaasimallutik, naak raajarniarnermi pisassiissutit ikiligaluartut, tabel 2 takujuk.

Tabel 2: Aalisakkat akii 2008-2013

Akit, kiilumut kr.

1. kvt	2008	2009	2010	2011	2012	2013
Raajat qaleruallit, qerisut	11,95	11,69	9,99	17,00	13,44	16,80
Raajat, qalipallit qerisullu	28,77	26,54	26,17	29,13	32,14	34,12
Saarulliit, ilivitsut qerisut	22,90	12,53	9,96	11,56	13,64	11,70
Saarulliit, tisaat qerisut	33,75	19,96	16,12	26,87	20,79	20,07
Qalerallit, ilivitsut qerisut	19,75	19,25	19,12	25,58	19,96	21,95
Qalerallit, tisaat	27,39	28,11	33,02	24,44	18,97	17,88
Suluppaakkat, tisaat						
iluitsulluunniit (ooqangngitsut qerisulluunniit)	12,61	11,14	13,56	20,01	22,40	19,79

Paasissutissarsiffik: Naatsorsueqqissaartarfik

Raajartassiissutit appariartortut silap pissusaata allanngorneranut annertuumik takussutaapput, raajat ungasinnerusumi avannarpasinnerusumilu aalisarneqartussaallutik. Aalisarneqartut annertussusaat ukiumiit ukiumut allanngorarsinnaapput, pisassiissutili biologit inassuteqarnerinut naleqqussarneqarlutik.

Saarulleqarnera annertusiartorpoq, taamaattumillu saarullinniarnermi pisassiissutit sinerissap qanittup imartaani qaffakkiartorlutik. 2013-imni avataasiroluni aalisarnermi saarullittassiisoqarpoq. Taakku saniatigut 2013-imni avaleraasartuunik, ammassassuarnik allanillu aalisakkanik ataatsimoortunik misileraalluni aalisarnermut pisassiisoqarpoq. Misileraalluni aalisarneq aallartinneqarpoq aalisarnermik inuussutissarsiortut aamma Pinngortitaleriffik aallaavigalugit, aamma aningasaqaarnikkut uumassuseqarnikkullu killiliussani periarfissanik misissuissallutik. Aalisakkani pingarnerni nalinginnaanerusumik pisuussutinik iluanaarutinit annertunerusumik akileraarusersuinerit atulersinnissaat pillugu Naalakkersuisut suliaqarput. Sulinermi tassani naalakkersuisooqatigiinnermi isumaqatigiissut malillugu aalisakkat suliarineqarsimasut aamma suliarineqarsimanngitsut akornanni assigiinngisitaartsisoqassaaq. Aammattaaq akuersissutinik atulersitsinermi atuisut akiliuteqartarnerat atuukkunnaarsinneqarpoq, aamma raajat tulaassisussaatitaanermut ilaangngitsut pillugit akitsuutip appartinnissaa pillugu siunnersuut saqqummiunneqassalluni.


Suliffissaaleqineq

Tabel 1-imni takutinneqarpoq 2008-miit 2013-imut suliffissarsiortut nalunaarsorneqarsimasut amerlassutsimikkut annertuumik qaffariarsimasut, taannalu aalajangiisuulluni suliffissaaleqisunut tunngasutigut suliniutit malunnartumik qaffanneqassallutik. Immikkoortoq 2.5.9-mi

suliffissaaleqisut pillugit Naalakkersuisut suliniutaat misissorneqarput. Qaffariarneq annertunerpaaq 2009-miit 2010-mut aamma 2011-mut pivoq, suliffissaaleqisullu annertuseriarnerat 2011-p kingorna annikillartorsimalluni. Tabel 1-imni inuiaqtiginni siuariarnerup aamma suliffissaaleqinerup akornanni paatsuugassaanngitsumik ataqtigiiuttoqannginnera arlaata tupigusuutigisinnaavaa. Unamminartut taakku immikkoortoq 2.5.9-mi misissorneqarput, tassani suliffissaaleqisut pillugit kisitsisitigut paasissutissani unamminartut aamma itisileriffiqineqarlutik.

Takussutissiaq 1-imni takutinneqarput 2011-mi suliffissaaleqisut amerlassusaat ukiuinut aamma illoqarfinnut/nunaqarfinnut agguarlugit. 18-19-inik ukioqartut akornanni suliffissaaleqisut amerlanerpaajunarpot tamatumalu kingorna 35-39-nik ukioqartut tungaannut ikiliartorlutik. Takussutissiami aamma takutinneqarpoq ukioqatiginni tamani illoqarfinnut naleqqiullugu nunaqarfinni suliffissaaleqisut amerlanerusut.

Takussutissiaq 1: Suliffissaaleqisut sulisinnaasunit procentinngorlugit ukiuinut aamma illoqarfinnut/nunaqarfinnut agguarlugit 2011.



Paasissutissarsiffik: Naatsorsueqqissaartarfik

Suliffissaaleqisut pillugit kisitsisitigut paasissutissani 18-it inorlugit ukiullit ilanngunneqanngillat, tassa aatsaat 18-inik ukioqaleraanni pisortanit ikioriissutinik pisartagaqalertoqarsinnaammatt. Ilinniartitaaneq pillugu immikkoortoq 2.6-imit takuneqarsinnaavoq ilinniartitaanermut suliffeqarnermullu naleqqiullugu 15-18-inik ukiullit pillugit annertuumik ajornartorsiuteqartoqartoq. Taamaalilluni inuuusuttorpassuit suliffeqaratillu ilinniagaqanngillat. Ajornartorsiutit pingartumik nunaqarfinni mikinerusuni annertunerupput, taamaattumillu immikkut suliniuteqarnissaq pisariaqarluni.

1.2 Inuiqatigiit aningaasaqarneranni pingaarutillit

Silap pissusaani imaanilu avatangiisini allanngornerit maannakkut aalisarnermi inuuniarnikkut atukkanut sunniuteqarput, kisianni aamma aalisarnermut tunisisarermullu periarfissanik nutaanik pilersitsisinnaallutik. Nunarsuarmi niuerfinni aalisakkat akii qaffasissut silap pissusaata allanngornerata kingunerisaanik pisassiissut apparneri siunissami qaninnerusumi oqimaaqatigiisissinnaavai, siunissamilu ungasinnerusumiinngitsoq. Aalisarneq suli aningaasarsiornermut annertuumik pingaaruteqarpoq, qangatulli tunisisarnermi atukkat tamatumalu kingorna aalisakkat suliareqqinneqarneri aalisakkatigut allanngortoqarnera avataaniillu unammillertoqarnera pissutigalugit allanngortussanngorput. Kingullertut taaneqartoq manna tikillugu imaluunniit ukiuni arlalinni nunami maani aningaasarsiornikkut annertuumik pingaaruteqarsimanngitsunik aalisakkanik inuussutissarsiortgalugu aalisarnissaq imaluunniit misileraalluni aalisarnissaq maannakkut pisariaqartilerpaa.

Aningaasarsiorneq maannakkutut isikkoqartillugu ataatsimoortumik tapiissutit isertitat tunisassiornerullu akornanni nikingatitsipput. Taamaalilluni maannakkut atuinerup qaffasissusia nunami tunisassiarineqartunit qaffasinnerujussuuvoq. Ataatsimoortumik tapiissutit nunap isertitaatut annikilliartorneri malillugit kiffaanngissuseqalerneq akisussaaffeqarnerlu annertusiartussapput. Ataatsimoortumik tapiissutit ullumikkut atuinermk pilersitsinerat siunissami tunisassiorneq aqqutigalugu isertitanut tunngavinnik pilersitsissaaq. Tamanna ilinniartitaanermik ingerlataqarfinnut, suliffeqarfinnut kiisalu inuussutissarsiortunut annertuumik piumasaqaateqarpoq. Inerartornermik uagut aqutsisuussagutta, inerartornerlu uatsinnik aqutsissanngippat, taava inuiqatigiinni aaqqissugaanikkut allannguisoqarnissaanik piumasaqaateqarpoq, tassunga ilanngullugit ilinniagaqarnerup, piginnaasat nunamilu nuttarsinnaanerit annertusineri. Aatsitassanik piaasoqarnissaanut periarfissaqarluarpoq, taamaalillunilu pinngortitami pisuussutit aamma pisuussutinit iluanaarutinit akileraarutit siunissami pigissaarnerup atugarissaarnerullu qaffasissusianut iluaqutaasinnaallutik. Taamaattorli ingerlatseqatigiiffinnit nunanit allaneersunit annertuumik aningaasaliisoqarnissaanik tamanna piumasaqaateqarluni, namminersortuni aamma pisortat ingerlataqarfiini sulisinnaasutsinni aqutsisoqarnikkullu ilinniagaqarnikkut piginnaasatigullu annertuumik qaffasissuseqarnermik piumasaqaateqarluni.

Aatsitassat uulialu pillugit periusissamut isumalluartoqarluarpoq, taanna 2014-2019-imut nutarterneqassalluni kiisalu tunisassiorntuniit akileraarutinut, naalakkersuisooqatigiinnermi isumaqatigiissutip malitsigisaanik. Isukasiani London Miningip savimineq pillugu suliniutaa siuarsimanerpaavoq, aamma Nunatsinni manna tikillugu sanaartornikkut pilersaarutini annertunersangornissamut periarfissaqarluni sanaartornermi aningaasartuutit 14 mia.-it missaaniillutik. Suliniut taanna sanaartornerup nalaani (sulisut 3300-nik) tunisassiornerullu nalaani (sulisut 680-810-nik) sulisoqarneratigut kiisalu suliniutip malitsigisaanik sunniuteqarnikkut aningaasarsiornikkut ingerlataqarnermi annertuumik sunniuteqarsinnaavoq. Savimineq pillugu suliniut suli nalorninarpoq, aamma pisariaqartumik aningaasaliisoqarnissaa apeqqutaalluni.

Aatsitassanut radiop qinngornerinik aqoqartunik piaanissamut Nunarput suli naaggaarluinnarpoq, ujaqqallu qaqtigoortut ilai taamatut aqoqarlutik. Ujaqqanik qaqtigoortunik iluaquteqarnermi piiaaffiusinnaasut ilaanni ingerlaqqeriarnissamut aalajangiisoq taamaattumik tassaavoq uranimik piiaanermut manna tikillugu naaggaarluinnarnerup atuukkunnaarsinnissaa. Uranimut naaggaarluinnarnerup atuukkunnaarsinnera ilaatigut Kuannersuit eqqaanni ujaqqanik qaqtigoortunik piiaanissamut periarfissat pitsaanerulissapput.

Isumannaatsumik tunngaveqarluni ineriertortsineq pisortat ingerlataqarfintti aningaasaqarnikkut atasinnaasumik qulakkeerisoq Naalakkersuisut ineriertortsineq pillugu ingerlatsineranni najoqquassani pingaaruteqarpooq. Maannakkutut atugarissaarnikkut qaffasissuseq minnerpaamik atatiinnassavarput siunissamut ungasinnerusumut aamma atasinnaasumik aningaasaqarnikkut ingerlatsilluta. Utoqqaat amerliartornerat inuiaqatigiinnut annertuumik unamminartoqartitsivoq. Innuttaasut utoqqaanerusut pensioninut peqqinnissaqarfimmullu pisortat aningaasartuuteqarnerannik annertunerusumik tatisimannipput. Peqatigisaanik aningaasartuutinik nammattussat inuusuttut sulisinnaasullu ikinnerullutik, ilaatigut inuusuttut ukioqatigiit ikinnerummata ilaatigullu arlalissuit nunanut allanut nuuttarmata, pingartumik Danmarkimut. Taakku saniatigut inuiaqatigiit inooqataanermi ajornartorsiuteqarlunilu assigiinngissuseqarpooq, akisussaaffigineqartariaqartunik aamma akisussaaffigineqartussanik.

Tamanna isumaqarpooq pisortat atasinnaasumik aningaasaqarnerat qulakkeerniarlugu aamma aningaasartuutitigut ineriertorneq aqunniarlugu ingerlataqarfintti periusissat pisariaqartut. Ingerlataqarfiiit ataasiakkaat eqqarsaatigalugit siunissamut anguniakkanik aamma anguniakkat taakku anguneqarnissaannut pilersaarutinik imaqartunik ingerlataqarfinttu periusissat suliarineqarlutillu atuutilersinneqassapput. Immikkoortoq ataaseq pillugu ingerlataqarfimmi periusissaq anguniagaq anguniarlugu suliniutit sunniutaat uutturniarlugit aningaasaliinernut, aserfallatsaaliiernut periusissanullu ataatsimut pilersaarutinik imaqassapput. Pilersaarutit ingerlaavartumik nalilersorneqarsinnaassassapput, pilersaarummilu sunniut pillugu iluatsitsinissamut piumasaqaatit naliliiffigineqarsinnaassallutik. Kommunit, Namminersorlutik Oqartussat suliffeqarfiiillu pisortanit pigineqartut pisortat aningaasaataasa atorneqartut sunniutaannik naliliisinnaassapput.

1.3 Pisortat ingerlataqarfiiisa aningaasaqarnerat


Aningaasaqarnikkut tunngaviusuni killeqartuni pingarnertigut politikkut anguniakkat tapersorsorniarlugin immikkoortuni arlalinni siunissami qanittumi angusaqarnissaq pisariaqarpooq, peqatigisaanillu siunissami ungasinnerusumi aningaasanik aqutsineq atasinnaasoq qulakkeerneqarluni.

- Ilanniartitaanikkut suliniutit suliffeqarfiiit ineriertortinnissaannik pisariaqartitsineq aamma inuussutissarsiortut uummaarinneerusut anguneqarnissaat tapersersussavaat.
- Suliffeqarfintti peqataanissamut kajumissaatinik pitsaanerusunik pilersitsisoqassaaq aamma isumaginninnermi tunniuttakkat akileraarusersuinerullu akornanni pitsaanerusumik ataqtigitoqarluni.

- Pinngortitami isumalluutinik iluaquteqarnermi inuussuteqarnermilu isumannaatsumik tunngaveqartumik ineriertortitsineq qulakkeerneqassaaq.
- Sanaartukkatigut ingerlatat aserfallatsaaliornerini ataatsimoortumik suliniuteqartoqassaaq. Namminersorlutik Oqartussani kommuninilu nalinginnaasumik ingerlatsinerup akiitsut aningaasalersorsinnaanngilai. Taamaattumik pilersaarutit periarfissaasinnaasut ingerlaavartullu akornanni pingaarnersiuisoqassaaq. Aamma pilersaarutit suliniutillu ingerlaavartumik nalilersorneqarlutik. Siunniussinerit kisimiillutik angusanik pilersitsinngillat, taamaattumik aningaasartuutitigut sanaartornermi aningaasaliissutini sunniutinik nalilersuineq pillugu pingaarnertigut ataatsimoorussanik piumasaqaatinik ilusilersuisoqassaaq.

Aningaasanik aqutsineq pingaartumik innuttaasut utoqqaat amerliartornerannit aningaasartuutitigut tatisimaneqarpoq, takussutissiaq 2 takujuk. Takussutissiami takutinneqarpoq ukiuni aggersuni inuussutissarsiorsinnaasutut ukioqartuni inuit ataasiakkaat tamarmik allanut naleqqiullutik amerlanerusunik pilersuissasut.

Takussutissiaq 2: Pilersuisut brøkiat



Nass. Takussutissiaq 2: Pilersuisut brøkianni takutinneqarpoq sulisinnaasunut (17-64-inik ukiullit) naleqqiullugu innuttaasut sulisinnaasut avataaniittut (0-16-inik ukiullit aamma 64+-inik ukiullit) amerlassusaat.
Paasissutissarsiffik: Naatsorsueqqissaartarfik

Taakku saniatigut pisortat aningasaqarnerat sammivinnit arlalinnit tatisimaneqarpoq. Innuttaasut peqqinnissaq aamma peqqinnissakkut sullissinertigut periarfissat pillugit paasisimasaqarnerulernerat naapertorlugu peqqinnissaqarfimmut naatsorsuutigisat piumasaqaataallu qaffakkiartorput. Ilinniartitaanikkut piumasaqaatit qaffakkiartortut naammassiniarlugit aamma inuiaqatigiinni piginnaasatigut kinguaattoornerit anguniarlugit annertunerusunik aningaasaliisoqassaaq.

Akileraartarnermut Atugarissaarnermullu Isumalioqatigiissitaq akileraartarnermi, inissiaqarnermi isumaginninnermilu nutarterinernik arlalinnik inassuteqarpoq, ilaatigut ataqatigiinnertigut ajornartorsiuinik taaneqartartut annikillisinneqarnissaannik siunniussaqartut, aamma innuttaasut sulisinnaasut sulinissamut kajumissuseqartitsilfersussanik. Isumalioqatigiissitamit aamma inassutigineqarpoq akileraartarnermi tunngavigineqartut annertusinissaat aamma tapiissutaasartut siunnerfilerneqarnissaat, tassunga ilanngullugit inissiaqarnermut tunngasut.

Akileraartarnermut Atugarissaarnermullu Isumalioqatigiissitap taakku saniatigut pisortat ingerlataqarfianni nutarterisoqassasoq inassutigaa, qaffassisorujussuarmik pisortat sullissinikkut suli pisartagaqartitsissappata. Pisortat ingerlataqarfiini nutarterinikkut suliniutit arlallit Naalakkersuisunit aallartinneqassapput, tassunga ilanngullugit:


- Kommuninut missingersuutit pillugit suleqatigiinnermik iluarsartuussineq
- Pisortat ingerlatsineranni annertunerumik digitalinngortitsineq
- Pisortat akileeqqusisarnerat pitsaanerulersillugu
- Pisiniartarneq pillugu politiki pitsaanerusoq aamma pisariillisaanermi suliniutit allat

Nutarterinermi sulinerup sunniutai aamma kommuninik attuissapput, aamma pisariaqartutigut suliniutit ilarujussui piviusumik kommunini ingerlanneqartussaallutik. Taamaattumik Namminersorlutik Oqartussat aamma kommunit akornanni suleqatigiinnerup nukittorsarnissaanut pisariaqartitsisoqarpoq. Tassunga ilanngullugit atugarissaarnermut immikkoortuni pingaarnerni suliniutit sunniutaannik uuttuineq qulakkeerneqassaaq.

Pisortat ingerlataqarfiini nutarteraluni sulinissami Namminersorlutik Oqartussat aamma kommunit akornanni missingersuutitigut suleqatigiinneq pillugu isumaqatigiissutip nutarterneqarnera pillugu pisortat ataatsimoorlutik suleqatigiinnerat allartinneqarpoq. Tamanna piareersarlugu kommunit aamma Namminersorlutik Oqartussat akornanni suleqatigiinnermik misissueqqissaarneq aallartinneqarpoq, taanna pillugu toqqammavigisat pitsaanerulersinnissaat siunertaralugu, immikkoortoq 2.2 naapertorlugu.

Inuit katitigaanerisa ineriantorneranni kommuninut aningaasaqarnikkut kinguneqartitsinerat annertuujusussaavoq, takussutissiaq 3 naapertorlugu. Pilersuisutut nammatassat ataavartumik qaffakkiartorneri pilersaarusiornermut aamma kommunini politikkut pingaarnersiuinernut annertuunik piumasaqaateqarput, aamma aningaasartuutit isertitallu akornanni oqimaatigiinneq qulakkeerniarlugu pisariillisaanerit pisariaqarlutik.

Takussutissiaq 3: Innuttaasut 65-it sinnerlugit ukiullikt - Kommunit



Paasissutissarsiffik: Naatsorsueqqissaartarfik

2013-imut ataatsimoortumik tapiissutit kommunit aamma Namminersorlutik Oqartussat akornanni isumaqtiginniniutigineqarneri inissinneqarput. Namminersorlutik Oqartussat aamma kommunit akornanni oqaloqatigiittuarneq kommunini sisamani tamani siuariartornerup ineriartornerullu qaffannissaanik pingaartitsivoq, tamannalu ilaatigut sanaartornermi ilinniartitaanermilu aningaasaliinerit agguernerisigut takussutissaqarluni.

1.4 Inuaqatigiit akiitsoqalernerri

Tabel 3-mi pisortat ingerlataqarfiini akiitsut ineriartornerini ilimagisat naatsorsorneqarput, tassunga ilanngullugu aamma Namminersorlutik Oqartussanit pigineqartut aktianik piginneqatigiiffiit. Pingaarnertigut naliliineq tassaavoq pisortat ingerlataqarfiini akiitsut qaffasiffi aningaasanut ukioqarfiusussami ukiunilu missingersuusiorfiusuni akuerineqarsinnaasumik qaffasissumiitinnissaat, akiitsutigut aningaasaliinikkullu ingerlatsineq akisussaassuseqartoq ingerlanneqassappat.

Tabel 3. Pisortat ingerlaqarfiini akiitsut ineriertornissaannut ilmagisat, mio. kr.

Akiitsut erniaqartut tamarmiusut	2009	2010	2011	2012	2013	2014	2015	2016
Namminersorlutik Oqartussanit pigineqartut aktiatigut ingerlatsiviit anginerpaat	3.706	3.449	3.387	3.024	3.451	3.033	2.823	2.656
Illuut A/S	-	23	263	463	568	653	743	833
Kommunit	109	196	196	196	196	196	196	196
Namminersorlutik Oqartussat	0	250	250	600	600	600	800	800
Katillugit	3.815	3.918	4.096	4.283	4.815	4.482	4.562	4.485
Nuummi umiarsualivik nutaaq	0	0	0	0	0	574	559	543
Katillugit, Nuummi umiarsulivik nutaaq ilanngullugu	3.815	3.918	4.096	4.283	4.815	5.056	5.121	5.028
Akiitsut erniaqartut ilanngaatissaat ilanngaatigereerlugit								
Namminersorlutik Oqartussanit pigineqartut aktiatigut ingerlatsiviit anginerpaat	3.037	2.836	2.613	2.411	2.557	2.202	2.067	1.876
Illuut A/S	-	17	328	425	535	618	708	798
Kommunit	-350	-68	-68	0	0	0	0	0
Namminersorlutik Oqartussat	-1.320	-797	-677	-463	-258	-82	107	154
Katillugit	1.367	1.988	2.196	2.373	2.834	2.738	2.882	2.828
Nuummi umiarsualivik nutaaq	0	0	0	0	0	551	531	512
Katillugit, Nuummi umiarsulivik nutaaq ilanngullugu	1.367	1.988	2.196	2.373	2.834	3.289	3.413	3.340

Paasissutissarsifik: Nunatta Karsiata Naatsorsuutai, kommunit naatsorsuutaat, ukiumut nalunaarutit assiginngitsut namminerlu naatsorsuinerit.

Nass.: Namminersorlutik Oqartussanit pigineqartut aktiatigut ingerlatseqatigiiffiit anginerpaat tassaapput nunatta karsiata akiitsuinik aalajaallisakkanik naatsorsuinermi ilaasut aamma annertuunik akiitsoqartut. Piviusumik pineqarput Royal Arctic Line A/S, Royal Greenland A/S, TELE A/S aamma KNI A/S. Akiitsut aalajaallisakkat nassuiarneqartut tassaasut aktianik ingerlatseqatigiiffinni akiitsut, aktiat 50 pct.-i sinnerlugit Namminersorlutik Oqartussat piginnillutik.

Namminersorlutik Oqartussanit pigineqartut ingerlatseqatigiiffiit anginerpaat ataatsimut isigalugu naatsorsuutigaat akiitsutik ukiuni aggersuni ikilisissagaat. Tamatumunnga pingaartumik pissutaavoq Royal Greenland A/S-ip akiitsumi appartinnissaannut isiginnittumik pimoorussisumik periuseqarnera.

Ukiuni kingullerni naatsorsuinernut naleqqiullugu Namminersorlutik Oqartussanit pigineqartut ingerlatseqatigiiffiit anginerpaat akiitsuinik naatsorsuinermi Air Greenland ilaajunnaarpoq. Air

Greenlandip akiitsui nunatta karsiata akiitsuini aalajaallisakkat naatsorsornerinut ilaajunnaarpoq, Namminersorlutik Oqartussat ingerlatseqatigiiffimmi piginneqataassutaat 50 pct.-it inormagit.

Kommunit ullumikkut ilanngaatissat ilanngaatigereerlugit akiitsoqartutut nalilerneqanngillat, pingaartumilli inissiaqarnermut tunngasuni sanaartornikkut ingerlatanut siunissamut taarsigassarsinerit akiitsut qaffannerinut tapertaassallutik. Kommunit taarsigassarsisinnaneri naatsorsuinermi siulianiittumi ilanngunneqanngillat.

Sanaartornermi ingerlatat aningaasalersornissaannut 200 mio. kr.-inik annertussuseqartunik Namminersorlutik Oqartussat taarsigassarsinissaat naatsorsuutigineqarpoq. Nuummi umiarsualivimmik nutaamik pilersitsinermi aningaasaliinissatut naatsorsuutigisat eqqaassanngikkaanni pingaarnertigut ilimagineqarpoq akiitsut qaffasiffii tamarmiusut patajaallissasut. Nuummi umiarsualivimmik nutaamik pilersitsinissamut Inatsisartut akuersinissaat apeqqutaavoq. Nuummi umiarsualivimmik nutaami aningaasaliinerup kingunerissavaa ullumikkumut naleqqiullugu akiitsut qaffasiffiisa qaffannerat, misissuinerilli annertuut takutippaat pilersaarut imminut akilersinnaassasoq. Allatut oqaatigalugu umiarsualivimmik nutaamik sanaartortoqanngippat assartuinermut aningaasartuutit annerulissapput. Nuummi umiarsualivik nutaaq pillugu aningaasalersuinerup qanoq ittuunissaa suli aalajangerneqanngilaq. Kisianni akiitsut Namminersorlutik Oqartussanit imaluunniit pisortanit pigineqartumik ingerlatseqatigiiffimmit akiitsorineqalerpata pisortat akiitsoqarnerat tamarmiusoq qaffattussaassaaq.

Naliliisoqarpoq pingaarnertigut akiitsut ineriarngerat patajaatsusoq. Taamaattorli naatsorsuutigineqarluni pingaartumik Royal Greenland A/S-ip akiitsut akilernissaat isiginiarlugu pimoorussilluni periuseqarnini ingerlatiinnassagaa. Tassunga ilanngutissaaq akiitsut qaffasinnerulererinut tapertaasut suliniutit aatsaat aallartinneqartariaqarmata ingerlataq erniat taarsigassarsiallu akilersornissaannut aningaasalersuisinnaasumik isertitanik pilersisisinnaappat.

2. Politikkut aningaasaqarnikkullu anguniakkat

Aningaasaqarnikkut ingerlatsinermi pingaarnertigut anguniagaq tassaavoq Danmarkimiit ataatsimoortumik tapiissutinik isumalluuteqarunnaarnissaq aamma politikkut iliuuseqarnissamut annertunerusumik kiffaanngissuseqalernissaq.

Siunissaq qaninnerusoq isigalugu aningaasaqarnikkut politikimi anguniagaq tassaassaaq Ingerlatsinermut Sanaartornermullu kontup (IS) ukiumi missingersuusiorfiusumi aammalu ukiuni missingersuusiorfiusuni pingasuni ataatsimoortuni oqimaaqtigiaissaarneqarnissaa. Siunissaq qaninnerusoq isigalugu anguniagaq alla tassaavoq nunatta karsiani aningaasartuutinut tamarmiusunut aningaasat tigoriaannaat 10 pct.-itutinnissaat.

Tamanna isumaqarpoq ukiuni ataasiakkaani allanngorartoqarsinnaasoq, piffissamili ukiuni sisamani IS-imi agguaqatigiissitsineq nulimiissasoq imaluunniit pitsaanerulluni, piffissamili tassani akiliisinjaassuseqarneq 650 mio. kr.-it qaangersimassallugit. Anguniakkat taakku ukiumut aningaasanut inatsimmi pingaarnersiuinernut tunngaviupput. Tassunga atatillugu isiginiarneqarpoq IS, IST pinnagu. Tamanna ukumi ataatsimi amigartooruteqarfiusumik aningaasaliisoqarnissaanut periarfissiivoq, ukumili tulliuttumi sinneqartoorfiusalluni. Nalinginnaasumik nikingassuteqartarnerit akilersinnaajumallugit, assersuutigalugu sanaartornermi suliat imaluunniit akileraarutit, aningaasartuutinit tamarmiusunit minnerpaamik 10 pct.-imik aningaasanik tigoriaannarnik peqarnissaq pisariaqarpoq. Peqatigisaanik pingaarpoq tassanngaannartumik suliniuteqarnissaq pisariaqalissappat sukkasuumik qisuariarnissamut Naalakkersuisut iliuuseqarnissaminnut kiffaanngissuseqassallutik. Assersuutigalugu taamaattoqarpoq 2009-mi, taamani Royal Greenland A/S tassanngaannartumik aningaasanik pisariaqartitsilermat.

Aningaasaqarnikkut politikip siunissami ungasinnerusumi isertitat aningaasartuutilu akornanni oqimaaqatigiissaarineq qulakkiissavaa, taamaalillunilu aningaasanik aqutsineq attanneqarsinnaasoq qulakkeerlugu. Aningaasanik aqutsineq attanneqarsinnaasoq pisortat ingerlatsiviisa (Namminersorlutik Oqartussat kommunillu) isertitaasa aningaasartuutaasalu akornanni assigiinngissutit uuttuutaassaaq piffissaq aningaasanut inatsimmi ukiut missingersuusiorfiusut qaangerujussuarlugit. Pisortat aningaasaataanni tamarmiusuni piffissami sivisuumi sinneqartoortissatut amigartoorutissatullu naatsorsuutigineqartut uuttortarnerisigut pisortat ingerlatsivii siunissami aningaasalersorneqarneranni maanna aaqqissuussineq nalilerneqarsinnaassaaq. Tamanna aningaasanut takussutissatigut uuttorneqartarpoq, 2040 tikillugu naatsorsuisinnaasoq.

Naatsorsuinerit kingulliit takutippaat pisortat aningaasaataannik maanna aaqqissuussinerup ingerlatiinnarnissaanut akissaqartoqanngitsoq. Tamanna kingullermik Aningaasarsiornermi Siunnersuisoqatigiit nalunaarutaanni 2012-imeersumit uppernarsarneqarpoq. Taamaattumik pisortat aningaasaqarneranni siunissami ungasissumi atasinnaasumik aaqqissugaanermik qulakkeerisinnaasumik nutarterinermi ullumikkut eqqarsaasersoreernissamut pisariaqartitsisoqarpoq. Aningaasaqarnermi piviusumik malunnaatilimmik siuariartitsinissaq anguniagaavoq. Naalakkersuisut anguniagaraat namminersortuni aamma pisortat ingerlataqarfii ni naammassisqaqarsinnaassutsimik annerulersitsisumut tunngaviusinnaasumik pingaarnertigut toqqammavinnik aalajangersaanissaq, kiisalu inuussutissarsiutinik siuariartorfiusunik siuarsaasunik toqqammavitsigut atukkanik aalajangersaanissaq. Tamanna ilaatigut pissaaq kajumissaataasunik aaqqissuussinerit pitsaaninngortinnerisigut aamma pisortat aningaasaataannit siunnerfeqarnerusumik atuisoqarneratigut.

Naalakkersuisut aningaasaqarnikkut ingerlatsinerannut anguniakkat aalajangersimasut kingulianiittumi eqikkarneqarput.

Aningaasaqarnikkut politikkimut tunngatillugu anguniagassat tunngaviillu

Aningaasaqarnikkut politikimi anguniakkat

- Danmarkimit ataatsimoortumik tapiissutinik pinngitsuisinnaannginneq
- Siunissami qaninnerusumi anguniakkat
 - Ukiuni missingersuusiorfiusuni IS-ip oqimaaqtigiissinnissaa
 - Nunatta karsiani aningaasartuutinut tamarmiusunut atatillugu aningaasat tigoriaannaat 10 pct.-iunissaat
- Siunissamut ungasinnermut anguniakkat
 - Piffissap sivisunerusup ingerlanerani aningaasanik aqutsinermi politiki attanneqarsinnaasoq
 - Inuiaqtigiiit aningaasaqarneranni ineriartornivik

Aningaasaqarnikkut politikimi anguniakkat

- Pisortat aningaasaliissuteqartarnerisa nalilersorneqarnissaannut tamanut piumasaqaatit
- Pingaaruteqartumik aningaasartuutaasut, atuutereersut nutaallu, tamarmiusut qanoq sunniuteqarnerisa nalilersorneqarnerat
- Politikkut anguniakkani anguniakkanut tapertaasumik kajumissaanermut aaqqissuussineq
- Tapiissutigineqartut tamarmik piffissamik killiligaassapput, aamma inuussutissarsiutitigut tapiissutinut tunngatillugu nunatta karsia taamaallaat suliniutinut aningaaserivimmi imaluunniit assingusumi akiligassarsinissamut naliliisarfiusumi akiligassarsinissamut naliliiffigineqarsimasunut tapiissuteqartassaaq imaluunniit qularnaveeqqusisassaaq.
- Suliffeqarfimmi pigisanik nalilinnik aserfallatsaalialiinissap isumannaarneqarnissaanut tamanut malittarisassat, tassa aserfallatsaalialiinissamut kinguaattooqqanerup atuuttup sivitsorsarneqannginnissaa qulakkeerniarlugu.
- Aserfallatsaaliegassatut kinguaattooqqasut ikilisarniarlugit immikkut ittumik suliniuteqarneq.
- Immikkut ittumik isertitat ilinniartitaanermi sanaartornernut aningaasaqarnikkut politikimi pingaarnertut anguniakkanut tapersiisunut salliutillugit atorneqassapput, tassa ingerlatsinerup annertusineqarneranuunngitsoq.

Aningaasaqarnikkut ingerlatsinermut tunngaviit pisortat aningaasaqarnerannik allaffissornikkut politikkut aqutsinermut toqqammaviliivoq. Kingulianiittumi tunngaviit itisileriffigineqarput.

Pisortat aningaasaliissuteqartarnerat pillugu tamanut atuuttussamik tunngavissanik suliaqartoqassaaq. Taamaalilluni Namminersorlutik Oqartussani, kommunini aammalu aktiaateqarluni ingerlatseqatigiiffinni Namminersorlutik Oqartussanit pigineqartuni aningaasaliinerit ataqtigissaarnissaat qulakkeerneqassaaq. Aamma pisortat tamakkiisumik taarsigassarsinerannik aqutsineq pillugu immikkoortoq 1.4 takujuk. Taamaalilluni allatut aningaasaliissuteqarsinnaasut imminnut assersuunneqarsinnaanerat qulakkeerneqassaaq, pingaarnersiusinarerlu paasissutissanik tunngavissaqartinneqalerluni. Inuiaqatigiit aningaasaqarnikkut kinguniinik nalilersuinermi ilitsersuusiorluni sulineq ingerlanneqarpoq, pilersaarutit assigiinngitsut pingaarnersiornerinut atatillugu assersuussisinnaanerup qulakkeerneqarnissaanut atorneqarsinnaasoq. Ilitsersuinermi pisariaqarpoq aningaasaliinermi aalajangersimasumi aningaasaqarnikkut isigisassat pillugit eqqarsaatersuutit aamma ilaatigut nunap immikkoortuani, inooqataanikkut avatangiisitigullu atasinnaassusia pillugu eqqarsaasersuutit saqqummiunneqarlutik.

Aallaavittut immikkoortut aningaasartuuteqarfiusut pingaaruteqartut tamarmik sunniutaat uuttorneqartassapput. Sunniutinik uuttuinerup atorneqarneratigut suliniutip imaluunniit pilersaarutip aalajangersimasumik naammassineqarnissaa imaluunniit ingerlatinneqarnissaanik kissaateqartoqarnersoq nalilersorneqarsinnaalissaq. Takussutinik uuttorneqarsinnaasunik aalajangersimasunik saqqummiussinikkut aamma taakku takussutissanut toqgarneqartunut qanoq pitsaatigisumik eqqortitsisinnaaneri malillugit suliniutit pingaarnersiornerisigut pisortat aningaasaataat sunniuteqarnerusumik siunnerfeqarnerusumillu atorneqarsinnaapput. Immikkoortut ilaanni tamatumani siuarsimareertoqarpoq, tassunga ilanngullugu pingaartumik ilinniartitaanermut tunngasoq, peqatigiinnissamik isumaqatigiissuteqarnermut atatillugu EU-mit piumasaqarnerup malitsigisaanik. Immikkoortuni allani takussutissat ineriartortinnissaat pisariaqarpoq aamma pitsaasumik sunniutinik uuttuisinnaanermut nalunaarsukkatigut tunngavinnik pissarsinissaq. Tamanna ukiuni aggersuni Naalakkersuisunit malitseqartinneqassaaq.

Suliniutit nutaat tamarmik sapinngisamik naalakkersuinikkut aningaasaqarnikkullu anguniakkanik tapersersuisut kajumissaanermut aaqqissuussinerit qulakkeernissaannut iluaqutaassapput. Tamanna ingerlataqarfinni ataasiakkaani aamma ingerlataqarfiit akornanni atuuppoq. Pisortanit pisartakkat namminerlu isertitat katinnerini koruuninut isertitarineqartunut kingullernut akileraarutit katiterneqarsimasut annikillisinnerisigut suliffeqarfiit isumaginninnermullu tunngasut assersuutigalugu akornanni ataqtigieinnernut tunngasut pitsaanerusumik tunngavissaannik aalajangersaasoqarneratigut inuiaqatigiinnut ataasiakkaanullu iluanaarutit anguneqarsinnaapput. Pisortanit pilersorneqarneq imaluunniit pisortanit tapiissutisisarneq pinnagu sulinissamut ataasiakkaat aningaasatigut kajumissaataanni ataqtigieinnertigut ajornartorsiutaasinnaasut Akileraartarnermut Atugarissaarnermullu Isumalioqatigiissitap aamma Aninaasaqarnermut Siunnersuisoqatigiit upternarsareerpaat. Inuit ilaannik sulilernissamut piviusumik aningaasatigut kajumissaatissaqanngilaq. Pisortat ingerlataqarfiini, Namminersorlutik Oqartussani aamma Namminersorlutik Oqartussat aamma kommunit akornanni aningaasanik iluanaarniartoqartarneranik suli ajornartorsiuteqartoqarpoq. Pingaarnertigut kajumissaatit

aaqqissugaanerisa sunniutaannik nalilersuineq politikkut suliniummi nutaami tunngaviulluinnarluni.

Tapiissutinut aaqqissuussinerit, qularnaveeqqusinerit tapiissuteqariaatsilluunniit allat aallartinneqassappata taakku piffissaat killilersorneqassapput. Maannakkut tapiissutinik aaqqissuussinerit taakku sunniutaannut naleqqiullugit aamma nalilersorneqartariaqarput. Pisuni aningaaserivimmi akiligassarsisinnaanermilluunniit naliliisarfimmi akiligassarsisinnaanermik naliliisoqarsimatillugu nunatta karsia aallaavittut isigalugu aatsaat tapiissuteqartassaaq. Inuussutissarsiutinik siuarsaneq pillugu inatsimmi aaqqissuussinernik nassaassaqpoq aallarnisaasut piffissami siullerpaami ikiorserneqarnissaannik siunertaqartunik. Tassani immikkoortoqarsinnaavoq taamaattoqarnissaanik piumasaqarnissaq naleqqutinngitsuusoq nalilerneqarluni.

Illu illersorneqarsinnaasumik ingerlaavartumillu aserfallatsaaliorneqanngitsoq ukiut 40-t 50-it ingerlanerini isaterneqassaaq, illuli aserfallatsaaliorneqartoq aatsaat ukiut 75-100-t qaangiuppata isaterneqassalluni – illup atorneqarnera apeqquataillugu. Pisortat illuutaannik nutaamik sanaartornermut isaterinermullu aningaasanut inatsimmi aningaasat annertungaatsiartut ullumikkut atorneqartarput. Isaterinermut nutaanillu sanaartornermut taarsiullugu aserfallatsaaliniermut aningaasat amerlanerusut atorneqarpata tamanna inuiaqatigiinnut akikinnerussaaq. Taamaattumik illut pisortallu suliffiutaat ullutsinnut naleqqunnissaannik qulakkeerisussamik sulineq aallartinneqarpoq, peqatigisaanik maannakkut aserfallatsaaliniikkut kinguaattoorneq annertusineqarnani. Taamaaqataanik aserfallatsaalineremi ullumikkut kinguaattoorutit annikillisarniarlugit suliniuteqartoqassaaq. Tamanna isumaqarpoq aserfallatsaalilluni suliniutinut aningaasatigut killiliussat ullumikkumut naleqqiullutik annertusineqassasut aamma sanaartornissamut suliniutit nutaat aningaasalersorneqarnissaannut tamatumalu kingorna pisariaqartutigut aserfallaatsaaliorneqarnissaasa naammassineqarnissaannut pilersaaruteqassallutik.

Immikkut ittumik isertitat ingerlatsinermut aningaasartuutinik amerliliinermut atorneqartariaqanngillat. Naalakkersuisut kissatigaat, soorlu 2010-mi aamma 2011-mi annertuunik, utaqqiisaasumillu uuliamik aatsitassanillu ujaasinerniit immikkut ittunik isertitaqartoqartoq, ilinniarfinni sanaartornernut aamma ilinniartitaanikkut suliniutinut, innuttaasut isertitaannik ataavartumik qaffatsitsisinnaasunut taakku salliutinnejassasut. Ilinniarfinnik sanaartornermut ingerlatsinermi aningaasartuutit ilinniartitaanermut sillimmatiniit aningaasalersorneqassapput. Suliniutit, suliffeqarnermik qaffatsitsisut, aaqqissuunneqassapput, taamaalilluni siunissami qanittumi suliffinnik pilersitsisoqarluni siunissamilu ungasinnerusumi iluanaaruteqartitsisunik aamma aaqqissugaanikkut suliffissaaleqinermik ikinnerulersitsisunik. Assersuutigalugu sulisinnaasut pikkorissartinneqassapput, taamaalillutik taakku inuussutissarsiutit siuariartorfiusut ineriartortut ilaattut piareersimasunngorlutik. Tassunga ilanngutissaq suliffeqarfiiit sulisussanik pissarsinissamut sapersarfiini taamaattumillu sulisut tikisitsisarfiini imaluunniit atorfinnik nunanut allanut nassiussisarfiini atorfinnik inuttaliinissaq pisariaqartinneqarmat. Taamaalilluni ullumikkut atorfinnik inuttalerneqanngitsunik peqareerpoq assersuutigalugu raajaleriffiit ilaanni imaluunniit nunanit allaneersunit sulisunit ilinniarsimanngitsunit inuttalerneqartunik.

Pingaarpooq erseqqissassallugu suliniutit ataasiakkaat akornanni aamma ataatsimoortumik nalilersuisoqassammat. Immikkoortuni 2.2-2.12-immi immikkoortut pingaarnertut ataasiakkaarlugit misissorneqarput, pisortat suliniutaannut atatillugu sunniutinik nalilersuinerit annertunerusumik atorneqarnissaat pillugu suliarinninneq isiginiarneqarluni. Sunniutinik uuttuinerup atorneqartuarneratigut aamma Key Performance Indicators (KPI) atorneqarneratigut, immikkoortut akornanni pingaarnersiuinissamut tunngaviit pitsaanerulissapput.

2.1. 2014-imut aningaasanut inatsit

Naalakkersuisut aningaasaqarnikkut politikimi anguniagaat tunngavissaallu 2014-imut Aningaasanut Inatsisissatut Siunnersuutip suliarineqarnerani tunngavigineqarput aammalu inuiaqatigiit aningaasaqarnerisa akisussaassuseqartumik patajaatsumillu aqunneqarnissaa pillugu naalakkersuisooqatigiinnissamik isumaqatigiissummi oqaasertanik toqqaannartumik aallaaveqarlutik. Aningaasaqarnikkut politiki aningaasanik inatsimmik suliaqarnermi pingaarnersiuineq eqqarsaatigalugu aammalu siunissaq qaninnerusoq ungasinnerusorlu eqqarsaatigalugit aningaasaqarnikkut anguniakkat pingarnerit aammalu immikkoortunut periusissani ataasiakkaanik aningaasaqarnikkut politikip akornanni ataqtigiiittoqarnissaanik qulakkeerinissamut sakkussaavoq pingaarutilik.

Aningaasaqarnikkut politikimi maanna tunngaviusumik aporfiusoq tassaavoq aaqqiissutissat siunissami ungasinnerusumi assersuutigalugu ataatsimut isigalugu ilinniagaqassutsip appasinnera eqqarsaatigalugu aaqqissuussaanikkut unammilligassanut aaqqiissutissanut tapertaasussat aammalu siunissami qaninnerusumi assersuutigalugu suliffissaaleqinerup annertunera eqqarsaatigalugu unammilligassat akornanni pingaarnersiuisoqarnissaa. Aningaasaqarnikkut ingerlatsinermut anguniakkat siunissami qanittumi aamma siunissami ungasinnerusumi unamminartut eqqarsaatigissavaat.

Annertunerusumik nammineersinnaaneq, inuiaqatigiit aningaasaqarnikkut imminnut napatittut pillugit siunissami ungasinnerusumi anguniakkat, aamma ingerlataqarfiiit akornanni suliniutit ataqtigiiissut aamma nunami naligiinnerusumik ineriartorneq pingaarnersiuinerni najoqquuttaappaat.

Kisianni ingerlatsinermi annertuunik allatut pingaarnersiuisoqarneratigut aamma sanaartornermi pitsasunik aningaasaliisoqarneratigut politikikkut pingaarnertigut anguniakkat tapersorsornissaat 2014-imut AIS-immi pissutsinik arlalinnik kigalaaquserneqarput:

- Immikkoortunut periusissanik taakkulu piviusunngortinneqarnissaannut siunnersuutinik suliarinninnissaq pillugu suliassaqarfinni qitiusuni arlalinni maanna pilersarusiornermik suliaqartoqarpoq, tassunga ilangullugu peqqissutsimut ilinniartitaanermullu tunngasuni.

- Ullumikkut sanaartornermi immikkoortunut pilersaarutinik politikkut anguniakkanut pingarnernut ikorfartutaasussanik peqanngilaq. Taamaattumik 2014-imut AIS-imut ukiunut arlalinnut sanaartornermi pingaarnersiuinissamut aalajangiinissamut naammattunik tunngavissaqarnani.
- 2012-imi aamma 2013-imi aningaasarsiornermi ingerlanerliorneq isertitat appasinnerutippai suliffissaaleqinerullu akiornissaanut aningaasartuutit qaffatsillugit.

Taamaattumik 2014-imut AIS-imi arlaatigut iliortoqarnissaanut periafissaqarpoq. Siusinnerusukkut aqtsisimasunut naleqqiullugu ineriaartornermik allanngortitsisinnaasumik siunnerfeqartumik allatut pingaarnersiuisoqassasoq Naalakkersuisut siunnersuutigaat aamma 2015-imut AIS-imi pingaaruteqartussanik annertunerusumik pilersaarusiornermik aallartitsisoqarluni.

2014-imut Aningaasanut Inatsisissatut Siunnersuusiornermi Akileraartarnermut Atugarissaarnermullu Isumalioqatigiissitamiit inassuteqaatinut aamma nutarterinernut, siunissami ungasinnerusumi pisortat aningaasaqarnerannik atasinnaanngortitsisunut Naalakkersuisut isummersorput. Ingerlatsinermi sanaartornermilu piffissami tamarmiusumi 2014-2017-imut isertitat aningaasartuutillu oqimaaqatigiinnissaat pillugu aningaasatigut politikimi anguniakkat angunissaannut iluarsartusseqqinnerit tapersiissapput.

2014-imut Aningaasanut Inatsisissatut Siunnersuut 2014-imti IST-mi (ingerlatsineq, sanaartorneq taarsigassarsinerlu) 76,3 mio. kr.-inik amigartoorteqarfiusoq Naalakkersuisunit saqqummiunneqarpoq. IS (ingerlatsineq sanaartornerlu) kisiisa tunngavigalugit naatsorsuineq 2014-imi 102 mio. kr.-inik amigartoortfiussaaq, piffissamulli 2014-2017-imut tamarmiusumik IS-imi 41 mio. kr.-inik sinneqartoortoqassalluni.

Piffissamut 2014-2017-imut IS-imi ataatsimoortumik sinneqartoorneq anguneqarpoq nutarterinerit pisortat karsiini 2015-imti 10 mio. kr.-inik, 2016-imti 112 mio. kr.-inik aamma 2017-imti 173 mio. kr.-inik pitsanggoriarnermik kinguneqartussatut missingersuusiorneqarmata.

Tabel 4. 2014-imut AIS-imi aningaasartuutit isertitallu missingersuutigineqartut.

	AIS 2014	UM 2015	UM 2016	UM 2017
Ingerlatsinermut aninggaasartuutit	2.807,80	2.797,00	2.687,70	2.632,70
Aninggaasartuutit inatsisitigut pisussaaffiusut	1.052,80	1.075,30	1.102,50	1.128,80
Tapiissutit	2.080,90	2.079,00	2.040,20	2.001,80
Sanaartornermut aninggaasartuutit	739,6	639,1	555,2	545,2
Isertitat	-6.604,80	-6.527,60	-6.491,90	-6.479,50
Katillugit IST (Ingerlatsineq, sanaartorneq taarsigassarsinerlu)	76,3	62,9	-106,3	-171,1
Katillugit IS (Ingerlatsineq sanaartorneq)	102,0	108,2	-98,1	-153,2

Paasissutissarsiffik : 2014-imut Aninggaasanut Inatsisissatut Siunnersuut

Naalakkersuisut nutaat aninggaasarsiornikkut ingerlanerliornermik sunnerneqarsimasumik aninggaasaqarnermik tigusaqarput. Aninggaasarsiornikkut ingerlanerliornerup ajortumik sunniutai annikitsumiitinniarlugit suliffissaqartitsiniarnernut suliniutit annertusineqarput, aamma Nuup avataani sanaartornikkut suliat amerlanerit aallartinneqassallutik. Taamaattumik ukiuni 2014-imi aamma 2015-imi aninggaasanut inatsisissatut siunnersuutini amigartoortoqarpoq.

Taamatut aninggaasarsiornikkut pissuteqartumik amigartoorneerit utaqqiisaasuupput sinneqartoornernillu malitseqassallutik, aninggaasarsiornikkut pissutsit mumippata aamma aaqqissugaanikkut aninggaasartuutit annikillisinneqarnissaat siunertaralugu nutarterinerit pisariaqartut naammassineqarpata pisortanilu ingerlatani isertitani tunngaviit qaffappata.

Naalakkersuisut ilimagaat ukiualuit qaangiutsinnagit aatsitassarsiornluni ingerlatat aallartinneqassasut, suliffeqarnikkut pissutsinik pitsangorsaasinnaasut aamma akileraarutitigut isertitat nukittorsarlugit taamaalillunilu pisortat aninggaasaqarnerisa aaqqinneaqqinnissaannut iluaquataallutik. Siunissamili ungasinnerusumi atasinnaanermut pingaarluinnarpoq pensionitigut, isumaginninnermi pisartakkatigut, ineqarnermut tapiissutini aamma akileraartarnikkut iluarsartuussinerit naammassineqarnissaat aamma aatsitassarsiornermik ingerlatsinerup malitsigisaanik isertitat ingerlatsinikkut sanaartornikkullu ingerlatanut nutaanut atorneqarnatik kisianni Namminersorlutik Oqartussat kommunillu aninggaasaqarneranni oqimaaqatigiinnerup pilerseqqinneranut atorneqarlutik.

2.2 Pisortat ingerlataqarfiinik iluarsartuussineq

Pisortat aninggaasartuutaasigut tatisimannineq ukiuni qulikkuutaani aggersuni qaffassaaq, siusinnerusukkut taaneqareersutut, inuit katitigaanikkut ineriantornerisa kingunerisaannik,

aaqqiissutissarlu kommunit aamma Namminersorlutik Oqartussat akornanni ataatsimoornikkut nassaarineqassalluni. Maannakkut tunngavigineqartut malillugit pisortat ingerlataqafii ni naleqqussaanissaq pisariaqarpooq, aamma namminersortut ingerlataqarfiini piviusumik siuariarnissamik pisariaqartitsisoqarluni.

Pisortat ingerlataqarfiinik naleqqussaaneq pisariaqarpooq, pisortat missingersuutitigut killiliussat sukangasuu iluanniinnissaq pissutigalugu aamma ilinniartitaanermi suliffeqarnermilu naammattunik aningaasaliinissat qulakteerniarlugit. Tamatuma kinguneraa aningaasartuutit uninngatinneqarnissaat, aamma pisortat ingerlataqarfiini sorianik naammassinninneq pisariillarisneqassalluni. Naalakkersuisooqatigiit isumaqatigiissutaasa nanginneranni pisortani allaffeqarfiit pisariillisaaffiginissaat, inuaqatigiit aningaasaqarnerisa akisussaassuseqartumik patajaatsumillu aqunneqarnissaat pisortanilu aaqqissugaanermi nalilersueqqinnissaq pillugu anguniagaqarlunilu suliniuteqarneq. Taamaattumik 2009-mi aaqqissuussaanermi iluarsaaqqinermik aamma iluarsaaqqinnej kissaatigineqartutut sunniuteqarsimanersoq pillugu nalilersuisoqassaaq.

2012-imut (2011) kommuninut naatsorsuutit aamma 2013-imut missingersuutit tabel 5-imi takutinneqarput.

Tabel 5. 2012-imut naatsorsuutit aamma 2013-imut missingersuutit, mio. kr.

	KUJ N2012	KUJ M2013	SER N2012	SER M2013	QEQQ N2012	QEQQ M2013	QAA N2011*	QAA M2013	KATIL- LUGIT N2012*	KATIL- LUGIT M2013
Ingerlatsineq	418	451	1.332	1.308	600	551	989	1.023	3.339	3.333
Sanaartorneq	8	16	100	295	110	61	37	47	255	419
Aningaasartuutit katillugit	426	457	1.432	1.603	710	612	1.026	1.060	3.594	3.732
Isertitat	446	480	1.496	1.464	662	618	1.089	1.115	3.693	3.677
Inernerter	20	13	64	-139	-48	6	63	45	99	-75

*2014-imut AIS-ip suliarinerani Qaasuitsup Kommunia pillugu 2012-imut naatsorsuutit pigineqanngillat.

Taamaattumik tabelimi 2011-mut naatsorsuutit atorneqarput.

Oqaaseqaat: 2012-imu naatsorsuutit inaarutaasumik akuersaarneqanngillat.

Paasissutissarsiffik: Kommunit

Aningaasaqarnermut Nunamullu Namminermut Naalakkersuisoqarfik kommunit aamma KANUKOKA suleqatigalugit 2012-imu ukiakkut kommunini aamma Namminersorlutik Oqartussani sipaarnissamut pisariillisaanissamullu periarfissat pillugit misissueqqissaarnermik aallartitsipput.

Siunertaq tassaavoq pisortat ingerlataqarfiini aningaasaqarnermi ataatsimoortumik paasisaqarnissaq aamma immikkualuttutigut paasisaqarnerunissaq – tassunga ilanngullugit kommunit aamma Namminersorlutik Oqartussani akornannilu pisortat aningaasartuutaasa katitigaaneri qaffasissusiilu. Namminersorlutik oqartussani kommuninilu aningaasartuutinik misissueqqissaarnermi immikkoortoq siulleq pillugu nalunaarusiaq pigineqarpoq. Siunertarineqarpoq annertunerusumik misissueqqittooqassasoq.

Naammassisaqarsinnaassutsinik misissueqqissaarnerit siunissami pisortani namminersortunilu ingerlataqarfii ineriarorneranni kissaatiginartutut pisariaqartutullu Naalakkersuisunit isigineqarput. Namminersortuni pisortallu ingerlataqarfii annertunerusumik naammassisaqarsinnaassuseq atugarissaarnerup qaffassisusiata qaffannerunissaanut tunngaviuvoq.

Namminersorlutik Oqartussat kommunillu akornanni suleqatigiinneq

Pisortat ingerlataqarfii nutarternissaannut iliuuseqarnissamut pilersaarut aamma Namminersorlutik Oqartussat aamma kommunit akornanni agguarneq Namminersorlutik Oqartussat aamma kommunit akornanni suleqatigiinneq pillugu misissueqqissaarnissami erseqqinnerusumik allaaserineqarpoq.

Misissueqqissaarnermi siunniunneqarpoq Namminersorlutik Oqartussat aamma Kommunit akornanni suleqatigiinneq, suli suleqatigiinnissamut ataatsimut najoqqutassat tassani saqqummiunneqarlutik.

Sulinissamut tunngavissami naalakkersuisooqatigiit isumaqatigiissutaanni anguniakkat suliniutillu makkupput:

- Inuaqatigiit aningasaqarnerat akisussaassuseqartumik allanngoranngitsumillu aqunneqassasoq.
- Immikkoortut akornanni annertunerusumik suleqatigiittoqalersinniarlugu pisortat aaqqissuussaanerat nalilersoqqillugu.
- Sullissineq ajorerulersinnagu pisortat allaffisornerat pisariillisarlugu.
- Kommunerujussuit pilersinneranni ataatsimoortitsinermi siunertap malinneqartarnera misissorlugu.

Misissueqqissaarnermi ilaatigut siunniunneqarpoq sanaartornermut tunngasuni akisussaaffiup ilaa annertunerusoq kommuninut nuunneqassasoq, ilaatigut siunissami aserfallatsaaliinermi kinguuatattoornissaq pinngitsoortinniarlugu aamma immikkoortuni ataasiakkaani ingerlatsinermut, aserfallatsaaliinermut sanaartornermullu akisussaaffiit ataqtiginneri qulakkeerlugit.

Pingaarnersiuineq nalilersuinerlu

Misissueqqissaarnermi pisortat ingerlataqarfii sulianik naammassinnitarnerit pillugit aamma kommunit Namminersorlutik Oqartussallu akornanni agguarnerit pillugit nutaamik eqqarsarnissaq siunniunneqarpoq. Akileraartarnermut Atugarissaarnermullu Isumalioqatigiissitamit pisortat aningasaqarneranni pisortanut ataatsimoortumik unamminartut erseqqissarneqarput, pilersaarutini aqutsinermi nalilersuinermilu siunnerfeqartumik suliniuteqarluni pissutsinik aqutsinissamut ataatsimoortumik suliniuteqanngippata aningaasalersuinikkut nikinganermik kinguneqartussaalluni.

Tamanna isumaqarpoq pisortat pilersaarutaannut suliniutaannullu atatillugu anguniagaq sunniutinillu uuttuinissaq annertunerusumik isiginiarneqassasut, tassunga ilanngullugu anguniakkatut aalajangiusat anguneqarsimanerinin takussutaasinnaasunik saqqummiussinerit.

Pileraarutinik nalilersuinermiit misilitakkat katersornerisigut tunisassiornermiit sullissinikkullu tunniussani isummat suliniutillu kommunit killeqarfiiut suliaqarfiiillu assigiinngitsut akimorlugit nuunneqarsinnaassapput.

Pisortat ataatsimoorlutik ERP-mi suliniutaat, Pisariillaanngorsaaneq, aningaasaqarnermik aqutsineq pillugu ataatsimoorussamik pitsaaneruseumillu tunngaveqarnerup qulakkeerneqarnissaanik kiisalu anguniakkatigut killiliussatigullu aqutsinermut tapersersuisunik aqutsisuniit paasissutissiarnermut attuumassuteqartunik periutsinik sakkusanillu tunniussisoqarnissaanik anguniagaqarpoq. Aningaasatigut aqutsinermut aamma aqutsisuniit paasissutissiarnermut pisortanit ataatsimoorussamut tunngavik ataaseq ilimagineqarpoq immikkoortuni arlalinni iluanaaruteqartitsissasoq, piffissap ingerlanerani anguneqartussanik:

- Aningaasaqarnermi piginnaanngorsaaneq. Aningaasaqarnikkut sulisuni aamma pisortani.
- Aningaasaqarneq, nukiit ingerlatallu pillugit aqutsisunut paasissutissiineq. Nalunaarsukkanik attuumassuteqartunik katersineq, saqqummiussineq pitsaassutsinillu qaffaaneq. Nalunaarsuiffit ataatsimoorussat. Tassunga ilanngullugit akiligassaqarfiiut akiitsortillu ataatsimoortumik aserfallatsaaliorneri.
- Ataatsimoortumik imaqartitsineq. Tassunga ilanngullugu akigititanik, inatsisit tunngavigineqartut il.il. ataatsimoortumik aserfallatsaaliorneqarneri. Nalunaarsukkat qitiusumi inissinneqassapput kisianni sumiifinniit atorneqassallutik.
- Ataatsimoortumik ilisimasat. Ilisimasat susassaqartuni pigineqartut – inunni ataasiakaaniunngitsoq.
- Qaffasinnerusumik pisariillaanngorsaaneq. Aaqqissuussatigut ataqtiginnerit nalunaarsukkallu ataqtiginnerisigut aningaasaqarnermik aqutsineq nukinnillu pitsaassutsinillu.
- Pisortat ingerlataqarfiiini tamani annertunerusumik suleqatigiinneq.
- Digitalit annertunerusumik atorneqarneri.
- Innuttaasunik kiffartuussinermi annerusumik assigiissaarineq.
- Annerusumik nakkutilliineq uppermarsaanelu.

Inernernik sunniutinillu tunniussisarnerit uppermarsarneqarsinnaaneri sulianik naammassinninnermi aningaasaqarnikkut kiffaanngissuseqartitsilerput, tassani sunniutinik uuttuinerup aalajangiinissamut tunngaviit pitsaanerulernerat qulakkeertarmassuk. Ingerlataqarfinni immikkoortut amerlanersaat taamaattumik suliniutinik pileraarutinillu aallartinneqarsimasunik sunniutinik uuttuisinnaassapput, aamma pileraarutinik allaaserinninnermi Key Performance Indicatorit (KPI) atuutilersinneqarlutik, ingerlaavartumik nalilersuisoqarsinnaalluni. Suliniummi imaluunniit pileraarummit ataatsimiit sunniutit uuttorneqartut kommunini killeqarfiiut, pisortani oqartussat suliaqarfiiillu akimorlugit ilisimasanik avitseqatigiiffiusinnaassapput.

2.2.1 Akiligassanit akilinngitsuukkat

December 2011-mi akiligassanit akilinngitsuukkat pillugit nassuaat tunuliaqutaralugu kommuninit aamma Namminersorlutik Oqartussanit sinnisoqartumik suleqatigiissitamik pilersitsisoqarpoq. Selineq ilaatigut peqataasuni marlunni nukissaaleqineq pissutigalugu kinguaattoorpoq, ilaatigut

kommunit aamma Namminersorlutik Oqartussat akornanni suleqatigiinnissamut isumaqatigiissutissamik nutaamik sulineq pissutigalugu, tassani aamma akiligassanit akilinngitsuukkatigut ajornartorsiutit ilaallutik.

Tabel 6. Akiligassatigut akilinngitsuukkat ineriartorneri januar 2012-imiit januar 2013-imut

	jan. 2012		jan. 2013	
	Suliat	Akilinngisat	Suliat	Akilinngisat
	Stk.	Kr.	Stk.	Kr.
Meeqqanut akilersuutit	63.108	272.559.820	64.531	289.157.716
Akileraarutissat sinneri	5.092	42.557.130	4.457	44.726.196
ESU	109	67.346.414	103	64.715.667
A-mik akileraarutit	433	202.485.019	2.296	173.313.090
Ingerlatseqatigiiffiit akileraarutaat	86	3.244.341	73	3.361.858
Ineqarnermut akiliutit	7.336	59.638.916	7.349	64.741.796
Akileraarutit erniaat	5	34.064	1.635	3.196.140
Kommuninut akilinngisat assigiinngitsut	16.781	37.429.153	17.697	39.545.172
Ikiuineq utertillugu akilerneqartussat	5.758	25.410.855	5.562	25.143.991
Ilinniagaqartut taarsigassarsiaat	671	10.597.634	648	9.930.689
Ulluunerani paaqqinniffiit	18.443	14.832.613	18.139	14.199.822
Eqqagassat	61.316	16.667.533	68.378	18.287.110
Kommunini inuussutissarsioruntuut taarsigassarsiat	391	4.497.244	360	4.241.885
Namm. Oqartusanut akilinngisat assigiinngitsut	1.520	13.835.663	2.218	12.385.676
Illumut taarsigassarsiat	458	24.623.764	358	18.215.717
Nammineq illuliornermi taarsigassarsiat	591	7.977.890	509	6.771.317
Innaallagiaq/imeq	8.106	4.742.232	6.614	4.007.442
Meeqqanut inissinneqartunut angajoqqaat akiliutaat	14.245	21.350.018	16.663	24.560.407
Nunanit avannarlernit piumasaqarnerit	1.562	25.685.878	1.576	24.088.094
Akilinngisat allat	6.728	3.188.577	6.751	4.457.087
Katillugit	212.739	858.704.758	225.917	849.046.872

Paassisutissarsiffik: Akileraartarnermut Aqutsisoqarfik

Akiligassani akilinngisat tamarmiusut piffissami januar 2012-imiit januar 2013-imut apparput, pingaartumik akileraarutini A-ni pissarsiassat malunnartumik ikilineqarlutik. Naliliisoqarpoq, ilanngaassisarneq, 2012-ip aallartinnerani atuutilersinneqartoq, malunnaatilimmik appariarnermut pissutaanerpaasoq. Akiligassanik akiliisitsiniartarnermi tamarmiusumi pitsanngoriartoqarpoq. Peqatigisaanik akilinngisat pillugit suliat amerlassusaat 13.000-t missaannik qaffariarput. Akiligassat ilaat, assersuutigalugu eqqagassat aamma meeqqanut inissinneqarsimasunut angajoqqaat akiliutaat amerlapput taamaalillutillu allaffissornikkut suliaallutik pisariusut

aninggaasartuutinut naleqqiullutik akilerneqarnissaannik periarfissat killeqarlutik. Kommunini aamma Namminersorlutik Oqartussani akiliisitsiniartarnerni suleriaatsit aamma ilanngaassisarnermi suleriaatsit qanoq allanngortinnejarsinnaaneri eqqarsaatigisariaqarput, taamaalilluni nukinnik atuinermi illorsorneqarsinnaasumik iluanaaruteqarneq anguneqarluni.

2.2.2 Digitalinngortitsineq aamma IKT-mi periusissaq nutaaq

Ukiuni aggersuni digitalinngortitsinermi siunnerfeqartumik aningaasaliinerit pisariaqarput. Allaffissornikkut qarasaasiatigut aaqqiinerit aamma innuttaasunut sammisunik imminut kiffartuunnermik aaqqissuussinerit pisortat ingerlataqarfisa ataqtigiinnerinik, sunniuteqarluarnerinik paasiuminartuunerannillu iluaqutaanissaasa qulakkeerneqarnissaat pisariaqarpoq.

Digitalinngortitsinerup iluatsinnissaanut tunngaviit pingaaruteqartut tassaapput:

- Pisortat digitalinngortitsinermi pilersaarutaat ataatsimut paasisaqaarneq aserfallatsaaliorneqassaaq. Aningaasaqarnikkut killiliussani suliniutit nutaat akornanni pingarnersiuisoqarnissaannut tamanna periarfissaqartitsivoq, aamma pilersaarutit ingerlanneqartut ataqtigiissaarneqarsinnaallutik. Kikkut tamarmik tunngavilersorluakkanik suliniutitigut pilersaaruteqassapput erseqqissunillu iluanaaruteqarlutik.
- Digitalinngortitsinerup ineriartortinneranut pisortat ataatsimoorussamik periuseqarneri assigiissaarinerlu patajaallisarneqassaaq aamma pisortat ingerlataqarfifi assigiinngitsuni pilersaarutinik nutaanik tamanik suliaqarnermut toqqammaviussallutik.
- Pilersaarutit iluatsittumik naammassineqarnerannit misilitakkat digitalinngorlugit aalajangersimaneqassapput, taamaalillunilu digitalinngortitsinermi pilersaarutit nutaat naammassineqarnissaannut pitsaanerpaamik tunngaviunissaat qulakkeerneqarluni.

Digitalinngortitsinermi pilersaarutit amerlanertigut teknikimut tunngasut isigniartarpaat isumaqtigiissutinullu tunngasut puigorneqartarlutik pingartumillu suliffeqarfimmi atulersinneqarnissaa, sulisut suleriaasiannik allanngortitsinermik pisariaqartitsisartoq taamaalillunilu sungiusarnissaq allanngortitsinermilu aqtsinermik. Amerlanertigut iluanaarutit ikittuinnaasарput (imaluunniit soqartarani), assersuutigalugu pitsaassutsikkut pitsanguutit imaluunniit pisariillisaanerit. Pilersuisunik suliatigut ilinniarsimasunik suleqateqarnermut iluaqutaasunik qarasaasiaqarnikkut isumalluutinik piginnaasaqartunik atuisoqarneratigut neriuutigineqarpoq suliarinnineq pitsaanerulissasoq, taamaalilluni annertunerusumik aninggaasartuuteqarfiunngitsumik pitsaassutsit pitsaanerulersillugit pisariillisaasoqarlunilu aninggaasaliinermiit iluanaaruteqartoqarluni.

Inuiaqtigiinni nutaaliasuni paasissutissiinermut attaveqaqtigiinnermullu atortorissaarut (IKT) siuariarnerup atugarissaarnerullu anguneqarnissaanut sakkuuvoq pingaaruteqartoq. Atugarissaarneq anguneqarsinnaavoq pisortat ingerlataqarfifi pitsaassutsit pitsaanerulersinnerisigut pisariillisaasoqarneratigullu, tassanilu IKT sakkuni pingaaruteqarluni. Pisariillisaanerit ilaatigut maleruagassat pisariinnerulersinnerisigut aamma allaffissornikkut aaqqissuussinerit ataqtigiinnerisa qulakkeerneqarnerisigut anguneqarsinnaapput.

IKT-mik atuisoqarneratigut pisortani ingerlataqarfik sumiiffimmi kommunip allaffianiit ungasissumi najugaqartunik innuttaasunik ajunngitsumik oqaloqateqarneq aamma anguneqarsinnaavoq. Misissueqqissaarnerup naammasseqqammersup takutippaa oqaloqatigiinnermi internetsip mobiltelefonillu atornissaannut innuttaasut piareersimasut kissaateqartullu. Innuttaasut isernissamut NemID-mik atuilernerisigut IKT-mi periusissaq innuttaasunut aamma pisortani ingerlataqarfinnik isumannaatsumik oqaloqateqarnerit ingerlanneqarnissaannut tunngavimmut iluaquataasimavoq.

IKT-mi periusissamut ilaasutut ukiaru *inuussutissarsiortut iserfissaat* aamma *pisortat ataatsimoorussaannik video atorlugu toqqavissaq* naammassineqassapput. Kikkut tamarmik oqartussaaqataallutik oqaloqatigiinnermik annertusaassaaq aamma pisortat allaffisornerannik paasisimasaqarnerup annertusineranut iluaquataassalluni.

Kisianni misilittagaqarpoq iluarsiinissamut pisariaqartitsinermik toqqaasumik. Tele aamma Internet IKT-p assersuutigalugu meeqqat atuarfianni, ilinniarnertuunngorniarfinni ilinniarfinnilu ingerlaqqiffiusuni ilinniartitaanermi IKT-mik atuinermut tunngaviupput. Aamma inuussutissarsiortuni nutaaliornermut taamaappoq, inuusuttut ilinniarluarsimasut nunap ataqtigiisumik siuariartorneranut taassumalu nunarsuarmi ataqtigiisumik inisisimaneranut iluaquataassallutik. Nalunaarasuartaateqarnikkut neqerooruteqartunut suliaticgullu aaqqissuussinernik pitsaanerusumik atuinissamut toqqammaviit erseqqinnerusut pisariaqartinneqarput.

IKT-mi periusissami pilersaarutit Namminersorlutik Oqartussani naalakkersuisoqarfitt kommunillu ilanngutitippai taamaalillunilu aamma allaffissornikkut sulianik ulluinnarni isumaginnittuni nukinnik atuilluni. Nukiit taakku killeqarput, pingaarnersiuinerlu aalajangiussisimanerullu isiginarnissaa pisariaqarluni. Allaffeqarfitt sulianik isumaginninnerinik aqunneqartumik allanguineq tassaavoq nunanut ataavartumik iluanaaruteqarnissap siuariarnissallu anguneqarnissaanut pingaaruteqartut.

Sulianiittut Digitalinngortitsinermi aqutsisoqarfimmik pilersitsisoqarneranut tunuliaqutaapput, Namminersorlutik Oqartussani qarasaasiaqarfimmik misilitakkat katarsorneqartut aamma pisortat ataatsimoortumik qarasaasiaqarnikkut pilersaarutaat pillugit kommuninik suleqateqarnermik aallaaviutillugit.

Digitalinngorsaalluni sulinerit allatut aaqqissuunneri

Digitalinngorsaanermi aqutsisoqarfiiup Namminersorlutik Oqartussani qarasaasiatigut ingerlatsinerup patajaatsunera qulakkiissavaa, Namminersorlutik Oqartussani niuernikkut ineriartitsineq aamma ataatsimoorussamik pisortat aaqqiernik isiginninninarneri aamma ilaassallutik. Digitalinngorsaanermi aqutsisoqarfiiup sulinermi suliassaanut taamaalillutik uku ilaassapput:

- Digitalinngorsaanermi siunnersuisoqatigiinnut tapersersuineq, taassuma suliassaralugu digitalinngorsaanermi pilersaarutitigut siunnersuineq aamma pilersaarutinik

- pingaarnersiuinermi iluaqutaaneq kiisalu aningaasaliinissaq aamma iluanaarutissatut pilersaarutaasut pillugit paasisaqarnerup aalajangiusimaneqarnera. Pisortat ataatsimoorlutik nalunaarsukkanik tigusiffiusumik nakkutiliinerat. Nunanit allanit misilitakkat takutippaat CPR, CVR allallu nalunaarsukkat ataatsimoorussat iluaqutaasumik oqartussat akornanni atorneqartussanngorlugit katersorneqarsinnaasut. Tamanna nutaaliornissamut aamma pisortat ammasuunissaannut paasiuminartuunissaannullu tunngaviuvoq.
- Piginnaasanik ineriertortitsineq aamma aningaasaliinernit iluanaarutit qulakkeerniarlugit suleriaatsimik ineriertortitsinerup aaqqissuussinernillu pisinermi misilitakkani katersineq paarlaasseqatigiinnerlu.
 - Pisortat ataatsimoorlutik periusaannik assigiissaarinerannillu sulineq, kiisalu suleriaatsimut aaqqissutaallu pisortani assigiinnngitsuni ataqtiginneri qulakkeerlugit.
 - Inatsisinut tunngasut atortorissaarutinik nutaanik atuinissamik tunngaveqarnerat qulakkeerlugu immikkoortumilu paasisaqarnermut iluaqutaalluni.
 - Qarasaasiaqarnikkut isumaqtigisiissutinik aqtsineq qulakkeerlugu Namminersorlutik Oqartussaniit pilersuisunut piumasaqaatit assigiissarneqarlutik.

2.2.3 Namminersorlutik Oqartussat aktiatigut ingerlatseqatigiiffii

Aktiatigut ingerlatseqatigiiffiit Namminersorlutik Oqartussanit pigineqartut tassaapput nunami aningaasaqarnikkut ingerlatsinerup tamarmiusup ilarujussui. Taakku sullissineri attaveqarnerit, nioqqutissanik pilersuinerit aamma tunisassianik avammut niuernikkut isertitaqarnerit qulakkeernerini peqataapput. Peqatigisaanik paasineqarsinnaavoq ingerlatseqatigiiffiit arlallit immikkoortuni annikitsuararsuarmik unammillerfiusuni ingerlataqartut tamatumalu ingerlatseqatigiiffiit sunniuteqarluartumik siunnerfeqartumillu aqunneqarnissaannik pisariaqartitsineq annertusillugu.

Ingerlatseqatigiiffinnik ineriertortitsinermi aaqqissugaasumik aqtsineq Namminersorlutik Oqartussat soqtigisaraat. Naleqquttumik iluanaarutinik akiliuteqartarneranik nalilersuinissamik tamanna periarfissiivoq, aamma aningaasartuutinut sunniuteqarluartumik ingerlatsinerup qulakkeernissaanut periarfissiilluni. Peqatigisaanik Namminersorlutik Oqartussanit kommuninillu aqunneqarlutik aallartinneqarsimasunillu suliniutinut allanut ataqtiginnerisa qulakkeernissaannut periarfissaqarpoq.

Ingerlatseqatigiiffik ataaseq suleqatigalugu 2011-mi aamma 2012-imikisitsisit najoqqutassat qulit toqqarneqarput (KPI-t). ingerlatseqatigiiffiit anguniagaat assigiinnngillat, tamannalu pissusissamisoorpoq, tassa ingerlatseqatigiiffiit assigiinnngilluinnartunik atugaqarlutillu niuernikkut ingerlataqarmata. Anguniakkaniipput aningaasaqarnikkut najoqqutassat aamma inuiaqtigiiinnut ajunngitsumik tapersiinissaq pillugu anguniakkat aalajangersimasut ataatsimullu isigalugu Namminersorlutik Oqartussat aktiatigut ingerlatseqatigiiffiit ingerlannerini siuliani taaneqartut soqtigisat ilaallutik.

Tabel 7: Nammminersorlutik Oqartussani pigineqartunut anginernut tallimanut aamma ilaanngakuusumik pigineqartuni ingerlatseqatigiiffinni kisitsisit pingaarnerit

	2008	2009	2010	2011	2012
Tele Greenland A/S (100 %)					
Ilanngaaseereerluni kaaviiartitat. mio. kr.	699	743	777	796	831
Akileraarutit kingorna ukiumi angusat mio. kr.	70	47	47	48	71
Sinneqartoortut procentinngorlugit	16	14	13	13	17
Nammineq pigisat pissarsissutiginerat %	8	6	6	6	8
Akiliisinnaassuseq %	48	46	46	47	51
Ilanngaaseereerluni taarsigassarsiat erniallit. mio. kr.	636	681	573	475	371
Royal Arctic Line A/S (100 %)					
Ilanngaaseereerluni kaaviiartitat. mio. kr.	847	789	831	897	864
Akileraarutit kingorna ukiumi angusat mio. kr.	6	19	29	73	6
Sinneqartoortut procentinngorlugit	2	3	5	13	1
Nammineq pigisat pissarsissutiginerat %	2	5	7	15	1
Akiliisinnaassuseq %	56	60	62	53	61
Ilanngaaseereerluni taarsigassarsiat erniallit. mio. kr.	77	-105	-184	-51	-272
KNI A/S (100 %) *					
Ilanngaaseereerluni kaaviiartitat. mio. kr.	2.282	2.105	2.174	2.537	2.468
Akileraarutit kingorna ukiumi angusat mio. kr.	-11	36	70	62	35
Sinneqartoortut procentinngorlugit	2	3	5	3	2
Nammineq pigisat pissarsissutiginerat %	4	4	8	7	4
Akiliisinnaassuseq %	37	56	52	53	47
Ilanngaaseereerluni taarsigassarsiat erniallit. mio. kr.	621	602	471	418	454
Air Greenland A/S (37,5 %)					
Ilanngaaseereerluni kaaviiartitat. mio. kr.	1.152	1.113	1.135	1.220	1.167
Akileraarutit kingorna ukiumi angusat mio. kr.	57	37	41	51	71
Sinneqartoortut procentinngorlugit	6	4	5	6	10
Nammineq pigisat pissarsissutiginerat %	11	7	7	8	11
Akiliisinnaassuseq %	51	53	55	50	53
Ilanngaaseereerluni taarsigassarsiat erniallit. mio. kr.	-116	-154	-179	35	-22
Royal Greenland A/S (100 %)					
Ilanngaaseereerluni kaaviiartitat. mio. kr.	5.136	4.740	4.249	4.724	4.976
Akileraarutit kingorna ukiumi angusat mio. kr.	-78	-196	-43	79	136
Sinneqartoortut procentinngorlugit	1	-2	2	4	5
Nammineq pigisat pissarsissutiginerat %	-9	-24	-4	10	16
Akiliisinnaassuseq %	23	22	22	22	27
Ilanngaaseereerluni taarsigassarsiat erniallit. mio. kr.	2.343	1.859	1.976	1.773	1.599

* KNI A/S-ip naatsorsutai kingullit (2012) suli akuersaerneqanngillat

Ilanngaaseereerluni taarsigassarsiat erniallit minusimiinnerat takutitsivoq suliffeqarfait akiitsunit ernialinnit

amerlanerusunik tigoriaannarnik aningaasaateqartut.

Paasissutissarsiffik: Naalakkersuisut Siulittaasuata Naalakkersuisoqarfia – Ingerlatseqatigiiffinnut Allattoqarfik.

Naalakkersuisut ukiut tamaasa nassuaat Inatsisartunut agguattarpaat, tassani ingerlatseqatigiiffinni killiffik nassuiarneqartarluni aamma ilaatigut anguniakkat isumaqtigiissutaasut naammassineqarsimandersut isiginiarneqartarlutik.

Takussutissiaq 4: Anguniakkanik naammassinninnerup aaqqissuunnera



Paasissutissarsiffik: Naalakkersuisut Siulittaasuata Naalakkersuisoqarfia – Ingerlatseqatigiiffinnut Allattoqarfik

2.2.4 Pisiortornermi ingerlatsineq

Namminersorlutik oqartussani qitiusumik pisiortortarfik 2013-imik sulisui amerlineqarput.

Namminersorlutik Oqartussani ingerlatsinermi aningaasartuutit appartinniarlugit Namminersorlutik Oqartussat tamakkiisumik pisiortornerat sunniuteqarluarnerusumik ingerlanneqassaaq. Tassani piumasarineqarpoq isumaqtigiissutit sappingnisamik pilerinartut qulakteerniarlugit Namminersorlutik Oqartussani isumaqtigiissusiorqarnissaa. EU-mik peqatigiinnissamik isumaqtigiissut naapertorlugu, suliffeqarfinit assigiimmik atorneqarsinnaasumik, tulluartumik, paasiuminartumik sunniuteqarluartumillu pisiortornermi ingerlatsinissamut Namminersorlutik Oqartussat pisussaaffeqarput.

2014-imut AIS-imik siunnersuutigineqarpoq pisiortornermut tunngasuni suliniutit sakkortunerulerneisa malitsigisaanik nalinginnaasumik sipaarniartoqassasoq. Sipaaruteqarnissaq angusinnaajumallugu naalakkersuisoqarfinni, aqutsisoqarfinni taakkualu sulliviini malinnilluarnissamut takutitsisoqassaaq. Nutaatut ilinniarnermi suliffimilu sungiusarnermi inissat pillugit pilersuisunut piumasaqaateqarnissaq pisiortornermik ingerlatsinerup qulakkiissavaa. Taamaaliortoqarpoq ilinniarnermi inissat pillugit ilinniartitaanermik ingerlatsinermi anguniagaq akuersaarniarlugu. Tamatuma saniatigut pisortat pisineranni inuuniarnikkut atasinnaassuseq akuersaarniarlugu pilersuisut SCR-imik (Corporate Social Responsibility) politikeqarnerat pisiortornermi ingerlatsinermi pingartinneqassaaq.

Pisiortornermut tunngasuni sipaarutit piviusunngortinneranni tunngavigineqarput:

- Qitiusumik Pisiortortarfuiup isumaqatigiissutaanik atuinissamut malinnilluartoqassaaq.
- Pisiortornermi isumaqatigiissutit immikkoortortanut tamanut nalunaarutigineqassapput.
- Qitiusumik Pisiortortarfik immikkoortuni arlalinni arlalinnut isumaqatigiissusiussaaq.
- Qitiusumik Pisiortortarfik akit pitsaanerusut pissarsiariniarlugit amerlanerusunik pinngitsoorani malitassanik isumaqatigiissusiussaaq.
- Pisiortortarnermi polikit immikkoortortaqarfiit tamarmik malissavaat.
- Immikkoortuni sinaakkutaasumik isumaqatigiissusiorfiusimanngitsuni neqeroorutit amerlanerusut pissarsiarinerisigut immikkoortortaqarfiit pitsaanerusumik unammillertitsissapput.
- Namminersorlutik Oqartussani kukkunersiuineq pisiortornermi isumaqatigiissutip naammassineqarneranik malitseqassaaq.

Aammattaaq CSR-imik politikiliortoqarnissaanut suliniuteqartoqarpoq, pisiniartoqartillugu CSR-imi piumasaqaatit ilangunneqarnissaat siunertaralugu, inuiaqatigiinnut iluaqutaasumik.

2.3 Akileraartarneq, Soraarerussutisiat, Ineqarnermut aamma Isumaginninnermut tunngasut

Immikkoortoq 1-imi taaneqartutut pisortat aningaasaqarnerat ukiuni aggersuni aningaasartuutitigut annertuumik tatisimaneqartussaapput. Naalakkersuisut taamaattumik arlalitsigut iluarsartuussiniarput, aningaasanik aqutsinermut atasinnaasumik qajannaannerusumik tunngaveqarnissamik qulakkeerisussamik. Iluarsartuussinerit Akileraartarnermut Atugarissaarnermullu Isumalioqatigiissitap inassuteqaataanit isumassarsiaapput, kisiannili ilaatigut ineqarnermut tunngasuni suli annertunerusumik misissuisoqassasoq Naalakkersuisut isumaqarlutik.

Iluarsartuussilluni sulineq pisortani ingerlataqarfinnik, annertuallaalersimasumik paasiuminaatsumillu, pisariaqartumik nutarterinermut atalluinnarpoq. Iluatsitsisumik nutarterineq taamaallaat kommunit sulisullu suleqatigeqqissaarlugit naammassineqarsinnaavoq.

Iluarsartuussinerit piviusunngortinnissaat sioqqullugu innuttaasunut ataasiakkaanut, inuussutissarsiorput inuiaqatigiinnullu tamarmiusunut qanoq sunniuteqarnissaat sapinngisamik erseqqissarneqarnissaat Naalakkersuisut sulissutigaat.

Aammattaaq sulinerup ingerlaqqinnerani pingarpoq iluarsartuussinerit sunniutaasa uuttorneqarsinnaanissaat. Uuttorneqarsinnaaneri kingusinnerusukkut iluarsartuussinernik nalilersuinernut tapersersuinermi atorneqassapput.

Immikkoortuni ukunani iluarsartuussinissamik sulisoqarpoq:

- Soraarerussutissiaqartarnermik iluarsartuussineq
- Isumaginninnermi tunniuttakkanik iluarsartuussineq

- Akileraartarnermik iluarsartuussineq
- Ineqnarnermut tunngasut assigiimmillu akeqartitsinermi iluarsartuussineq

2.3.1 Soraarnerussutissiaqartarnermik iluarsartuussineq

Nunasiartortut allanullu nunasiartortut amerlasuuneri maannakkut soraarnerussutissiaqarnikkut maleruagassatigut unamminartuupput. Ullumikkut soraarnerussutisiassanut ileqqaarnerit akileraarutitigut ilanngaatigineqartarput, tunniussinerillu taamaallaat Nunatsinni akileraarusersorneqarlutik, tigusisoq piffissami tunniussinerup nalaani nunami maani najugaqarpat. Maannakkut nunasiartornerit allanullu nunasiartornerit ilusaat taamaatsillugit soraarnerussutisianik tuniussinerit ilarpasui Nunatsinni akileraaruserneqassangillat, taamaattumillu aaqqissuussinermi tassani akileraarutitigut iluanaarutaasinaasut annertuut annaaneqarlutik. Soraarnerussitisiat akileraarusersornerisa allanngortinnissaat pisariaqarpoq, taamaalilluni maleruagassat pissutsinut piviusunut naleqqussarneqarlutik. Soraarnerussutisiat akileraaruserneqartarnerisigut iluarsartuussinissamut Naalakkersuisut suliaqarput. Soraarnerussutisiassanut akiliinermi maannakkut ilanngaatigisinnaaneri atorunnaarsinneqarnissaat iluarsartuussinermi siunniunneqarpoq aamma aningaasaatitigut iluanaarutinit allanit akileraarusersuinerup sukanganerulernissaanut atatillugu; soraarnerussutisianit iluanaarutit akileraarusersorneri.

Kalaallit Nunaanni, nunat allarpassuit assigalugit, innuttaasut ukiumikkut katitigaaneri malunnaatilimmik allanngortussanngorput. Inuiaqatigiinni utoqqaat amerlanerulissapput. Peqatigisaanik agguaqatigiissillugu ukiut inuuffiusut qaffassallutik. Kingunerisa ilaat tassaavoq soraarnerussutisianut aningaasartuutit qaffakkiartorneri. Tassunga ilanngutissaq utoqqarnik isumassuinermut, peqqinnissamut il.il. aningaasartuutit qaffakkiartorneri. Utoqqalinersiutitigut aaqqissuussineq aamma utoqqaat suliffeqarfinti atasinnaanerini periarfissaqalerterisigut arlalinnik unamminartoqarpoq. Utoqqalinersiuteqarnermut tunngasunik iluarsartuussineq naammassineqassaaq, ukiut inuuffiusartut ineriartorneri sillimaffigineqassallutik aamma utoqqaat inuussutissarsiorlutik ingerlataqarnerisa akilersinnaanissaa qulakkeerneqarluni. Tamanna inuiaqatigiinnut utoqqarmullu namminermut iluaqutaassaaq.

Aningaasaqarnikkut ilimagisat aamma pisariaqartippaat sapinngisamik amerlanerpaat nammineq soraarnerussutissiaqalernissaminnut ileqqaartarnissaasa qulakkeerneqarnissaa. Naalakkersuisut taamaattumik inuussutissarsiorsinnaasut tamarmik soraarnerussutissiaqalernissamut pinngitsooratik ileqqaartalersinniarpaat.

2013-imi ukiakkut soraarnerussutissiaqarnermik ingerlatseqatigiiffinnik allanillu attuumassuteqartunik oqaloqateqarnerit aallartinneqassapput iluarsaassinerit taakku pitsaanerpaamik qanoq naammaasineqarnissaat paasiniarlugu.

2.3.2 Isumaginninnermi tunniuttakkanik iluarsartuussineq

Akileraarutitigut aningaasalersorneqartut atugarissaarnermi tunniunneqartartut inuuniarnikkut aningaasaqarnikkullu atugarliornerpaat inuuniarnikkut atugaat pillugit toqqammavittut atorput aamma inuiaqatigiinni isertitatigut assigiinngissutsip naligiissarneranik qulakkeerinnillutik.

Atugarissaarnikkut tunniuttakkat ilaat innuttaasunut, utoqqalineq, innarluuteqarneq assigisaanillu peqquteqarlutik nammineq pilersorsinnaanngitsunut periarfissiinissamik siunniussaqarput.

Assersuutigalugu siusinaartumik soraarnerussutisiaqarnermik aaqqissuussineq inuiaqatigiit atugarissaartut isumaginninnikkut isumannaallisaanerit ilagaat aamma innuttaasut inuussutissarsiorsinnaanikkut ataavartumik apparsimasut aningaasaqarnikkut isumannaatsuunissaannut qulakkeerinnilluni.

Siusinaartumik soraarnerussutisiaqarnermik aaqqissuussinerup inuit sulisinhaassuseqanngitsut pilersuinissamut tunngaveqarnissaat qulakkeerpaa. Aaqqissuussinerli pisut ilaanni naleqqutingilaq, tassa siusinaartumik soraarnerussutisiaqartoqarmat killeqartumik sulisinhaassuseqartunik, suliffeqarfinni peqataasinnaasunik – ullup ilaannaani imaluunniit nakkutigineqartumik sulisinhaasut. Siusinaartumik soraarnerussutisiaqarnermik aaqqissuussineq taamaalilluni pitsaanerulersinnaavoq, annerusumik inuit sanngiinnerpaat qulakkeerusullugit, peqatigisaanillu sulinermi peqataasinnaasunngorlugit ataasiakkaanut suliniutit nukittunerulersillugit. Atuagarissaarnikkut tunniuttakkat allat siunertaqarput ataasiakkaat sapingisamik imminut pilersornissaannut ikiuinissamik peqatigisaanillu aningaasaqarnikkut isumannaatsuunissaat qulakkeerneqarluni. Ullumikkut aningaasaqarnikkut isumannaallisaanerit aamma nammineq ilaqquttanillu pilersuinissamut kajumissaatit akornanni oqimaaqatigiittoqarnissaa ajornartorsiutaavoq. Misissuinerit takutippaat pisuni arlalinni sulinermi imaluunniit annertunerusumik sulinermiit atugarissaarnermi tunniuttakkanik pisartagaqarneq aningaasaqarnikkut iluaqutaanerusoq. Tamatumunnga ilaatigut pissutaavoq atugarissaarnikkut tunniuttakkat assigiinngitsut aamma akileraartarnerit akornanni ataqtigiinnerit atorneri. Misissuinerit aamma takutippaat pisuni ataasiakkaani innuttaasunut, piviusumik pisariaqartitsinngitsunut, atugarissaarnikkut tunniuttakkanik tunniussisoqarsimasoq. Paarlattuanik kikkut tamarmik pilersuinissamut pisariaqartitsisut atugarissaarnikkut tunniuttakkanik pisartagaqartariaqartut pisinnaatitaaffeqartullu pissarsinissaannut qulakkeerisoqanngilaq. Tamatumunnga ilaatigut pissutaavoq missiliuilluni piumasaqaatit malillugit tunniuttakkat ilaasa tunniunneqartarneri.

Isumaginninnermi atugarissaarnikkut aaqqissuussineq ukiut ingerlanerini ineriartorsimavoq. Ineriartornerup inernerisimavaa paasiuminaatsumik aaqqissuussisoqarnera, annertuumik misissorneqartariaqartoq, aaqqissuussineq aaqqissuussinerillu ataasiakkaat, maannakkut inuiaqatigiinni piumasaqaatinut naammassinnituunerisa qulakkeerneqarnissaat siunertaralugu.

Iluarsartuussinermi aallaavigineqassaaq ataasiakkaat namminneq ilaquettarminnillu pilersorsinnaanerisa imminut akilersinnaanissaa. Aamma atugarissaarnikkut aaqqissuussinerit assigiinngitsut akornanni ingerlalluartumik ataqtigiittoqassaaq pingartumik akileraartarnikkut aaqqissuussinermi.

Tunniuttakkani akigititaniluunniit allannguutit ataatsimut sunniutaat naatsorsorneqarsinnaasunngorlugit misissorneqarsinnaasunngorlugillu aqqissuussinermik ineriaartitsinissaq siunertaralugu nunamit tamarmiit nalunaarsukkanik katersilluni sulineq aallartinneqarpoq. Nalunaarsukkanik nassiuissineq pillugu kommunit suleqatigineqarput, misissuilluni sulineq 2014-p aallartinnerani aallartissasoq naatsorsuutigineqarluni.

2.3.3 Akileraartarnermik iluarsartuussineq

Akileraarutit aallaaviatigut inuiaqatigiit atugarissaartut aningaasalersornerat qulakkiissavaat. Akileraarutit inuiaqatigiinnut pingaaruteqarneri iluanaarutit sunniutaat taamaallaat aallaavigalugit nalilersorneqarsinnaanngillat. Kisianni aamma akileraarutit innuttaasut suliffeqarfiiillu pissusaannut qanoq sunniuteqarneri eqqarsaatigineqartariaqarluni. Sulinermi qaffasissumik akileraaruteqarneq assersuutigalugu sulinermi neqeroorutinut sunniuteqarpoq.

Maannakkut akileraartarnikkut aaqqissuussinerup aaqqissugaanera ajornartorsiortitsivoq. Maannakkut akileraartarnikkut aaqqissuussinermi arlalinnik ilaatisisoqanngilaq, putoqarluni ilanngaateqarnissamullu periarfissaqarluni. Tamanna inuit akileraarutaanni aamma inuussutissarsiortut akileraarutaanni atuuppoq. Peqatigisaanik sulinermit isertitanik akileraarusersuineq allanut naleqqiullugu qaffasippoq, tamatumalu sulineq tunisassiornerlu kigaallisillugit, aningaasaatinillu iluanaarutinut arlalinnut inortuulluni imaluunniit appasilluni, tamanna pissutigalugu assersuutigalugu aktiani obligationinilu aningaasaatitigut ajunngitsorsiani aningaasaliinissamut kajumissuseqartoqarluni.

Tulluarnerpaamik isertitat assigiimmik qaffasissuseqartumik akileraaruserneqartariaqarput, sulinermiit imaluunniit aningaasaatitigut aningaasaliinerniit pisuunerri apeqquataatinnagit. Sunniuteqartumik akileraarusersuinerri piviusumik assigiinngitsoqartillugu akileraarutitigut eqqarsarnissamut pilerilersitsisoqarpoq equngalersitsinernillu pilersitsisoqarluni. Assigiinngissutaasulli ilaasa pinngitsoortinnissaat paassiuminaatsorujussuusussaavoq, kisianni assigiinnginnerit annikillisinneqarnissaannut tunngavissaqarpoq.

Akileraartarnikkut aaqqissuussineq aamma oqimaaqatigiissaq illuani ullumikkut pissutsinut naammassinnitunik maleruagassat kissaatigineqartut aamma ajornartorsiuterpassuit assigiinngitsut isumagineqalutik, aappaanilu isumalluutit killeqarlutik, akileraartarnikkut suliassap naammassinissaanut inuit ikittuinnaallutik. Ullumikkut akileraartarnikkut aaqqissuussineq akisuvoq aqussallugulu oqimaalluni piginnaasatigullu nikinganermik sunnerneqarsimalluni.

Ukiuni aggersuni Nunatsinni nunat allamiut annertuunik aningaasaliisinnaanerannik ilimagisaqarnerup inuussutissarsiortut akileraartarnerannik aaqqissuussinerup ineriaartortinnissaanik pisariaqartitsilerpoq, pitsaassutsikkut aningaasaqarnikkullu nunanut allanut unammillersinnaalluartumik. Sulineq taanna salliutinneqassasoq, Naalakkersuisullu taamaattumik allaffeqarfik qinnutigisimavaat.

Inuit akileraarutaannik iluarsaassineq ilaatigut isumaginninnermut tunngasutigut iluarsaassinermut ataqatigiissarluarneqassaaq, taamaalilluni ullumikkut ataqatigiinnerisigut ajornartorsiutit naleqquatumik aaqqinnejarlutik.

2.3.4 Ineqarnermut tunngasut

Inissiamik attartornermiit piginnittuunissamut kajumissaaneq nukitorsarneqassaaq. Taakku saniatigut ineqarnermut tunngasuni tapiissutit misissorneqassapput tapiissutit inunnut annertunerpaamik pisariaqartitsisunut tuttarnissaat qulakteerniarlugu. Aammattaaq ineqarnermut, isumaginninnermut akileraartarnermullu tunngasuni ataqatigiinnerit qanoq pitsaaninngortinneqarsinnaanersut misissorneqassaaq.

Ineqarnermut tunngasuni tapiissutinik misissuineq taamaattumik isumaginninnermi pisartakkat aamma akileraartarnermut tunngasut misissornerinut atatillugit isagineqassapput.

2.3.5 Innaallagiamut, imermut kiassarnermullu akeqartitsinernik iluarsartuussineq

Aningaasanut inatsisikkut Nukissiorfinnut tapiissutit 2011-mili ukiumut 10 mio. kr.-inik ikilineqartarput. Tapiissutit atuukkunnarsikkiartorneri Naalakkersuisut nangikkusuppaat.

Maannakkut akitigut aaqqissugaaneq aqqutigalugu allatut agguasseqqittarneq naleqqunnersoq pillugu misissuisoqarnissaanik pisariaqartitsisoqarpoq, taamaattoqassappallu naleqqutinngitsortai qanoq iluarsineqarsinnaanersut, peqatigisaanik isumaginninnikkut suliffeqarnikkullu kingunissai sillimaffigineqassallutik.

Akitigut aaqqissugaanerup allangortinneratigut assersuutigalugu avatangiisinut eqqortumik atuisut pissuseqarnerat siuarsarneqarsinnaavoq aamma inuiaqatigiinni siuariarnermik ineriaartornermillu pilersitsilluni. Pingaaruteqaporli allangortitsinissaq inooqataasunut oqimaqatigiittuunissaa aamma isorliunerusuni atukkat ineriaartornissamut perarfissat eqqarsaatigineqarlutik, taamaalilluni akitigut aaqqissugaaneq nutaaq suliffeqarnikkut aamma inuiaqatigiinni annikinnerusuni atukkanik ajorseriartitsinani.

Innaallagiaq, imeq kiassarnerlu pillugit akitigut aaqqissugaanermik misissuineq aallartissasoq Naalakkersuisut aalajangiuppaat. Misissuineq isumaginninnermi tunniuttakkatigut aamma akileraartarnermut tunngasutigut iluarsartuussinerit aamma ineqarnermut tunngasunik misissuinerit pillugit eqqarsaatinut atatinneqassaaq, taamaalilluni aningaasaqarnikkut innuttaasunut kingunissanik ataatsimut nalilersuineq matumani pineqarnissaa qulakteerneqarluni.

2.3.6 Aaqqissuussineq

Naalakkersuisut imatut piffissaliineq sulissutigaat:

UKA 2014: Soraarnerussutisiaqarnerit inuussutissarsiutinullu akileraarusiisarnernik iluarsartuussineq

2014: Ineqarnermut tunngasunik aamma innaallagiaq, imeq kiassarnerlu pillugit akitigut aaqqissugaanermik misissuineq paasinianerlu

2015/2016: Isumaginninnikkut tunniuttakkat aamma inunnik akileraarusersuinermik iluarsartuussineq

Isumaginninnermut akileraartarnermullu tunngasutigut iluarsartuussilluni sulineq kiisalu ineqarnermut aamma innaallagiaq, imeq kiassarnerlu pillugit akitigut aaqqissugaanermik misissuineq paasiniaanerlu Aningaasaqarnermut Nunamullu Namminermut Naalakkersuisoqarfimmi tunngaveqassapput. Naalakkersuisoqarfiit allat sulinermi annertuumi ilaatinneqassapput sulisutigut aningaasaqarnikkullu.

Iluarsartuussinerit piareersarnerinut ukioq naallugu sulisut tallimat-qulit atorneqarnissaat ilimagineqarpoq.

Iluarsartusseqqinnermik suliaqarnerup iluatsitsilluni ingerlannissaanut pisariaqarpoq immikkoortuni ataasiakkaani iluarsartusseqqinnerit allangunnerillu qulliunerusumik ataatsimoortitsinermut ilaanissaat, taamaalilluni aningaasatigut, suliaqarnermi politikkullu anguniakkat pingarnerit ingerlaavartumik isiginiarneqartussaallutik. Pingaaruteqarluinnarpoq peqataasut attuumassuteqartut tamarmik ilanngutitinnissaat suliarinninnerullu ingerlaqqinnerani kinguneqartussamik tapersiillutik. Ilaatigut tassani pineqarput kommunit suliffiutillit, kisianni aamma immikkoortuni taakkunani inuiaqatigiinni unamminartunngortussanik aaqqiissutissanik neqerooruteqarsinnaasut allat qaaqquneqarlutik.

2.3.7 Iluarsartuussinerit sunniutaat

Kingunissaasa immikkuualuttortaat misissoqqissaarsinnaajumallugit nalunaarsugarpassuarnik katersinissaq pisariaqarpoq, tassunga ilanngullugit kommuniniit isumaginninnermi tunniuttakkat nuussisarnerillu. Suliarinnineq taanna taaneqareersutut aallartinneqarpoq. Kommunit suleqatigalugit siusinaartumik soraarnerussutissaqartut, ineqarnermut akiliutinut tapiissutit, meeqqanut tapiissutit il.il. pillugit nalunaarsugaasivimmik piareersaasoqassaaq, taamaalilluni iluarsartuussinerit immikkuualuttortaat misissorneqarsinnaalerlutik.

Iluarsartuussinerit assigiinngitsut sunniutaat aningaasaqarnikkut pissutsinut pingaaruteqassapput, kommunini Namminersorlutik Oqartussanilu. Pissutsit taakku ingerlaavartumik kommunit peqatigalugit oqallisigineqassapput missingersuutitigut aningaasaqarnikkullu ingerlatsineq atasinnaasoq siunertaralugu. Tassunga atatillugu iluanaarutit kommunit akornanni qanoq aggarneqarnissaannut periusissamik ilusiliortoqassaaq.

Maannakkut naliliisoqarpoq pisortat ingerlatsinerannik nutarsaaneq kiisalu soraarnerussutisiaqartarnermi, inunnik isumaginninnermi akileraartarnermilu nutarsaanermi suliniuitit 2015-imi 10 mio. kr.-inik, 2016-imi 112 mio. kr.-inik aamma 2017-imi 173 mio. kr.-inik isertitsissutaassasut, taakkulu kontumi pingarnermi 20.11.51-imi, Iluarsartusseqqinnermi suliniuitit sunniutaat, ilanngunneqarput.

Iluarsartuussinerit aningaausatigut sunniutaat tamarmik ukiuni aggersuni misissoqqissaarneqassapput aningaausatigut aqutsinerup atasinnaasup qulakkeerneqarnissaa siunertalarugu.

2.4 Sanaartorneq

Sanaartukkatigut nuna tamakkerlugu ataqtigiissumik pilersaarusiornissaq pisariaqartinneqarpoq. Kommunit kattussuunneri kommunini sanaartukkanik pilersaarusiornermut tunngavinnik nutaanik pilersitsipput, aatsitassarsiornermilu pilersaarutissat nunaminertat atorneqarnerinut kinguneqartitsisussaallutik. Nuna tamakkerlugu pilersaarusiorneq inuiaqatigiinni ataatsimoortumik naliliinermik aallaaveqassaaq, pinngortitamik illersuisoq, inuussutissarsiornikkut, inooqataanikkut avatangiisitigullu iluaqtaasumik ineriarnermik siuarsaasoq aamma nunaminertanik atuinermik pilersaarusiornermi innuttaasunik akuutitsisussaq. Peqatigisaanik sanaartukkatigut aningaasaqarnikkullu pilersaarusiorerit ataqtigiissumik aaqqissuunneqassapput.

Naalakkersuisut taamaattumik aalajangerput ingerlataqarfinnut pilersaarusiortoqassasoq, ukiunut qulinut sanaartornermut pilersaarutinik imaqaqtunik, ingerlataqarfinnik naalakkersuinikkut ingerlatsinermi anguniakkanut tapersersuisunik. Siunissamut ungasinnerusumut pilersaarusiornermi innuttaasuni ukiutigut katitigaanikkut nuttarsinnaanikkullu ineriartornissatut naatsorsuutigisap sillimaffiginissaa immikkut pingaaruteqarpoq.

Ingerlataqarfinni pilersaarutit kommunit suleqatigalugit Namminersorlutik Oqartussani naalakkersuisoqarfinnit ataasiakkaanit suliarineqassapput. Ineqarnermut, Pinngortitamut Avatangiisinullu Naalakkersuisoqarfimmi Nuna tamakkerlugu pilersaarusiorfik aamma Aningasaqaqarnermut Nunamullu Namminermut Naalakkersuisoqarfik ingerlataqarfinni periusissat ataasiakkaat piareersarneranni peqataatinneqassapput aamma ingerlataqarfinni assigiinngitsuni pilersaarusiornerup tamakkiisuunissaataqatigiinnissaalu qulakkiissallugit.

Inissianik, attaveqarfinni pisortallu sullissiviinik aserfallatsaaliuinerup naammassiniarneqarnerani inuaqatigiinnut tamarmut annertuumik suliassaqarpoq. Pisuni arlalinni aserfallatsaaliuineq ajoraluartumik imminut akilersinnaajunnaarsimavoq, tassa illut nungullarsimammata imaluunniit allatut atorneqarsinnaanngimmata. Pingarnertigut isigalugu taartissanik illuliornermut aningaasat amerlavallaartut atorpavut, tamannalu sanaartornermi aningaasanik kinguneqarluartumik atuinerunani.

Nuna tamakkerlugu aserfallatsaaliuinerup pitsaanerunissaanik pisariaqartitsisoqarpoq, sumiiffiilluarlallit aamma nutaamik sanaartortoqarnissaanik pisariaqartitsivillutik. Naalakkersuisut politikiat tassaavvoq immikkoortunut pisariaqartitsisunut sanaartornermi aningaasat salliuinneqassasut, kisiannili aamma pingaarpoq nuna tamakkerlugu ingerlatat agguarneqarnissaat. Sumiiffinnipisariaqartitsinermik nalilersuineq kommunit oqaloqatigeqqissaarlugit ingerlanneqassaaq. Namminersorlutik Oqartussat aamma kommunit siunissami suleqatiggiinnissamut

isumaqatigiissutissaannut iternga tikillugu nalunaarusiassami taamaalilluni sanaartornermut tunngasuni suleqatigiinnerulernissaq ataqatigiissaarinerullu nukitorsarnissaa siunniunneqarput.

Oqummik ajornartorsiuteqalernermut annertuumik siusinnerusukkut aserfallatsaaliuusimannginnerit annertuumik pissutaapput, tamannalu pissutigalugu 2014-imut Aningaasanut Inatsisissatut Siunnersummi taartissatut illuliorerit salliuinneqarnissaat pisariaqarsimalluni. Tamanna pisariaqarpoq inissiat amerlassusiisigut ikilinnginnissaat qulakkeerniarlugu, inissiani attartortittakkani najugaqartut peqqissutsikkut ajornartorsiuteqalissanngimmata, pisortat sullissiviinik atuisut toqqissimasumik taakkuninnga atuisinnaassammata, aamma pisortat suliffeqarfii sulisunut peqqinnissakkut ajoqsiissanngimmata.

Kommunit suleqatigeqqissaarlugit aserfallatsaaliuinermut ajornartorsiutit annertuut isumagineqarnissaat qulakkeerneqassaaq. Suliniutit aaqqissuunneqarneri ataqatigiissaarnerilu pitsaanerulersinnerisigut taartissanik illuliornissamut pisariaqartitsineq siunissami ungasinnerusumi annikillisinneqarsinnaavoq. Aserfallatsaaliuinermi ajornartorsiutit annertuut aamma isumaqarput ingerlataqarfinni naalakkersuinikkut ingerlatsinermi anguniakkanit aallaaveqartut sanaartornikkut aningaasaliinerit naammassineqarnissaannut pisortat aningaasatigut atugassaat ikittuinnaasut. Aserfallatsaaliuinissamut ajornartorsiutip annikilliartornera naapertorlugu anguniakkanut taakkununnga tapersersuisunik aningaasanik amerlanerusunik immikkoortitsisoqarsinnaavoq.

Naalakkersuisut politikiat tassaavoq sanaartornermik nalinginnaasumik ingerlataqartuni allanngorartunngitsumik ineriartornissaa qulakkeerniarlugu pisortat sanaartornermi ingerlataat sapinngisamik atorneqassasut. Taamaattumik sulisoqarnikkut sunniutinik nalilersuisoqassaaq, nunap immikkoortuini nunalu tamakkerlugu, ukiumoortumik sanaartornermi pingaarnersiuinermut atatillugu. Ingerlatat qaffasiffiini allanngoranngitsumik ineriartorneq siumullu nalunanngereernerri suliaqarfimmur tamarmut iluaquataassaaq, pingaartumillu sumiiffinni sanasunut suliffeqarfinnullu mikinerusunut, atorfinititsinermut soraarsitsinermullu atatillugu allanut naleqqiullgu annertuunik aningaasartuuteqartartunut. Naalakkersuisut aamma siunertaraat pisortat sanaartorneri inuuusuttunut ilinniartunut lærlingitut inissarsinissamut periarfissat pitsaanerulernissaat. Taamaattumik Naalakkersuisut siunnersummi Inatsisartunut saqqummiussiniarput, lærlinginit atuinermut piumasaqaatit sukaterneqarlutik.

2.4.1 Aningaasaliineq pillugu ilitsersuut

Inuiaqatigiit aningaasaqarnerannut kingunik nalilersuinermi ilitsersuut suliarineqarpoq, tamanut ammasumik tusarniutigineqartoq siunertarlu tassaalluni siunissami annertunerusunik aningaasaliinissamut aalajangiinerit ilaatigut ilitsersummi tunngaviit aallaavigalugit misissuinernik tunngaveqassasut. Ilitsersuutip inaavinnera ilimagineqarpoq 2013-imi ukiap ingerlanerani tamanut saqqummiunneqarsinnaasoq.

Ilitsersummi siunertaq tassaavoq inuiaqatigiit aningaasaqarnerannut kingunik nalilersuinernik piareersaanermut piumasaqaatinik aalajangersimasumik allaaserinninneq, taamaalillunilu ilaatigut

pilersaarutit ataasiakkaat nalilorsornerinut ilaatigullu aningaasaliinissamut periarfissat assigiinngitsut assersuussinnaanerinut aaqqissugaasumik pulaffeqarluni.

Inuaqatigiit aningaasaqarnerannut kinguninik nalilersuineq pitsaasoq pilersaarummi – iluaquutasunik ajoquatasunillu – sunniutit erseqqissumik takuneqarsinnaalissapput. Inernera politikikkut pingarnersiuinermi ataatsimut aalajangiinissamut tunngavissaqarnermut iluaquataassaaq. Inuaqatigiit aningaasaqarnerannut kinguninik nalilersuinernik atuiuarnikkut pilersaarutit politikikkut takorluukkanut naapertuunnerannik politikikkut aalajangiisartut nalilersuinissaat ajornannginnerulersissavaa.

Ilitsersuut misissuinernik sisamanik tunngaveqarpoq: inuaqatigiit aningaasaqarnerannik misissuineq, missingersuutitigut aningaasanik misissuineq, inooqataanikkut avatangiisitigullu isumannangitsuunermik misissuineq kiisalu nunap immikkoortuini nunalu tamakkerlugu ineriartorermik misissuineq. Misissuinernit siullit marluk sunniutit annertussusilerpai naliinillu inissiillutik, soorlu inuaqatigiit aningaasaqarnerannik misissuinerni tamanna ileqquusartoq. Misissuinerni kingullerni marlunni inernerit kingunissaat, naliisigut inissinneqarsinnaanngitsut, pitsaassutsikkut allaaserineqarput, kisianni aamma ataatsimoortumik aalajangiiniarnermi pingaaruteqarsinnaallutik.

Aningaasanut inatsisini ataatsimoortumik pingarnersiuinerni ilaasussanik aningaasaliinissamut maannakkut periarfissanik arlalinnik peqareerpoq. Siunertaq tassaavoq, ukiumi tulliuttumi aningaasanut inatsimmut sunniuteqartussat, pisortat annertunerusumik aningaasaliinerinik misissuinernit inernerri kingusinnerpaamik majip aallaqqataani pigineqartassasut, taamaalillutik Aningaasanut Inatsisissatut Siunnersuusiornermi ilanngunneqarsinnaallutik. Taamaattumik Kujataani mittarfik nutaaq pillugu inuaqatigiinnut aningaasaqarnikkut kingunissanik misissuinermik sulineq maannakkut aallartinneqareerpoq.

2.4.2 Nuummi Umiarsualivik

Nuummi umiarsuarnut containerinik assartuisunut talittarfiup nutaap sananeqarnissaa pillugu UKA2013-imut aalajangiinissamut siunnersuut Naalakkersuisut nassiutissavaat. Inatsisartuni suliarineqareerpat pilersaarutaavoq Namminersorlutik Oqartussat 100 %-imik pigisaannik aktiatigut ingerlatseqatigiiffimmik pilersitsisoqassasoq, taassumalu umiarsualiviup nutaap sananeqarnera ingerlanneqarneralu aqussavaa. Naalakkersuisut aalajangiinissamut siunnersuutaanni umiarsualivik nutaaq 2016-imi atorneqalernissaminut piariissasoq ilimagineqarpoq. Aalajangiiffigisassatut siunnersuutip Inatsisartuni akuerineqarnerata aamma kingunerissavaa 2014-imi aktiatigut ingerlatseqatigiiffimmik aningaasaliisoqassasoq. Taamaattumik 2014-imut Aningaasanut Inatsisissatut Siunnersuutip suliarineranut atatillugu IST-mut sunniuteqannngitsumik allanguutissatut siunnersuuteqarnissaq pisariaqarsinnaavoq.

Umiarsualivimmik nutaamik pilersitsinikkut ukiut 20-t matuma siornatigut containerit atorneqalersinnerisa assinganik nassiussanik assartuinerup pitsanngorsarnissaa aqqutissiuunneqassaaq. Tunngaviusumik attaveqaatinik pitsanngortitsineq nunamut tamarmut

iluaqutaassaaq. Illoqarfimmut allamut aqqusaarluni nassitsinermi piffissat sivikinnerulerterisigut, unammilleqatigiinnermi pitsaanerusumik atugassaqalernikkut aamma pitsasumik nassiussanik assartuinerup qulakkeerneqarneratigut. Nuummi umiarsualiviup allilerneqarnissaq pillugu aalajangiinissamut siunnersuutaasussami umiarsualiveqarnermut tamarmut pingaarutilimmik najoqquassiisoqassaaq, tassungalu peqatigitillugu assartueriaatsimut nutaamut tapersiisumik umiarsualivinnut aningaasaliinissaannut ataatsimut pilersaarut suliarineqassaaq, tamatumani Nuuk umiarsuakkut nassitsinermi qitiussalluni.

2.4.3 Mittarfiit pingaarnertigut aaqqissugaanerat

Mittarfiit ilaasa allineqarnissaat pilersinneqarnissaallu ullumikkut pisariaqartitsisoqarsinnaavoq. Taamaaqataanik mittarfiit aalajangersimasut atorunnaarsinnerini aningaasaqarnikkut iluanaaruteqartoqarsinnaavoq. Mittarfiit pingaarnertigut aaqqissugaanerini siunissami allannguinissamut periarfissanik akornusiisinnaasunik aalajangiinerit pinngitsoortinniarlugit mittarfiit aaqqissugaaneri qulaaniit ammut eqqarsaatigineqassapput. Taamaattumik siuniussami arlantikoq qulaalluni timmisartunut mittarfissap inissinneqarnera pillugu pingaarnertigut pilersaarusrorluarnikkut aalajangiisoqarnissaq siunertalarugu mittarfeqarnikkut aaqqissugaanerit assigiinngitsut nassaarinissaannut nalilersuilluni sulineq aallartinneqarpoq.

Pingaarnertigut periusissaq pillugu aalajangiisoqarpat siunissami angallannerup ilusissaanut toqqammavissanik inissisoqassaaq taamaalillunilu sumiiffinni mittarfinni aningaasaliinissanik nalilersuinissaq pingaarnersiuinissarlu aamma.

Ingerlataqarfinni pilersaarut mittarfinnut allanut pilersaarutaasinnaasut ilangutissavai, soorlu Assartuineq pillugu Ataatsimiitaliarsuup isumaliutissiissutaani saqqummiunneqartoq. Ingerlataqarfinni pilersaarut inaarutaasoq ukiup tulliuttup ingerlanerani piareersarneqassasoq ilimagineqarpoq 2014-lu ingerlanerani tamanut saqqummiunneqassalluni.

2.4.4 Qaqortumi Mittarfik

Assartuineq pillugu Ataatsimiitaliarsuaq Kujataani inunnik angallassinermik 2011-mi misissuivoq. Inerniliineq tassaavoq Qaqortup eqqaani mittarfimmik nutaamik pilersitsineq inuiaqtigit aningaasaqarnerisigut imminut akilersinnaassasoq, Narsarsuup matuneqarnissaq naatsorsuutigalugu, aamma Kujataani ilaasunik angallassineq ataatsimut isigalugu pitsaanerulersinneqarpat. Aningaasaliineq ataasiinnaq annertooq tassaavoq Qaqortup eqqaani mittarfimmik pilersitsisinnaaneq. Aningaasaqarnikkut illersorneqarsinnaasumik, ataqtigiiqsumik sunniuteqarluartumillu assartuinermi aaqqissuussinissaq qulakkeerniarlugu nunap immikkoortuanitamaani illoqarfiiit anginerit akornanni aqqusinikkut/angallatikkut atassuteqartariaqarneq nunap immikkoortuanut pilersaarummi tamarmiusumi ilanngunneqartariaqarpoq.

Qaqortup eqqaani mittarfik aamma Narsarsuup mittarfiata annikillisinneqarnera arlalinnik pitsasoqarlunilu akornutissartaqarpoq, naligiimmik agguarneqannngitsunik.

Mittarfimmik pilersitsisinnaaneq pillugu aalajangiineq uku eqqarsaatigalugit pisariaqarpoq:

- Aningaasaliineq Kujataanut, Kujataaniit Kujataatanilu ilaasunik angallassinermut toqqammavinnik pitsaanerusumik pilersitsinermut iluaquaassaaq. Ilaasunik angallassinermi pitsanguutit annerusumik toqqaannartumik aningaasartuititigut (bilitsit akii) kiisalu toqqaannanngitsumik aningaasartuititigut (assersuutigalugu piffissaq angalaffiusoq tamarmiusoq aamma akulikissuseq) uuttorneqassapput.
- Aningaasaliineq aaqqissuuusineq aamma inuussutissarsiuutitigut isiginninneq aallaavigalugit ineriartortitsinermi takorluugaasinnaasunut naleqqiullugu siunissamut qulakkeerneqarsimassapput. Aningaasaliineq Kujataani nunap immikkoortuanut tapersersuissaaq.
- Aningaasaliineq – aamma aningaasalersuineq – naalakkersuinikkut piumasaqaatit aamma akitsoqalermermi tunngaviit aallaavigalugit nalilersorneqassaaq.
- Aaqqissuussaanikkut aaqqissuuussineq inuiaqatigiinni tunisassiorsinnaassuseq siuarsassavaa. Ingerlataqartut niuererpalaartumik pissusilersornissamut kajumissuseqassapput, taamaalilluni ilaasunik angallasssinermi tamarmiusumi periarfissaq pitsaanerpaamik iluaqutigineqarluni.

Mittarfiit pillugit Inatsisartut inatsisaat nr. 12, 5. december 2008-meersumi mittarfiup nutaap pilersinnissaanut piumasaqaatit sukumiisumik allaaserineqarput. Qaqortup eqqaani mittarfimmik aningaasaliinermi inatsisitigut piumasaqaatit taakku eqqortinnejassapput, soorlu aamma inuiaqatigiit aningaasaqarneranni kingunissanik nalilersuinermut tunngaviit malillugit misissuisoqassalluni, siuliani immikkoortoq takujuk.

Naliliisoqarpoq Qaqortumi nunap immikkoortuani mittarfimmik pilersitsisinnaaneq pillugu aalajangiineq atlantikoq qulaallugu timmisartunut mittarfiup inissinnissaa apeqquataatinnagu isigineqassasoq, tassani siumut sammisumik aamma Kujataani nunap immikkoortuani mittarfimmik pingaarnermik pisariaqartitsisoqartussaammat.

Taamaalilluni siunertaavoq 2015-imut Aningaasanut Inatsisip piareersarneranut atatillugu Qaqortup eqqaani mittarfimmik aningaasaliisinnaaneq pillugu aalajangiisoqarallarsinnaasoq.

2.5 Inuussutissarsiorneq suliffeqarnerlu

Naalakkersuisut siunertaraat inuussutissarsiortnunut pitsaasunik toqqammaveqarnissaq siunertalarugu inuussutissarsiornikkut pimoorussisumik politikimik ingerlatsinissaq taannalu aqquqarneqassasut aamma inuussutissarsiornermi unammilleqatigiinneq nukitorsarlugu. Inuussutissarsiornermut attaveqarnermullu tunngasuni tamani aningaasat tapiissutaasartut ineriartortitsissapput, sunniuteqarluarlutik aamma unammilleqatigiinnermi equngalersitsinatik.

Inuussutissarsiuutnik siuarsaanerup nutaap 2011-mi ukiakkut ataatsimiinnermi akuerineqarneratigut Naalakkersuisut inuussutissarsiuutnik siuarsaanermi suliniutinut anguniakkanik aalajangersaapput. Anguniakkat taakku aalajangersimasumik piviusunngortinneri kiffartuunneqarnissamik isumaqtigiissutnik takuneqarsinnaapput, taakku aatsitassatigut annertuumillu suliatigut pilersaarutit pillugit Visit Greenlandimik, Greenland Businessimik aamma Rambøllimik isumaqtigiissutaallutik.

Inuussutissarsiuutnik siuarsaanermi nutaami ingerlataqarfinnut agguardeqartumik inuussutissarsiortunik siunnersuineq aamma aningaasaatinik pissarsiniarnerup piukkunnarsarnera isiginiarneqarput. Kommunini inuussutissarsiuutnik ineriertortitsinermi suliniutinik tapersersuisumik ingerlataqarfinnut immikkut tunngasunik inuussutissarsiortunik siunnersuinermi aallarnisaasut, siuariartorneq, nutaaliorneq aamma tunisassiorsinnaassutsip annertusinera isiginiarneqarput. Immikkoortut isiginiarneqartut ilaatigut tassaapput aatsitassat, takornariaqarneq aamma inuussutissat.

2.5.1 Nunatsinni suliffeqarfiiit aatsitassarsiorfinnut piginnaanngorsarneri

Aatsitassarsiornermik ingerlataqarnerup inuussutissarsiuttit napatitsisunngortinnissaa pillugu Naalakkersuisut anguniagaqarput. Taamaattumik 2012-imik aamma 2013-imik siunnerfeqartumik suliniutit ingerlanneqarput, sumiiffinni suliffeqarfiiit piginnaasaannik pikkorissaanissamik ineriertortitsinissamillu siunertaqartoq, taamaalillutik aatsitassarsiorfinnut pilersuisutut piginnaasaqalerlutik. Taamatut suliniut pingaartinneqartoq annertuumik ingerlataqartunut aatsitassarsiornermilu pilersaarutinut pilersuisunngornissamik kissaateqartunut sumiiffinni suliffeqarfinnut immikkut siunnersuinissaq pillugu kiffartuunneqarnissamik isumaqtigiissuteqarnikkut piviusunngortinneqarpoq.

Aatsitassarsiortut piumasarisaat piginnaanerit aamma nunatsinni suliffeqarfiiit piginnaasatigut neqeroorutigisinnaasaasa akornanni "nikinganermik" allaaserinnittumik GAP-imik misissuineq 2012-imik naammassineqarpoq. GAP-imik misissuineriit tunuliaqtalarugit pikkorissartitsinernik aaqqissuussisoqarpoq, siumut sammisumik aatsitassarsiorfinniit piumasarineqartut piginnaasat nukittorsarnissaat siunertaralugu sumiiffinni tunngavillit suliffeqarfiiit ineriertortinnissaannik isiginnittoq. Tamatuma aatsitassarsiorfinnut aamma annertuumik ingerlataqarluni pilersaarutinut pilersuisut akitigut aamma pitsaassutsikkut unammillersinnaasunngorlugit suliffeqarfiiit periarfissaat pitsaunerulersissavai. Pikkorissarnerit taamaalillutik ullumikkut qitiusumik atuarfinni neqeroorutigineqartartunut pikkorissarnernut tapertaapput. 2013-imik ukiup affaata siulliup ingerlanerani illoqarfinni Qaqortumi, Nuummi, Sisimiuni aamma Aasianni pikkorissarnerit 14-it ingerlanneqarput. Pikkorissartut pikkorissarnernik assut naammagisimaarinissimapput, peqataasullu amerlanerit nalunaarutigalugu pikkorissarnerni suli allani peqataanissamut soqtiginnillutik. Taamaattumik ukiuni tulliuttuni marlunni suliniutit assingusut ingerlateeqqinnejarnissaat ilimagineqarpoq.

2.5.2 Inuussutissarsiutinik siuarsaaneq pillugu inatsit

Nunami inuussutissarsiutinut tunngatillugu inuussutissarsiornermik siuarsaaneq pillugu inatsit 2013-imi januarip aallaqqaataani atuutilerpoq. Inuussutissarsiornermut, Aatsitassanut Suliffeqarnermullu Naalakkersuisoqarfik inatsimmi nalunaarusiorlugu upernaaq atorsimavaa, taannalu tusarniutigalugu nassiunneqarsimalluni. Ilitsersuususiorluni sulineq aallartinneqarpoq.

Nunami inuussutissarsiutinut tunngatillugu inuussutissarsiornermik siuarsaaneq pillugu inatsimmi inuussutissarsiutinut tapiissuteqartarnernik aqtsineq ineriertortitsinermut ingerlatsivimmi Greenland Businessimiippoq. Greenland Businessip 2013-imi junip naanerani suliffeqarfifit 14-it tunisassianik ineriertortitsinerannik katillugit 1,65 mio. kr.-inik tapiissuteqarfifai aamma 382.000 kr.-inut bilitzinik qiortakkanik 32-nik tunniussisimalluni. Taamaalilluni 2013-imi ukiup affaani siullermi 2 mio. kr.-it sinnerlugit tapiissuteqartoqarluni.

2.5.3 Isumalluutit uumassuseqartut

Isumalluutinik uumassuseqartunik niuernikkut ilisimatusarnikkullu atuineq pillugu inatsimmik Inuussutissarsiornermut, Aatsitassanut Suliffeqarnermullu Naalakkersuisoqarfik isumaginnittuovoq, tamanna piffissap ilaani Nunamut Namminermut, Pinngortitamut Avatangiisinullu Naalakkersuisoqarfimmit isumagineqareerluni. 2013-imi ukiup affaani siullermi ingerlatsilluartoqarsimavoq, julip aallartinnerani misissuinissamut akuersissutit 31-t tunniunneqarlutik. Ilisimatusarnikkut suliniutit assigiinngitsorpassuit matumanu pineqarput, taakkunannga arlalissuit nunami allanngutsaaliukkami ilisimatusarfimmit Zackenbergimut atasuullutik.

Isumalluutinik uumassuseqartunik niuernikkut ilisimatusarnikkullu atuinermut tunngatillugu inatsit 2006-imi akuerineqarpoq. Akuersissut pillugu qinnuteqartumut sammisumik ilitsersuusiorqarnissaanik pisariaqartitsisoqartoq naalakkersuisoqarfimmit paasineqarpoq, taamaattumillu tamatuminnga sulineq aallartinneqarpoq.

2.5.4 Nunap immikkoortuisa ineriertortinnissaannik periusissaq

Nunap immikkoortuisa ineriertortinnissaannik periusissap kommunini inuussutissarsiutinik ineriertortitsinermi tapersersuissaq. Taamaattumik kommunini tamani inuussutissarsiutitigut siuttuuffiusussat pillugit pilersaarutinut aamma ineriertortitsineq pillugu ataatsimeersuarnernut aningaasanik immikkoortitsisoqarpoq kinguaattoornerlu pissutigalugu 2013-ip qiteqqunnerani kommunini marlunni katillugit 3 mio. kr.-inut inuussutissarsiutitigut siuttuuffiusussat pillugit pilersaarutinut tapiissuteqarnissamut neriorsuisoqarluni. Qinnuteqaatit sinneri ilimagineqarpoq piffissap aggersup ingerlanerani tiguneqassasut, taamaalilluni aningaasat tamarmiusut 6 mio. kr.-iullutik. Nunaqarfinni isorliunerusunilu inuussutissarsiornikkut sulisoqarnikkullu suliniutit pillugit pilersaarut Naalakkersuisunit akuerineqarpoq, taassuma 2014-imiit nunap immikkoortuisa ineriertortinnissaannik periusissaq taarsissallugu. Siunertaq tassaavoq aallussaqarluni

suliniuteqarnissaq, aalisarnerup, piniarnerup, nunalerinerup aamma inuussutissalerinerup, aatsitassat aamma takornariaqarnermi nunaqarfinni isorliunerusunilu ineriertortitsinermik pilersitsinermik peqataalluni.

Taakku saniatigut imminut akilersinnaassuseqarnermik misissuinerit aallartinneqarput, immikkoortuni arlalinni inuussutissarsiornikkut siuariartornissamut periarfissaasinnaasunik erseqqissaasussaq. Sulinermi aallunneqartut tassaapput nunami inuussutissat aamma uumasuuteqarneq, aalisarnermik tunngaveqartut inuussutissat kiisalu nunaqarfinni nukimmik ataavartumik atuinerup annertusinera. Sammisat siuliani taaneqartut pillugit misissuinerit ingerlaavartumik ingerlanneqarput 2013-illu naanerani naammassineqassasut ilimagineqarluni.

2.5.5 Takornariaqarneq

2012-imi aasami piffissamut 2012-2015-imut takornariaqarnikkut periusissaq akuersissutigineqarpoq. Periusissap siunertaa tassaavoq takornariaqarnikkut aamma misigisassianik nioqquteqarnermi aningaasaqarnikkut, inooqataanermi avatangiisitigullu atasinnaanerup qulakkeerneqarnissaa. Periusissaq pilersaarusrorluarnikkut immikkoortuni tallimanik ukuninga isiginnippoq: Nittarsaaneq, tikikkuminarnera, inatsisit, inuussutissarsiutit misigisassiaqartitsisut aamma kisitisitigut paasissutissat/uppernarsaaneq.

Sumiiffinni nunami aalajangersimasuni takornariartitsinermut akuersissuteqartarnissaq pillugu Inatsisartut inatsisaat nr. 19, 3. december 2012-imeersoq 2012-imi ukiakkut ataatsimiinnermi akuersissutigineqarpoq. Inatsimmi siunertaq tassaavoq inuussutissarsiutigalugu takornariartitsinermi namminersortut aningaasaliinerit annertunerusut naammaginartumik illorsorneqarnissaasa qulakkeerneqarnissaa, taamaalilluni namminersortut takornariaqarnermik ingerlataqartut inuussutissarsiummi aningaasaliinissamut annertunerusumik kajumissuseqalernissaat.

Taakku saniatigut Nunatsinni takornariaqarneq pillugu kisitisitigut paasissutissat pitsaanerulersinnissaat pillugu sulineq annertunerusoq aallartinneqarpoq. Siunertaq tassaavoq takornariaqarnermik inuussutissarsiummi kisitisitigut paasissutissat tatiginarnerusut qulakkeerneqarnissaat, taakku pitsaanerusumik paasisaqarnermik pilersitsisinnaallutik aamma ukiuni aggersuni takornariaqarnermik inuussutissarsiummi toqqammaviit pitsaanerusumik qanoq ineriertortinnissaat pillugit aalajangiinissamut tunngavissiisoqarluni.

Aammattaaq 2013-ip ingerlanerani Nunatsinni takornariaqarnikkut periarfissanik ineriertortitsinissaq pillugu aporfiusartunik misissuisoqassaaq.

2.5.6 Suliniutit annertuut pillugit pilersaarutit, tassunga ilanngullugu Isuani piaaffik

Pingasoqiusamik isumaqatigiissutit

Aatsitassarsiorfiit, Namminersorlutik Oqartussat aamma Kommunit akornanni pingasoqiusamik isumaqatigiissutit (Impact and Benefits Agreements) siullermeertumik 2010-mi aamma 2011-mi Cairn Energy-p misissuilluni qillerineranut atatillugu piviusunngortinnejarpuit. Isukasiata eqqaani piaanissaq pillugu London Miningip qinnuteqaataata nanginneratut London Miningip, Namminersorlutik Oqartussat aamma Kommuneqarfik Sermersuup akornanni pingasoqiusamik isumaqatigiissutissaq sulissutigineqarpoq. Siunertaq tassaavoq pingasoqiusamik isumaqatigiissut aamma siunissami nunami piaanissamik pilersaarutini imaanilu misissuilluni qillerinerni atorneqartassasut.

Pingasoqiusamik isumaqatigiissut aatsitassarsiornermut atatillugu ingerlatseqatigiiffiup pilersaarutigisaani ingerlatassat sumiiffimmi tunngaveqarnissaasa ilaatigut qulakkeernissaanut sakkuuvoq. Isumaqatigiissutini pingaartinneqartoq pilersaarutini sulisut nunaqavissut sumiiffinnilu suliffeqarfii ilaatinneqarnissaat. Kalaallit tungaannit ineriarornermut tassunga piareersimanissaq pineqarpoq, taamaalilluni nunat allamiut suliffeqarfii kisimik suliakkerneqarnatik. Taaku saniatigut pingarpoq suliassatut neqeroorutigineqartut imatut annertussuseqartillugit sularinnittussarsiunneqartassasut, sumiiffinni suliffeqarfinnit isumagineqarsinnaallutik aamma neqeroorfingineqarsinnaallutik aamma sumiffinni suliffeqafitit pilersuisuunissamut aamma periarfissinneqarlutik. Aammattaaq pingarpoq pingasoqiusamik isumaqatigiissummi lærlinginut nunaqavissunit suliffimmik misiliiffissat, pikkorissarnissaq aamma sulisinnaasut nunaqavissut ilinniartitaanerat qulakkeerneqarluni aamma isumannaatsumik tunngaveqarluni ineriarorneq pillugu anguniagaq tapersorsorneqarluni.

2012-imi ukiakkut ataatsimiinnermi suliniutini angisuuni illuliortiternernik sanaartornernillu suliassat pillugit Inatsisartut inatsisaat nr. 25, 18. december 2012-imeersoq (Suliniutit annertuut pillugit inatsit) akuerineqarpoq. Naalakkersuisooqatigiinni Naalakkersuisut isumaqatigiissutaannut ilaavoq suliniutit annertuut pillugit inatsit immikkoortutigut arlalitsigut allanngortinnejassasoq, tassunga pingaartumik ilanngullugit isumaqatigiissutit pillugit § 10. Suliniutit annertuut pillugit inatsimmut allannguutissatut siunnersuutit 2013-imi ukiakkut ataatsimiinnissamut kingusinnerusukkut nalunaarutigineqarnissaat ilimagineqarpoq.

Nioqqutissiortutut akileraarutit

Aammattaaq naalakkersuisooqatigiit siumaqatigiissutaannut ilaavoq siumut sammisumik aatsitassanik piaanermi nioqqutissiortutut akileraarutit eqqunneqassasut. Piaanissamut akuersissut pillugu London Miningip qinnuteqaataanik sularinninnermut atatillugu taamaattumik ukiumi tunisassiorfiusumi siullermiit kaaviiartitanit akileraarutinik akiliisoqartarnissaanut isumaqatigiissummut tunngavissaq pillugu isumaqatiginninniartoqarpoq.

London Mining

Isukasiata eqqaani savimineq pillugu pilersaarummut iluaqtiginninnissamut akuersissummik atuutilersitsinissamut Naalakkersuisut aalajangersimapput, aatsitassat pillugit inatsimmi § 6 malillugu. Akuersissut malillugu aningaasaliisinnaasunik isumaqtiginninniarluni London Mining aallartissinnaalerpoq. Sanaartornermi aningaasaliissutit tamarmiusut 13-14 mia. kr.-iussasut naatsorsututigineqarput. Aatsitassalli pillugit inatsimmi § 6 malillugu akuersineq piaaffiliorluni aallartitsinissamut pisinnaatitsinngilaq. Aatsitassat pillugit inatsimmi § 19, 43 aamma 86 malillugit akuersissutit suli amigaataapput kiisalu pilersaarutip aallartinnissaa sioqqullugu pingasoqiusamik isumaqtigiissutip akuerineqarnissaa. Piaarnerpaamik aningaasaliisussanik nassaartoqarpat akuersissutissallu sinneruttut aamma IBA-mik isumaqtigiissut inissinneqarpata ilimagineqarsinnaavoq piaaffimmik sanaartorneq 2015-imi aallartinneqarsinnaasoq. Aallartinneraniilli untritilinnik arlalinnik suliffeqarnikkut sulisussat qulakkeerneqarnerisa saniatigut aamma 2015-imiit sulisuniit isertitanit akileraaruteqartussaassaaq, nunaqavissunit aamma nunanit allaneersunit, kiisalu pilersuisunit tamaniit ingerlatseqatigiiffinit akileraarutit.

Aatsitassarsiornermi pilersaarutit allat

Ukiuni aggersuni aatsitassarsiornermi pilersaarutit allat akuerineqarnissaat ilimagineqarpoq, ingerlatseqatigiiffiit inatsisitigut piumasaqaatinik naammassinnissimappata. Tassani ilaatigut pineqarput True North Gems-ip Qeqertarsuatsiaat eqqaanni rubinimik piaaffissaa, 2013-imi tusarniaassutigineqarnissaa ilimagineqarluni aamma Narsap eqqaani eudalytimik piaaffik, 2014-imi tusarniaassutigineqartussatut ilimagineqartoq. Aatsitassarsiornermi pilersaarutit taakku pillugit ingerlatsinerup nalaani sulisut 160-it missaaniissasut ilimagineqarpoq, taakkunannga amerlanersaat sumiifinni sulisussarsiarineqarnissaat ilimagineqarluni.

Aluminiu pillugu pilersaarut

Alcoap aamma Namminersorlutik Oqartussat akornanni isumaqtigiinniarnerit suli naammassineqanngillat. Naalakkersuisunit uppernarsarneqarpoq UKA 2012/113-imi Inatsisartut aalajangiinerisigut akuerineqartumi Alcoamik isumaqtigiinniarnerit ingerlateqqinnissaat pillugit tunngaviusussatut piumasaqaatit tunngavigalugit isumaqtigiinniarnerit nanginneqassasut.

Pilersaarut pillugu tunngaviusussatut piumasaqaatini pingarnertut immikkoortut tassaapput akuersissuteqarluni aaqqiineq, tassani aluminiu pillugu pilersaarummi erngup nukinganik nukissiorfimmi Namminersorlutik Oqartussat piginneqataassanngillat kiisalu piffissaq akuersissuteqarfiusoq ukiunik 60-inik sivitsorneqarsinnaalluni. Tamanna isumaqarpoq erngup nukinga pillugu inatsimmik allannguineq, maannakkut oqaasertaani akuersissuteqarfiusoq piffissaq ukiut 40-llutik, ukiut 20-t tikillugit sivitsooqinnejarnissaanut periarfissaqarluni. Naalakkersuisut Qeqqata Kommunia suleqatigalugu ingerlaqqinermi attaveqaatinut, inissianut, atuarfinnut il.il. sanaartornermut aningaasaliinernut aningaasalersuinissamut periarfissanik ujartuissapput.

Erngup nukinga pillugu inatsit malillugu akuersissutini atuutilersinneqartuni ingerlatseqatigiiffiit akileraarusersornerinut taarsiullugu akissarsiarnik aalajangersaanissamut periarfissiinissaq

siunertalarugu akileraartarnermut inatsisip aamma erngup nukinga pillugu inatsisip allanngortinnissaannut siunnersummiq Naalakkersuisut saqqummiussiniarput.

”Aluminiu pillugu pilersaarutip aningasaqarnikkut pingaaruteqarnera” pillugu nalunaarusiami 2010-meersumi, Niras Greenland A/S-imit suliarineqartumi, aluminiu pillugu pilersaarummiit toqqaannartumik, toqqaannanngitsumik malitsigisaanillu isertitat aningaasartuutillu misisoqqissaarneqarput. Misissuinerup inernerata takutippaa aluminiumimik aatsitsivimmik aamma erngup nukinganik nukissiorfinnik marlunnik pilersitsinerup siumut sammisumik piffissami sivisumi nunatta karsiata isertitai aningaasartuutalu annertusissasut, sanaartornerup nalaani annertunerpaamik sunniuteqartumik.

Pilersaarutip aallartinnera aamma aluminiumimik nunarsuaq tamakkerlugu piumasaqarnermik aamma nukissiornermi akinik sunnerneqartussaavoq, pilersaarutip aallartinnissaa pillugu aalajangiinissamut aalajangiisumik sunniuteqarsinnaasumik.

2.5.7 Ujaqqat qaqtigoortut pillugit periusissaq

Nunatsinni ujaqqanik qaqtigoortunik peqarfinnik arlalinnik nassaassaqarpoq. Pilersaarutini siuarsimanerpaaq tassaavoq Killavaat Alannguata eqqaaniittooq, ilimagineqarlunilu 2013-ip ingerlanerani Tanbreez Mining Greenlandip iluaquteqarnissaq pillugu qinnuteqaatini tunniutissagaa. Kuannersuit eqqaanni aamma misissuinissamut pilersaarut aallartinneqarpoq, tassanili apeqqutaalluinnarluni Nunatsinni uranimut naaggaaruinnarneq allanngortinnejassanersoq.

Kalaallit Nunaat aatsitassanik qinngornernik ulorianartunik akoqartunik iluaquteqarnissamut naaggaaruinnarpoq, soorlu uran aamma thorium, aamma ujaqqat qaqtigoortut ilaat taamatut akoqarlutik. Taamatut uran pillugu naaggaaruinnarneq Inatsisartut ukiakkut ataatsimiinnerannut inissinneqarpoq, allanngortitsinissamut imaluunniit atuukkunnaarsitsinissamut periarfissamik eqqartuinissaq siunertalarugu.

Maannakkut ujaqqat qaqtigoortut pillugit periusissaq suliarineqarpoq. Periusissaq Nunatsinni ujaqqanik qaqtigoortunik misissuineq piiaanissarlu pillugit periarfissanik ineriertortitsinermik maannakkullu pilersaarutinik tapersersuinermut peqataassaaq. Ujaqqanik qaqtigoortunik misissuinerup piiaanissamullu pilersaarutini siuarsimanerpaaq tulliuttumi naatsumik allaaserineqarput.

Kujataani Killavaat Alannguat

Tanbreez Mining Greenland A/S Narsap aamma Qaqortup akornanni Killavaat Alannguanni ujaqqanik qaqtigoortunik peqarnersoq misissuivoq. Aatsitassat katitigaanerinut ilisarnaataasoq tassaavoq annertuumik niobimik, tanalumimik, zirkoniumimik, feldspatimik aamma ujaqqanik qaqtigoortunik akoqarnera. Aatsitassat taakku mobiltelefonini, timmisartut motorini igalaaminernilu atorneqartarput. Peqarnera 4 mia. tonsit sinnerlugit imaqqassasoq missilorneqarpoq – ukiuni untritilinni arlalinni tunisassiornermut naammattut.

Paasissutissat pigineqartut tunngavigalugit naatsorsuutigineqarpoq sanaartornerup nalaani inuit 35-135-t akornanni sulisinnaassasut aamma ingerlatsinerup nalaani inuit 80-it missaat, pilersaarut piviusungussappat. Taakkunangna ilimagineqarpoq 75 %-ii nunaqvavissuussasut, sinnerilu 25 %-it nunanit allaneersut sulisinnaasut.

Narsap eqqaani Kuannersuit eqqaanni ujaqqat qaqtigoortut pillugit pilersaarut

Greenland Minerals & Energy Narsap eqqaani ujaqqanik qaqtigoortunik misissuivoq. Ujaqqat qaqtigoortut saniatigut zinkimik aamma uranimik peqarpoq. Ingerlatseqatigiiffiup imminut akilersinnaaneranik misissueqqaarnini naammassisimavaa ilimagalugulu maannakkut takorluukkat aallaavigalugit ingerlatsinerup nalaani 380-it missaanniittut aamma sanaartornerup nalaani inuit 1.000-it sulisinnaasut.

Qinnuteqarnissamut nalunaarsukkanik katersinermut atatillugu Kujataani soqutisaqaqtigiinnik arlaleriarluni ataatsimiisitsisoqareeropoq. Taakku saniatigut ukiut ingerlanerini innuttaasunik ataatsimiisitsinerit arlallit ingerlanneqarput, pilersaarut pillugu ilisimatitsisoqarluni. Ingerlatseqatigiiffik ukiuni kingullerni soqutiginartunik arlalinnik nutaanik peqarneranik paasisaqarpoq, manna tikillugu isumalluutit annertusisillugit. Immikkoortumi 2005-imili qillerisoqarpoq.

2.5.8 Aalisarnermik inuussutissarsiut

Aalisarnermik ingerlataqartut avammut niuerterat 2012-imni suli qaffakkiartorpoq, aalisarnerlu suli Kalaallit Nunaata inuussutissarsiutini avammut niuertuni pingaarnersaralugu. Naalakkersuisut iluarsartuussinernik naammassisaqarnissaq siunertaraat, pingaartumik sinerissamut qanittumi raajarniarnermi qaleralinniarnermilu.

Raajanik, qaleralinnik saarullinnillu avammut niuerterup nalinga ataatsimut isigalugu 2012-imni 100 mio. kr.-inik qaffappoq, 2011-mi kisitsisinut naleeqqjullugu. Saarullinnik avammut niuerterup annertussusaa qaffappoq, kisianni raajanik avammut niuertermi annertussuseq apparluni TAC-mik appartisinerup kingunerisaanik. Sinerissamut qanittumi saarullinniarneq 10-15.000 tonsit missaaniippoq. Kalaallit Nunaat 2013-imut Barentip imartaani katillugit 9.400 tonsinik saarullinniarsinnaavoq, taakkulu saniatigut Kalaallit Nunaat kullerinik aamma sejinik aalisarsinnaalluni.

Aalisarnermiit isertitat tamarmiusut 2011-mit 2012-imni qaffasinnerupput nunarsuarmi niuerfinni akit qaffakkiartornerisa malitsigisaannik.

Aalisarnerup annertussusia qaleralinniarnermi allanngorpiangilaq. Akerlianilli raajartassiissutit 2013-imni appaqqillutik, aalisarnermilu tassani ingerlataqarnerup appaqqinneranik kinguneqassalluni. Aammattaaq raajarniarnermi MSC-mik nalunaaqutsersuineq eqqunneqarpoq. Tamanna biologiniit pisassiissutissatut inassutigineqartunut aalisarnerup annertussusiatigut naleqqussaanissamut sukangasuunik piumasaqaateqarpoq. Aalisarnermut, Piniarnermut Nunalerinermullu Naalakkersuisoqarfik naalakkersuisoqarfik attuumassuteqartut aamma

Akileraartarnermut Aqutsisoqarfik suleqatigalugit aalisarneq pillugu inatsisip nutaternissaanik sulinermut tunngaviusussaq pillugu isummernissamut tunngavissiussaaq. Tassunga ilanggullugu aalisarnermi isumalluutit iluaqtiginerini ataatsimut inuiaqtigiiit aningaasaqarnikkut annertunerusumik iluanaaruteqarnissaq qulakkeerniarlugu anguniakkanik suliniutinillu saqqummiussineq. Aalisarnermut nutaamik akuersissutinik atulersitsinissaq sioqqullugu siunissami aningaasaqarnikkut sunniutaasunik aamma akuersissutip iluaqtigineranut atasumik sumiiffinni sulisunut naatsorsuutigisat allaaserinissaannut ilutsinik naleqquttunik nassaartoqassaaq.

2.5.9 Selineq

Sulinermut pilersaarut

Naalakkersuisut juni 2013-imí sulisitsisuniit sulisartuniillu peqataaffigineqartumik sulisoqarnermut nuna tamakkerlugu siunnersuisoqatigiinnik pilersitsippu. Siunnersuisoqatigiit siunertaraat nuna tamakkerlugu sulisoqarnikkut suliniutit pilligit siunnersuisarneq ataqtigiiissaarinerlu. Nuna tamakkerlugu sulisoqarnermut siunnersuisoqatigiit sulisoqarnikkut politikip ilusilersornissaa pillugu Naalakkersuisunut siunnersuissapput, kiisalu suliffissaaleqinermik akiuinermi nunamut unamminartunik ataatsimoortumik aaqqiissutissanik ataqtigiiissaarissalluni ineriertortitsissallunilu. Aammattaaq najukkani nunalu tamakkerlugu sulisoqarnikkut suliniutini inernernik sunniutinillu nakkutilliissalluni. Kiisalu sulisoqarnermut siunnersuisoqatigiit siunertalarlugu apeqqutit killilersorneqarsimasut arlallit oqallisigissallugit aamma, siunnersuisoqatigiit isumaat malillugu, suliffissaaleqinermut annertunerpaamik sunniuteqartunik suliniuteqarnissamut siunnersuuteqassalluni. Siunnersuisoqatigiit sulinerminni maannakkut apeqqutit uku immikkut sammissavaat:

1. Sulisartut avataaneersut
2. Nuna tamakkerlugu suliffinnik nittarsaavik
3. Pitsaanerusumik aaqqissuussaanermik nakkutilliineq
4. Sulisussarsiarineqarsinnaanermik oqartarneq
5. Suliffeqarneq inissaqartitsisoq
6. Suliffeqanngitsut iliuusissanik pilersaarusiunneqarsinnaatitaanerat ilitsersorneqartarnerallu
7. Inuuusuttut suliffissaaleqinerat

Suliffeqarneq inissaqartitsisoq

Suliffeqarnerup inissaqartitsisup nunami suliffeqarfinni kikkunnut tamanut inissaqarneq qulakkiissavaa – aamma inuit sulisinnaassusiat killeqalersimasoq imaluunniit sanngiinnerusunik tunngaveqartut.

Suliffeqarnermi inissaqartitsineq taaguutaavoq annertuumik paasineqarsinnaasoq, suliffeqarfiiit inunnut, sutigut tamatigut angusaqarnissaq pillugu piumasaqaatinut qaffasissunut naammassinnissinnaanngitsunut inissaqartitsineq pillugu ilimagisanik pingaartumik ersersitsisoq.

Siunnerfigineqartut inuit arlalissuupput, suliffeqarfinnut patajaatsumik atassuteqarnissap angunissaanik imaluunniit aalajangiussisimanissaannik ajornartorsiuteqartut. Tamanna assersuutigalugu sulisinnaassutsip apparneranik, timikkut tarnikkulluunniit innarluuteqarnermik, piffissami sivisuumi sulinngiffeqarsimanermik imaluunniit napparsimasimanermik pissuteqarsinnaavoq.

Nuna tamakkerlugu sulisoqarnermut siunnersuisoqatigiit ilaatigut inunnik atugarliortunik kivitsinermut naleqqiullugu pisortat inuussutissarsiortunut namminersortunut qanoq tapersersuisinnaanerat pillugu apeqqummik eqqartuissapput, tassunga ilanngullugit siusinaartumik soraarerussutisiallit, innarluutillit, pineqaatissinneqarsimasut il.il. aamma suliffeqarfinnut uternissaannik ikiorlugit.

Immikkut ittumik suliffissaaleqisut pillugit suliniut

Ukiuni kingullerni kommunini nalunaarsorneqarsimasut suliffissaaleqisut amerliartuinnarnerat tunuliaqutaralugu suliffissaaleqisut pillugit immikkut ittumik suliniutit 2011-mi aamma 2012-imi aallartinneqarput. Suliffissaaleqisut pillugit immikkut ittumik suliniut 2013-imi ingerlateqqinnejarpooq aamma "Sulisoqarneq pillugu pilersaarut aningaasaqarnikkut allangornermi" sulisoqarneq pillugu politikimi siunniussanik tapersersuisutut suliniutit isagineqassalluni.

Suliffissaaleqisut ilarpassui sivikitsuinnarmik ilinniagaqarput imaluunniit ilinniagaqarnatik, taamaattumik suliffissaaleqisut piginnaasaat nalinginnaasumik qaffassarneqartariaqarput. Siullermik atuagarsornikkut pikkorissartitisinerit kiisalu inuuusuttunut sannavitsigut pilersaarutit salliutinnejassapput, taamaalillutik ilinniarnermik ingerlatitseqqinnermi ilaasinnaanngorlutik. Piffinni atorfimmik ammaassisooqartillugu suliffissaaleqisunut naleqquttumik pikkorissarnernik neqeroortoqassaaq. Najukkami suliffissaaleqisumut imaaliallaannaq suliffissaqartitsisoqanngippat suliffissaaleqisumik pikkorissartitsineq aatsitassarsiornermi suliffissat sapinngisamik eqqarsaatigineqassapput.

Suliffissaaleqisut pillugit suliniummiipput:

1. Ilinniagaqarsimanngitsunut piginnaasatigut ineriartortitsilluni pikkorissaanerit. Ilinniagaqarsimanngitsunut piginnaasatigut ineriartortitsilluni pikkorissaanerit tassaapput suliatigut pikkorissarnerit qitiusumi ilinniarfinnit ingerlanneqartut imaluunniit qitiusumik ilinniarfiit sinnerlugit allanit ingerlataqartunit isumagineqartut, taamaalilluni pikkorissarnerup pitsaassusaanut suliamullu attuumassuteqarneranik qitiusumik ilinniarfik akisussaalluni. Suliffissaaleqisut 1-imut tulluuttut kisimik pikkorissartinsinernut innersuunnejassapput.
2. Paasisaqarnissaq siunertalaralugu pikkorissartitisinerit. Paasisaqarnissaq siunnersuinissarlu siunertalarugit pikkorissartitisinerit inuussutissarsiutit nutaat, nuttarsinnaaneq, atorfinnik ujarlerneq aamma 1-imut tulluuttut pillugit suliffeqarfinnut atassuteqarnermik aallussaqarput.

Pikkorissarnerit ingerlanneqarnissaat pillugit Namminersorlutik Oqartussat ilusiliaat malillugit pikkorissarnerit ingerlanneqassapput.

3. Inuuusuttunut Piareersarfik/Piorsaavik. Ilanniарnerup nanginneqarnissaa siunertaralugu ukiumi ataatsimi piareersaaneq.
4. Piareersarfip atuakkersorluni suliniutaa AEU/FA. Ilanniарnerup ingerlaqqinnissaa siunertaralugu ukiumi ataatsimi-marlunni ilinniartitaanernut siunnersortinik atuartitsineq.
5. Piginnaanngorsaaqqinnej. Piginnaanngorsaaqqinnerup ingerlanera 2-mi tulluuttunut pilersinneqartarpoq pisortani namminersortunilu suliffinnit sulisitsisut suleqatigalugit. Piginnaanngorsaaqqinnerup ingerlanera amerlanertigut ukumik ataatsimik-marlunnik sivisussuseqartarpoq.

Suliffissaaleqisut pillugit immikkut ittumik suliniummut aningaasat 2013-imi katillugit 33 mio. kr.-it missaaniippuit.

Suliffissaaleqisut pillugit immikkut ittumik suliniutip kinguliani pikkorissarnerit ingerlanneqartut tamarmik sunniutaat nalilersorneqassapput. Suliniuteqareernermi qaammatit arfinillit qaangiunnerini peqataasut tamarmik malitseqartinneqassapput, taamaalilluni 2013-imi oktoberip naanerani 2013-imi ukiup affaani siullermi suliniutit pillugit nalunaarusiortoqarluni.

Suliffissaaleqisut pillugit suliniutit 2013-imi Naalakkersuisunit nukittorsarneqarput sanaartornermut tunngasuni allanik suliniuteqartoqarluni. Tamaalilluni illoqarfinni inissianik amigaateqarfiusuni annertuumillu suliffissaaleqiffiusuni ineqarnermut tunngasuni iluarsaassinnikkut suliniutit siuartinneqarlutik.

Taakku saniatigut aalisarnermi suliniutit arlallit aallartinneqarput, sulisoqarnikkut ajunngitsumik sunniuteqartitsisinnaasut. Qeqertarsuup Tunuani, Uummannami aamma Upernavimmi sinerissamut qanittumi qaleralittassisutit ilaasa qaffanneqarsinnaaneri pillugit suliniuteqartoqarpoq. Suliniut alla tassaavoq Aasiani, nutaatut, septemberip tungaanut piffissaq misileraaffiusoq ammarneqarpoq, aalisartut saarullinnik, suluppaakkanik, qeeqyanik qaleralinnillu tunisisinnaallutik. Kiisalu Tunumi makrelinik, ammassassuarnik, saarullernanik aamma guldlaksinik misileraalluni aalisarneq aallartinneqararluni.

Suliffissaaleqisut pillugit kisitsisitigut paasissutissat

Suliffissaaleqisunut suliniutit sammitinniarlugit aallartinniarlugillu sulisoqarneq pillugu kisitsisitigut paasissutissat naammattut pingaaruteqarput. Ukiuni kingullerni Kalaallit Nunaanni sulisoqarneq pillugu kisitsisitigut paasissutissat nunani tamalaanisulli pitsaassuseqarnissaat aallunneqarpoq, soorlu NP nunani tamalaani sulisoqarnikkut suleqatigiiffia ILO-p tamanna inassutigigaa. Sulisoqarneq pillugu kisitsisitigut paasissutissat pitsaanerulersinnissaannut sulineq suli ingerlavooq.

Suliffissaaleqisut pillugit kisitsisitigut paasissutissani qaammatip ataatsip ingerlanerani kommunimi suliffissarsiuussisarfimmut suliffissarsiortutik inuit qassit saaffiginnissimanersut naatsorsorneqartarput. Taamaattorli suliffissarsiortunik nalunaarsuinermut tunngasoq allaffissornikkut tunngasortaa kommunit akornanni assigiissarneqarsimangilaq. Taamaattumik suliffissarsiortut amerlassusaanni allanngornerit ilaat kommunini allaffissornikkut periutsip allanngorneranut takussutaasinnaalluni. Pingaartumik 2012 sioqqullugu nalunaarsuinerni taamaattoqarsinnaalluni, taamani nalunaarsuinerit suliffissarsiuussisarfinni sulianik suliarinnittuni assigiissarniarneqalersimammata. Kisitsisitigut paasissutissat aamma sumiffinni ataasiakkaani nalunaarsuinerit amigaataaneri pissutigalugit amigarsinnaallutik.

Suliffissarsiortunik nalunaarsorneqartunik kisitsinermi manna tikillugu nunaqarfinni inuit ilaatinneqarsimangillat. 2013-imiit Naatsorsueqqissaartarfiup naatsorsueriaaseq allanngortippaa maannakkullu nunaqarfinni suliffissarsiortut aamma ilanngunneqartalerlutik. Nunaqarfinniit kisitsisit pisut ilaanni missiliuinermik imaluunniit naatsorsuinernik tunngaveqarsinnaapput taamaattumillu nalorninartoqarsinnaallutik.

Ajornartorsiut alla tassaavoq suliffissaaleqisut pillugit kisitsisitigut paasissutissat suliffissaaleqisunik nalunaarsorneqartunik tamanik imaqpurt taamaallillutilu aamma inuit pinngitsooratik suliffeqarfimmut piareersimanngitsut. 2012-imi tulluartuunermik aaqqissuussineq atulersinneqarpoq, tassani suliffissaaleqisut tulluarfigisanut pingasunut agguarneqarlutik sulilernissamut taakku piareersimaneri apeqqutaatillugit. 1-imi tulluartut tassaapput inuit sulifimmik nalinginnaasumik aallartinnissamut piareersimasut. Tassaapput suliffissaaleqisut suliffeqarfinni piumasarineqartunik piginnaassuseqartut. 2-mut tulluartut tassaapput inuit annertuumik killeqartumik sulisinnaassuseqartut, sulifimmik tigusisinnaanermik piareernissaat sioqqullugu arlaatigut sulilersitsiniarnerit imaluunniit katsorsaanerit aallartinneqartariaqarlutik. 3-mut tulluartut tassaapput inuit maannakkut ima annertutigisumik ajornartorsiuteqartut, sulisinnaanatik imaluunniit sulilernissamut sammisumik neqeroorutini peqataasinnaanngitsut. Suliffissaaleqisoq pillugu ILO-p nassuaataa aallaavigalugu 1-imut tulluartut inuit kisimik suliffissaaleqisutut ilanngunneqartariaqarput. Tulluartunut aggualluni sulinermit siullermi misilitakkat takutippaat suliffissaaleqisut immikkoortunut eqqortumik inissiinissamik suliamik suliarinnittut annertuumik sapersarsimasut. Taamaattumik suliffissarsiortut eqqortumik inississinnaanngorlugit suliffissarsiuussisarfinni sulianik suliarinnittut maannakkut pikkorissartinnissaat sulissutigineqarpoq.

Soorlu immikkoortoq 1.1-imi taaneqartoq suliffissaaleqisut amerlassusaasa aamma inuiaqtigiinni siuariartorerup akornanni paatsuugassaanngitsumik ataqtigiiittoqanngitsoq. Nassuaataasinnaasoq tassaasinnaavoq allamut nunasiartorneq, sulisinnaasut nuna qimallugu suliartortarlutik. Tamatuma saniatigut ilimanarpoq suliffeqarnermi aaqqissugaanikkut ajornartorsiuteqartoq. Suliamik ilinniagaqarsimanngitsut nunasiartortarerat qaffasissumillu suliffissaaleqinermut ataqtigiiissikkaanni arlaatigut sulinissamik neqeroorutit aamma piumasaqarnerit akornanni arlalinnik aporfekarunarpoq. Taanna aporfik ilinniagaqarnermik nuttarsinnaanermillu

pissuteqarunarpooq. Taamaalilluni suliffissaaleqisut piginnaasaasa aamma suliffeqarnermi piginnaasut ujartorneqartut akornanni nikingasoqarpoq kiisalu sumiiffinni suliffiusut aamma sulisartup najugaata akornanni nunamut tunngasumik aporfefqarpoq, suliffeqarnikkut nuttarsinnaanermik sanngiillisitsisumik.

2.6 Ilinniartitaaneq

Ilinniartitaanermik politikimi anguniagaq pingaardeq tassaavoq Kalaallit Nunaanni inuussuttut nunami maani atorfinnik sunilluunniit isumaginnilersissinnaalerlugin ilinniartitaanissaat inuusuttullu nunarsuarmut tamarmut sammilernissaat. Nammineersinnaanerulerneq naapertorlugu sulisinnaasunik avataaneersunik atorfinititsisarnerup annikillisinneqarnissaa pillugu Naalakkersuisut politikiannut tamanna naapertuuppoq.

Ilinniartitaanermut pilersaarut II 2014-imi upernaakkut ataatsimiinermi saqqummiunneqarnissaa Naalakkersuisunit ilimagineqarpoq, ilinniartitaanermi periusissaq nutarterneqarsimasoq tunuliaqtalaralugu.

Maannakkut immikkoortuni suli atualinngitsuni, meeqqat atuarfiat, oqaatsitigut periusissaq, 15-18-ink ukiullit aamma inussuttunut ilinniarfiit pillugit suliniutit Naalakkersuisunit salliutinneqarput.

2.6.1 Suli atulianngitsut

Meeqqani 0-5-ink ukiullinni 1500-t, tasa 31 %-it, pisortat imaluunniit imminut pigisunik ulluunerani neqeroorutinut ilaangillat. Peqatigisaanik siumut naatsorsuinerit siulittutigaat taamatut ukiullit 2018 tikillugu amerliartussasut. Taamaalilluni suli atualinngitsuni meeqqanut perorsaanikkut ineriertortitsisunik neqeroorutinik annertusiartuinnartumik pisariaqartitsisoqarpoq. Naalakkersuisut siunissami kissaatigaat suli atualinngitsuni meeqqanut tamanut pisortat neqerooruteqarnissaat qulakkeerneqassasoq taamaattumillu ulluunerani paaqqinnittarfinnut tunngasuni piginnaasap allilerneqarnissaanik tamanna pisariaqartitsilluni ukiumut 10 mio. kr.-ink sanaartornissamut aningaasaliissutinik immikkoortitsinikkut.

Pisortat ulluunerani paaqqinnittarfiini sulisut 44 %-ii 2012-imi perorsaanikkut ilinniagaqanngillat. Naalakkersuisut isumaqarput suli atualinngitsutut ukioqarneq meeqqat inuttut ineriertornissaannut aamma ilinniarfinni ingerlaqqinnissamut periarfissaannut pingaaruteqarluinnartoq. Naalakkersuisut taamaattumik siunnersuutigaat ulluunerani paaqqinnittarfinni sulisut ilinniagaqanngitsut ungasianit atuartinneqarnerat tunngavigalugu pikkorissartitsinikkut piginnaasat qaffatsinnissaannut 2014-imut Aningaasanut Inatsimmi aningaasanik immikkoortitsisoqassasoq.

Suli atualinngitsut pingasunik aamma tallimanik ukiullit misilinnissaat aamma atuarnissamut piareersimanerat pillugu nalunaarummit Naalakkersuisut suliaqarput ilimagalugulu sakkussat taakku ukiumi atualerfiusussami 2013/2014-imi misiligarneqassasut.

2.6.2 Meeqqat atuarfiat

Ukioqatigiit, 2013-imi meeqqat atuarfiannik naammassinnittut, tassaapput meeqqat atuarfiannik iluarsartusseqqinnerup Atuarfitsialak aallartimmalli, meeqqat atuarfiannik tamakkiisumik naammassinnittut siilliit. Naalakkersuisut paasivaat meeqqat atuarfianni atuartut suli amerlavallaartut, iluarsartusseqqinnerup siunertaatut, pitsaassuseqartumik atuartinneqarneq ajortut.

Naalakkersuisut taamaattumik kissaatigaat meeqqat atuarfiat pillugu iluarsartusseqqinnermi pingaarnertigut sammiviusoq nanginnejqassasoq, meeqqalli atuarfiata atuartitsineranik nalilersuinissamik ineriertortitseqqinnissamilli annertuumik pisariaqartitsisoqartoq aamma atuartut tamaasa inissaqartinnissaannut tapersorsorneqarnissaannullu piginnaasaqassasoq, tassunga ilanngullugit atuartut immikkut atuartinneqarnissamik pisariaqartitsisut. Naalakkersuisut paasivaat meeqqat atuarfiat pillugu iluarsartusseqqinnermi siunertaq sumiiffinni arlalinni aatsaat qanittukkut atulersinniarneqalersimasoq, aamma atuarfinni tamani Atuarfitsialaap tamakkiisumik atulersinnissaa qulakkeerniarlugu sulineq amigaatigineqartoq. Naalakkersuisut taamaattumik kommuninik, IMAK-imik, angajoqqaanik atuartunillu pitsanngorsaanerit pillugit qanittumik suleqatiginnikkusupput.

Meeqqat atuarfianni pingaartumik ilinniartitsisut pitsaasumik isumassuisumillu atuartitsinermi qitiusumik pingaaruteqarput. Naalakkersuisut kissaatigaat ilinniartitsisut naleqquttumik ilinniaqqinnissamut periarfissaat nukitorsarneqassasoq, taamaalilluni ilinniaqqinnerit Atuarfitsialammut aamma atuartitsinermi periutsimut siunnerfilerneqarlutik, aamma tamanna pillugu kommunit aamma IMAK oqaloqatiginiarlugu.

Meeqqat atuarfianni ineriertortitsinermi tapersersuisut pisortat suliffiisa akornanni maannakkut akisussaaffitsigut agguarneq naleqqunnersoq pillugu kommuninik soqtiginnittunillu allanik Naalakkersuisut oqaloqatiginnikkusupput. Atuarfitsialammut tapersersuisut Inerisaaviup, Ilinniartitaanermut, Ilageeqarnermut Kultureqarnermullu Naalakkersuisoqarfiup, kommunit akornanni suliatigut avitsinerup erseqqissuunerata paatsoorneqarsinnaanginnera qulakkeerneqassaaq. Pisariaqassappallu meeqqat atuarfiat pillugu tunngaviatigut atukkat pitsaanerulersinnissaat qulakkeerniarlugu Naalakkersuisut alloriarusupput, taamaalilluni nukiit sapinngisamik pitsaanerpaamik atorneqarlutik.

Qarasaasiatigut atortorissarutit aamma ungasianiit atuartitsinermi ineriertorneq meeqqat atuarfianni atulersinnissaa iluaqtigineqarnissaalu Naalakkersuisunit kissaatigineqarpoq. Naalakkersuisut ajorinngilaat meeqqat atuarfianni suliniuit pilersaarutillu amerliartuinnartut aallartinneqartarnerat, ukiunilu aggersuni taamatut ineriertorneq suliatigut aningaasaqarnikkullu tapersorsornissaanut suliniuit aallartissallugit. Naalakkersuisulli pingaartutut isigaat suliniuit sukumiisumik pilersaarusrorseqarlutillu nalilersorneqassasut, taamaalilluni nukiit sapinngisamik sunniuteqarluartillugit iluaqtigineqarlutik.

Kiisalu Naalakkersuisut pingaartutut isigalugu ilinniarfinni ingerlaqqinnissamut meeqqat atuarfiata ilitsersuussinera nukitorsarneqassasoq, taamaalilluni angajullerni atuartut meeqqat atuarfiata

naammassineqarnerata kingorna ilinniarnissamut periarfissaminut pitsaasumik sukumiisumillu paasisimasaqarnissaat qulakkeerneqarluni.

2.6.3 Oqaatsit pillugit periusissaq

Naalakkersuisut kissaatigaat oqaatsigut ilitsoqqussagut, kalaallit oqaasii nukitorsarneqassasut. Tamanna pisortat ingerlatsiviini, inuussutissarsiortuni namminersortuni aamma inuiaqtigiani aamma kulturikkut oqaasiisut.

Naalakkersuisut inatsisikkut kiisalu suliniutitigut allatigut qulakkeerniarpaat innuttaasut ataasiakkaat namminneq oqaatsiminnik sullinneqassasut. Anguniagaq taanna tapersorsorniarlugu inutsigut aningaasatigullu nukiit allatut tulleriaarnissaat pillugit Inatsisartunik Naalakkersuisut oqaloqatiginnissapput.

Naalakkersuisut oqaatsit nukittunerulersinnissaanni ineriertinnerinilu Oqaasileriffiup inissisimanera nukitorsarniarpaat. Tassunga atatillugu oqaatsit inunnut amerlanerusunut paasiuminartungortinniarlugit qarasaasiaqarnikkut atortorissaarutini periarfissat nutaat Naalakkersuisunit immikkut isiginiarneqarput. Tamanna oqaatsinik atuartitsinermi, digitalikkut atorneqarsinnaaneri, taaguutit nalunaarsuiffinni nutarterneqartarnerini aamma digitali atorlugu nutserinermi atortutut, pitsaassuseq assigiissaarinerlu qulakkeerneqarluni.

Naalakkersuisunit pingartinneqarpoq innuttaasut nunat allamiut oqaasiinik atuisinnaanerannik periarfissaat nukitorsarneqassasoq, iliniarfinni aamma pikkorissarnikkut. Pingarpoq nunani tamalaani pisinnaanngorluta oqaatsitigut suli piareersartuassasugut, aamma pingaartumik suliniutit annertuut suliffissanik periarfissiisinnaanerat iluaqtigalugu.

2.6.4 15-18-inik ukiullit

Inuusuttorpassuit meeqqat atuarfiannit anereernerup kingorna suli ilinniagaqarsimanngillat, amerlasuullu inuusuttut ilinniarfiini aallartinnissamut kingusissumik aallartittarlutik. Taamaalilluni 2012-imi meeqqat atuarfianni soraarummeertut 44 %-ii toqqaannartumik ilinniarfinnut ingerlaqqinngillat. Peqatigisaanik 16-19-inik ukiulinni taamaallaat 30 %-it inuusuttut ilinniarfiini aallartissimapput. Taakku saniatigut arlallit meeqqat atuarfiata kingorna ukiumi ataatsimi efterskoleriartarput. Nunatsinni efterskolit marluusut atuartunut 150-inut inissaqarput, atuartullu 250-it missaaniittut Danmarkimi efterskoleriartarlutik ukiut tamaasa aallartarlutik.

Ukiuni 2013-2016-imi ilinniarfeqarfiit avataaniittunut 15-18-inik ukiulinnut immikkut ittumik suliniuteqarnissaq Naalakkersuisunit salliutinneqarpoq. Suliniutip kingunerisaanik ilaatigut efterskolumukartartut aamma højskoleriartartut immikkut ilaneqassapput aamma pikkorissaanernik ingerlatsinerit arlaliussallutik. Aammattaaq databasemik pilersitsisoqassaaq, suliniutit aallartinneqartut pillugit pitsaanerusumik ilisimasatigut tunngavissiinissamik siunertaqartumik. Inuusuttunut pitsaanerusumik annertunerusumillu ilitsersuussinissaq kissaatigalugu Naalakkersuisut 2013-imi ilitsersuisutut ilinniartitaanermi tiguneqartartut amerlinissaannut aningaasanik

immikkoortitsipput kiisalu meeqqat atuarfianni ulloq naallugu ilitsersuisumik misileraanissamut aningaasanik atugassiisoqarluni.

2.6.5 Inuuusuttunut ilinniarfuit

Inuuusuttunut ilinniarfuit ilinniartunik isertunik amerliartuinnartunik misigisaqarput. 2005-imut naleqqiullugu 2012-imi ilinniarnermik ingerlataqartut 47 %-imik amerlanerupput, aamma 2005-imut naleqqiullugu 2012-imi ilinniarnertuunngorniarfinni imaluunniit inuuussutissarsiuutinut ilinniarfinni naammassinnittut 80 %-imik amerlanerullutik. Qaffariarneq annertunerpaaq ilinniarnertuunngorniarfinni pivoq, iluarsartusseqqinnermi nutaami august 2012-imi ilinniartut siullit aallartillutik. Iluarsartusseqqinnermik nalilersuineq 2013-imi aallartissasoq pilersaarutaavoq.

2013-imi ukiakkut ataatsimiinnermi ilinniartitaanernut aamma inuuussutissarsiuutinut ilitsersuineq pillugit Inatsisartut inatsisissaattut siunnersuut Naalakkersuisut saqqummiutissavaat. Inuuusuttut pingaartumik ilinniakkamik kukkusumik toqqaasarneq annikillisinniarlugu aamma inuuusuttunut ilinniarfinni unitsitsisartut pingaartumik ikilisinniarlugit ilitsersuussinermik annertunerusumik aallussinissamik inatsit aallaaveqarpoq. Inatsimmiipput ilaatigut ornigulluni ilitsersuinissamut suliniutit, ataatsimoortunik ilitsersuineq aamma meeqqat atuarfiisa, Piareersarfii aamma ilinniarfeqarfeqarfiit akornanni ilitsersuussinikkut suleqatigiinnerit.

Inuuussutissarsiuutinut ilinniartitaanermi ajornartorsiuut annertooq tassaavoq suliffimmi sungiusarnissamut inissanik amigaateqarneq. Inuuussutissarsiuutinut atuarfiit missiliorpaat 2013-imi piumasaqartunut naleqqiullugu suliffimmi sungiusarfissanik 375-nik amigaateqartoq. Peqatigisaanik inuuussutissarsiorut sulisinnaasunik ilinniagaqarsimasunik ujartuipput. Amerlanerusut inuuussutissarsiuutinut ilinniarsimanissaat aamma meeqqat atuarfiata kingorna sukkanersumik ilinniarnermik aallartissimanissaat pillugu immikkut suliniuteqarnissaq Naalakkersuisut kissaatigaat. Ullumikkut inuuussutissarsiuutinut ilinniarfinni ilinniartut agquaqatigiissillugu 25-nik ukioqarput.

Amerlanerusut inuuussutissarsiuutinut ilinniarnermik aallartitsisinniarlugit 2013-imi immikkut suliniutini suliffimmik misiliilluni inissanik amerlanerusunik pilersitsinissamut aningaasanik immikkoortitsisoqarpoq. Atuarfimmiilluni suliffimmik misiliiffittut atortut allilerneqarnissaannut aamma Danmarkimi suliffimmik misiliinermi inissanik pissarsinissamut aningaasat atorneqassapput. Taaku saniatigut 2014-imut Aningaasanut Inatsimmi Naalakkersuisunit siunnersuutigineqarpoq atuarfimmiilluni suliffimmik misiliiffinnik aaqqissuussinerit ineriartinnissaannut atorunnaarsinnissaanullu aningaasanik immikkoortitsisoqarpoq aamma pisortat pisiortorneri pillugit pisiortornermi kaajallaasitap allanngortinnissaa piareersarlugu, taanna aqqutigalugu suliffinnik misiliinermi inissat amerlanerit qulakkeerneqarlutik. Lærlinginik atuineq pillugu maannakkut nalunaarut nutarterneqassaaq, taamaalilluni sanaartornernut angisuunut atatillugu lærlinginik atuinermut piumasaqaatit aamma lærlinginik nakkutiliinerit nukittorsarneqarlutik. Aatsitassanut tunngasuni IBA (Impact and Benefits Agreements) isumaqatigiissutini ilinniarnermi inissat amerlanerusut aamma qulakkeerniarneqarput.

Ilinniarnertuunngorniarlutik aallartittut ilinniartut 54 %-ii angusisarput, inuussutissarsiutinilu ilinniartitaanermi ilinniartut 44 %-ii angusisarlutik. Ilitsersuisarnerup pitsaanerulersinneratigut Naalakkersuisunit ilungersuutigineqarpoq siunissami amerlanerusut ilinniakkamik eqqortumik toqqaasassasut taannalu aqqutigalugu naammassinnittartut procentiat qaffallugu. Peqatigisaanik tarnip pissusaatigut inuttullu ilinniartunut siunnersuisoqartarnissaq ilinniarfeqarfinnit ujartorneqarpoq. Tamatumunnga pissutaavoq ilinniarfeqarfiiit tarnikkut inuttullu ajornartorsiuteqartunik arlalinnik iliniartuuteqarnerat. Naalakkersuisut taamaattumik 2014-imut Aningaasanut Inatsimmi siunnersuutigaat nuna tamakkerlugu tarnip pissusaatigut inuttullu ilinniartunut siunnersuisarfimmik pilersitsisoqassasoq, immikkoortumi suliniuteqarneq annertusiniarlugu, taannalu aqqutigalugu taamaatitsisarnerit annikillisillugit.

Ilinniartitaanermut, Ilageeqarnermut, Kultureqarnermut Naligiisitaanermullu Naalakkersuisoqarfiup ilinniartitaaneq pillugu pilersaarut tamarmiusoq nutaaq pillugu saqqummiussassaq 2014-ip aallartinnerani naammassisavaa, ilaatigut nunami maani nunanilu allani ilinniartitaanermi ingerlatat akornanni oqimaaqtigiinneq pillugu apeqqummut isummersortussaq.

2.7 Meeqyat Inuusuttullu

Meeqyanut inuusuttunullu tunngasuni immikkut suliniutit annertunerusut kommunit ilanngutitinnissaannik, pitsaanerusumik ilisimasat tapertariissinnissaat ataqtigiaissaarinissarlu isiginiarpaat, kiisalu pingaartumik ilaqtariinni katsorsaavinni ilaqtariinnullu højskolini ilaqtariinnik katsorsaalluni sulineq.

Ukiuni kingullerni ilaqtariinni katsorsaavinni sulisunut piginnaanngorsaaneq paasisassarsiorlunilu angalanerit ingerlanneqarsimapput. Suliniutit taakku suliatigut ineriertortitsinerup saniatigut nuna tamakkerlugu annertunerusumik ilisimasat tapertariissinnerinut ilisimasanillu avitseqatigiinnermut iluaquataasimapput. Ukiumi aggersumi Naalakkersuisut, kommunit suleqatigalugit, ilaqtariinnik katsorsaaviit sulinerisa ineriertorteqqinnejarnissaat pillugu pilersaarusiussapput.

Immikkut atugarliortut tassaapput meeqyat atoqatigiinnikkut atornerlunneqarsimanermikkut kinguneqarnerlutsitsisunik angajoqqaallit, ulluinnarni inuunerup isumaginissaanik ajornartorsiuteqartut. Taamaattumik tarnip pissusaanik ilisimasallit katsorsaasartullu angalaqatigiittartut pilersinneqarput, atoqatigiinnikkut atornerlunneqarsimanermik kingusissukkut sunniutaanni inersimasunik katsorsaanermik neqerooruteqarsinnaasut. Tamatuma inersimasut meeqqaminnik perorsaanermik isumaginninnissaannik nukissaqarnerulersippai taamaalillunilu meeqyat atuagarissaarnerat siuarsarlugu.

Nuna tamakkerlugu meeqyanut inuusuttunullu neqeroorutit pitsaanerusut qulakkeerniarlugit isorliunerusuni ornittakkat ukiuni aggersuni annertunerusumik isiginiarneqarput. 2013-imi

upernaami immikkoortup qulaajaaffiginissa immikkut siunertaralugu ornittakkani atorfeqartut pillugit attaveqarfuit ataatsimiisinneqarput.

Angajoqqaarsianut tunngasuni ukiumi qaangiuttumi angajoqqaarsiat pillugit isumasioqatigiissitsisoqarpoq, pikkorissarneq, siunersiuineq ilisimasanillu avitsineq isiginiarlugit. Naalakkersuisut angajoqqaarsiat pillugit pikkorissarnissamut ilinniarnissamullu periarfissat siunissami salliuutinnissaat ineriertortinnissallu kissaatigaat.

Kommunini sulianik suliarinninneq isiginiarneqassaaq. Kommunit isumalluutitigut suliatigullu meeqlanut inuuusuttunullu tunngasuni suliniutinik kivitsinissamut piareersimassapput, pingartumik meeqlanut inuuusuttunullu atugarliornerpaanut naleqqiullugu. Taamaattoqanngippat suliniutit aallartinneqareersimasut killeqartumik sunniuteqaratarsinnaapput.

Immikkoortumi inatsisitigut isumannaatsuunerup annertusinissa pingaartinneruneqarniarpoq kiisalu meeqlanut inuuusuttunullu ikorsiisarneq pillugu inatsisartut inatsisaannut siunnersuummi sulianik suliarinnittarneq nukittorsarniarlugu, tamatuma UPA 2014-imi saqqummiunneqarnissa pilersaarutaalluni. Aammattaaq Meeqlanut Inuuusuttunullu Periusissaq 2014-imut ukiunullu tulliuttunut aningaasat inaarutaasumik salliuutinneqarnissaannut siunnersuusiorqarluni, meeqlanut inuuusuttunullu naleqqiullugu immikkut suliniutinut aningaasanik immikkoortitsinerup nalilersuinermut naammasseqqammersumut atatillugu Naalakkersuisunit suliarineqartussaq. Tassunga atatillugu siusissukkut suliniuteqarneq pitsaliuinerlu isiginiarneqassapput.

Pissaanermik atuineq pillugu inatsisartut inatsisaata nutaap, 2014-imi ukiakkut ataatsimiinnermi suliarineqartussatut ilimagineqartup, meeqlanut angerlarsimaffiup avataani inissinneqarsimasunut, taamaattorli angajoqqaarsiani meeqlanut inissinneqarsimannngitsunut, pissaanermik atuisarneq malittarisassaliussavaa. Peqatigisaanik isumaginninnermi inatsisitigut maleruagassat malillugit inuttut suliatigullu ikiorserneqartunut kiisalu inuttut perorsarneqarnikkut ikiorserneqartunut il.il. inersimasunut annertuumik ataavartumillu tarnikkut pisinnaanerat apparsimasunut pissaanermik atuisarneq inatsimmi malittarisassiuunneqassaaq. Immikkoortoq siusinnerusukkut inatsisiliqfigineqarsimannngilaq, tamannalu inatsisitigut isumannaatsuunissakkut ajornartorsiutaasimalluni.

2.8 Utoqqaat

Utoqqaat atugaat pillugit Naalakkersuisut misissuiniarput, utoqqaat inuuneranni atugaasa pitsaanerulersinnissaat pillugu pilersaarummut tunngavissaliinissaq siunertaralugu.

Naatsorsueqqissaartarfiup innuttaasut siumut naatsorsuinerata takutippaa innuttaasuni utoqqaat ukiuni aggersuni amerliartussasut. Taamatut amerliartornerat taamaaqataanik inuussutissarsiorsinnaasut amerlinerannik illuatungilerneqanngilaq. Utoqqalinersiutini aamma utoqqarnik isumassuinikkut neqeroorutini atugarissaarnikkut tunniuttakkanik pingaruteqartuni

pisortat missingersuutaannut tamannut imaannangitsuussaaq, taakkumi utoqqaat naleqqulluartumik inuuneqarnissaannik qulakkeerisussaammata.

Innuttaasuni soraarnerussutissiaqarnissamut ileqqarnissamut soqutiginninneq Naalakkersuisunit qaffanniarneqarpoq kiisalu utoqqarnut immikkut isertitaqarnissamut periarfissat pitsaanerulersinnissaat sulissutigerusullugu.

Utoqqlinersiutit pillugit inatsisip nutaap kiisalu utoqqarnut paaqqinniffiit il.il. pillugit inatsisip nutaap piareersarnissaa pilersaarutaavoq. Utoqqaat amerliartortut aamma isumaqarpoq innuttaasut amerlanerusut aamma puigortalernermik eqqorneqassasut, taamatut ineriartorneq Peqqinnissaqarfiup kiisalu kommuninit siumut sammisumik aaqqissuussiffigisariaqarpaat. Tamanna tunngavigalugu puigortarneq pillugu pilersaarummut siunnersuut Naalakkersuisunit saqqummiunneqassaaq. Inuit katitigaanermikkut ineriartornerat, utoqqaat amerlanerulerlutik, aamma napparsimasarnernut aamma Peqqinnissaqarfiup aningaasartuutitigut tatisimaneqarneranut sunniuteqassaaq. Utoqqarnut atugarissaarnikkut tunniuttakkat taamaattumik Nuna tamakkerlugu peqqinnissakkut periusissap ilaatut ilaasariaqarput.

Aamma utoqqarnut tunngasuni sanaartornermi ingerlataqarfik pillugu pilersarusiorqassaaq, innuttaasut katitigaanerisigut allanngortoqarnerata malitsigisaanik ukiuni aggersuni utoqqarnut inissiani paaqqinniffinnilu pisariaqartumik aningaasaliinissanik pilersarusiornermi pitsaanerulersitsinissarlu nukittorsarniarlugit.

2.9 KNR

2012 pillugu KNR-p naatsorsuutaasa takutippaat tusagassiisarfik ukiuni naatsorsuusiorfiusuni kingullerni marlunni ingerlatsinermi aningaasartuutit annikillisinneqarnissaannik annertuumik aallussisimasoq. Ilungersuuteqarnerit taakku 2012-imi sunniuteqarput tassani KNR 3,9 mio. kr.-inik sinneqartoorluni. Tamanna ajunngitsumik angusaq malunnarpoq, ukiunilu naatsorsuusiorfiusimasuni kingullerni marlunni KNR-ip suliniuteqarsimanera Naalakkersuisunit iluarisimaarneqarluni.

KNR-ip aningaasaqarnera ukiuni arlalinni ilungersunartuusimavoq. Piffissami 2000-miit 2012 ilanngullugu KNR katillugit 21 mio. kr.-it sinnerlugit amigartoorteqarsimavoq, naak piffissami 2011-mit akit malillugit 62,5 mio. kr.-inik ukiumut tapiissutisisaraluuarluni.

2012-imi decembarip naanerani KNR katillugit 19,5 mio. kr.-inik ajortumik nammineq aningaasaateqarpoq. Ukiuni kingullerni tallimani naatsorsuutini inernerit tabel 7-imi takutinneqarput.

Tabel 7: KNR Naatsorsuutini inernerit 2008-2012

Ukioq naatsorsuusiorfik	2008	2009	2010	2011	2012
1000 kr	-1.286	-1.646	-1.984	-1.908	3.872

Paasissutissarsiffik: Ilanniartitaanermut, Ilageeqarnermut, Kultureqarnermut Naligiisitaanermullu Naalakkersuisoqarfik

KNR-imi aqutsisut 2011-mi tusagassiorfimmi piginnaasat naleqqussarlugit aningaasartuutillu ikilisinniarlugit suliniutinik arlalinnik aallartitsippu. Anguniagaq tassaasimavoq aningaasaqarnerup pitsaanerulernissaa, ineriartortitsilluni suliassanut nukissat immikkoortinnissannut tunngavissanik pilersitsiniarluni.

KNR akiitsumigut akilersuisinnaasimangimmat Naalakkersuisut 2012-imi aalajangerput akiitsut sisamararterutaat ukiut tamaasa nalikillisarnerisigut ukiuni sisamani nusutsisinnaaneri atorunnaarsinneqassasut.

2013-imut aningaasaqarnikkut sammivik sukangasooq aalajangiussimaneqassaaq, aamma aqutsisunik nutaanik Inunnik sullissinermi naamassisassat pillugit nutaamik isumaqatigiissusiortoqarluni.

2014-imut Aningaasanut Inatsisissatut Siunnersuummi allamik inissarsinissamut / KNR-ip illutaanik nutaamik sanaartornissamut aningaasanik immikkoortitsisoqassaaq, annertuumik oquuttoqarnera pissutigalugu suliffeqarfittut naleqqukkunnaartitsisoq. Aamma teknikkut atortut nutaat pisariaqarnersut taamaattoqassappallu qanoq aningaasalersorneqassanersut isummertoqassaaq.

2.10 Uumasut nakorsaqarnikkut aamma nerisassat isumannaatsuunissaannut upalungaarsimanerup nukittorsarnera

Namminersorlutik Oqartussat Kalaallit Nunaanni uumasut nakorsaqarnermi aamma nerisassat isumannaatsuunissaannut tunngasunut akisussaapput – tassa uumasunik, inunnit nerisassanillu ingerlanneqartunik nappaatinik aamma siunertaanngitsunik pisunik nakkutiliineq, pitsaliuineq killeqartitsinerlu kiisalu nunanut tamalaanut pisussaaffiit naapertorlugin nalunaaruteqarnissamut pisussaaffiit (OIE, WHO il.il.).

Uumasut nakorsaqarnikkut upalungaarsimaneq

Innuttaasut uumasullu peqqissuuneranni pitsaliuiniarluni siunissamut qulakkeeriniarluni uumasuni nujuartani aamma nujuillisarneqarsimasunik uumasut nappaataasa/nappaatit tunillannartuni nakkutiliinerup nappaammillu suussusersiinerup nukittorsarnissaa pisariaqarpoq. Ukiup tulliuttup ingerlanerani Naalakkersuisunit naatsorsuutigineqarpoq tamanna pillugu ataatsimoortumik pilersaarummut siunnersuut saqqummiunneqassasoq. Tamanna pissaaq nuna tamakkerlugu nunarsuarmilu oqartussat attuumassuteqartut suleqatigalugit.

Nerisassat isumannaatsuunissaanni upalungaarsimaneq

- Nerisassat isumannaatsuunissaat pitsaanerulersinniarlugu Naalakkersuisunit kissaatigineqarpoq nerisassanik eqqussuinermi nalunaarsuiffik annertusarneqassasoq, suliffeqarfiit, inuussutissarsiutigalugu piniartut aalisartullu pingaarnertut tunisassiortutut upernarsaateqalissasut kiisalu
- erngup pitsaassusaatigut paasissutissat tamarmik katersorneqassasut (tassunga ilanggullugit akoorutissanik eqqiluisaarnermillu nakkutiliinermi inernerit).
- Imeq pillugu lobaratoriap suliatigut ilisimasai tunniussaalu nukitorsarneqarlutik.

Nerisassat isumannaatsuunissaanni pisariaqarpoq Nunamit/Kangerlummiit nerrivimmik eqqarsarnermi – aarlerinartuusinnaasunik aqtsilluni suliniutit – paasineqarnissaat ataatsimoortumillu nalilersuinerit, immikkoortut tamarmik ilanggutitinneqassallutik. Tamanna piumasaqarpoq – tassa tunngaviusumik eqqiluisaarnermi ilinniartitaaneq aamma nammineq nakkutiliisarnerup pingaaruteqarnera.

Naalakkersuisut taamaattumik tamanna tapersorsorniarlugu qaammarsaanerup, ilinniartitaanerup suliniuteqarnerillu annertusinissaannut suliniuteqarusupput.

Pingaarnertut tunisassiortunik kiisalu nakkutiliinermi teknikerinik ilinniartitaaneq nunatsinni ilinniartitaanermut aningasaareersut aqqutigalugit pisinnaavoq immaqalu EU-mit aningaasat pissarsiarineqarsinnaasut aqqutigalugit aamma ilaatigut INUILI suleqatigalugu ingerlanneqarsinnaallutik. Uumasut nakorsaqarnikkut nerisassatigullu upalungaarsimancerup nukitorsarnera pingaartumik atuisut akiliuteqarnerisigut pissaaq, tamanna nunani tamalaani nalinginnaasumik atugaalluni.

Sunniutinik uuttuineq

Uumasut nakorsaqarnikkut nerisassatigullu tunngasut nukitorsarnerat allatigut nuna tamakkerlugu peqqinnissakkut periusissami pilersaarutit nukitorsassavai. Uumasut nakorsaqarnikkut nerisassatigullu tunngasuni tamarmiusuni suliniutissatut ilimagineqartunik sunniutinik uuttuineq ilaatigut tassaassaaq:

- Kalaallit Nunaanni nerisassanik kaavliaartitsineq annertunerusoq isumannaannerusorlu.
- Suliffeqarfiit inuussutissalerisut namminersortut amerlanerusut ullutsinnut naleqquttunik nammineq nakkutiliinermik atortoqartut – naammassisqaqsinnaassuseq qaffasinnerusoq.
- Uumasunik illersuinermi suliak ikinneerusut, tassunga ilanggullugit kiitinnerit tamatumalu malitsigisaanik toqnerit.
- Qimmini qimuttuni allanngutsaaliuinermik atugarissaarnermillu nalinginnaasumik aallussinerup qangali inuussutissarsiut, takornariaqarneq kiisalu kulturikut imminut paasineq nukitorsassavaa. Nerisassatigut kusanaatsuliornerit, inuussutissatigut ingerlanneqartut nappaait toqusarnerillu ikinneerusut.

2.11 Nuna Tamakkerlugu Peqqissutsimut Periusissap piareersarnera

Peqqinnissaqarfik ingerlaavartumik ilinniakkatigut, utoqqaliartornikkut aamma aningasaqarniarnikkut unammilligassanut naleqqussartuartariaqarpoq. Taamatut naleqqussarnissamut peqqissutsimut nuna tamakkerlugu pingaarnerusutigut periusissiaqarnissamik pisariaqarpoq tassani peqqinnissaqarfip ilisarnaatigisassaanik oqartussaaffigisallu pingaarnersiorlugit aalajangersaassalluni.


Nuna tamakkerlugu peqqissutsimut periusissiamit matuminnga siunertarineqarpoq peqqinnissaqarfimmik ataqtigiissumik ineriartortitseqqinnissaq, tassani innuttaasoq qitiutinneqarluni aammalu peqqinnissamut sullissineq inuttaasumut apuullugu.

2014-imiit 2017-imut nuna tamakkerlugu peqqissutsimut periusissiap Peqqissutsimut Attaveqarnermullu Naalakkersuisoqarfip peqqinnissaqarfik suleqatigalugu periarfississavaa ukiunut aggersunut sulinerup pilersaarusiornissaanut aallunnerulernissaanullu. 2014-imiit 2017-imut nuna tamakkerlugu peqqissutsimut periusissaq 2014-imi upernaakkut ataatsimiinnermi Inatsisartunut agguaanneqassaaq. Periusissaq taamatut ittoq tassaavoq peqqinnissamut tunngasuni pingaarnersiuinerit pillugit politikkut oqallinnissamut aallaavissaq, tassunga ilanngullugu taassuma Inatsisartuni tassanilu ataatsimiititaliamik suliarineqarnera. Peqqissutsimut Attaveqarnermullu Naalakkersuisoqarfik periusissamut akisussaavoq aamma naalakkersuisoqarfif attuumassuteqartut allat ilanngutitissallugit.

Sulinerup ingerlaqqinnerani takorluugaq tassaavoq: 'Innuttaasoq qitiutillugu – siunissamut qulakkeerneqarsimasoq peqqinnissaqarfik'.

Nuna tamakkerlugu peqqissutsimut periusissaq pingaarnertigut periusissanut eqiteruffiussaaq, pitsaliuineq qaammarsaanerlu, katsorsaaneq, suleriaatsinik pisariillisaaneq aamma IKT aamma telemedicin ataatsimut katarsorlugit. Taakku periusissianut arlalinnut tunngasuupput, ingerlaavartumik naalakkersuisoqarfif akornanni pilersinneqarlutillu aallartinneqartussat. Puigortalerneq, kræfti, imigassaaq, imminortarneq aallartinneqareerput imaluunniit aallartinneqartussaallutik. Pilersaarutit ingerlaavartumik innuttaasut peqqinnissakkat qanoq inisisimancerannut pingaarnertut takussutissat assigiinngitsut nalilersorneqartassapput. Isumalluutinik kinguneqarluartumik atuinissaq qulakkeerniarlugu nuna tamakkerlugu peqqissutsimut periusissamut aamma immikkoortuni suliniuteqarfissanut immikkut pilersaarutinut atatillugu sunniutinik ingerlaavartumik uuttuisoqartassaaq. Periusissat atulersinneqartut taamaalilluni nalilersorneqassapput aamma peqqinnissaqarfimmut politikkut anguniakkat anguneqarsimanersut takuniarlugit misissorneqassallutik.

Takussutissiaq 5



Paassisutissarsiffik: Peqqissutsimut Attaveqarnermullu Naalakkersuisoqarfik.

Tabel 9-mi siulianiittumi innuttaasut peqqinnissakkut qanoq ittuunerinut takussutissat allanneqarput.

Tabel 9: Innuttaasut peqqinnissakkut qanoq ittuunerinut takussutissat

Peqqissutsimut takussutissat

Nammineq peqqissuunermik naliliineq

Nammineq peqqissuuneq isumaqarfingineqarpooq:

Pitsaalluinnartoq	19,8 %
Ajunngitsoq	45,4 %
Naammakannersoq	32,2 &
Ajortoq/ajortorujussusoq	2,6 %
Katillugit	100 %

Innuttaasut 1000-iuppata toqusartut (Innuttaasuni toqusoqartarneq)

2006: 14,2

2010: 11,5

Agguaqatigiissillugu ukiut inuuffiusussat

arnat: ukiut 72,87

angutit: ukiut 68,18

Uummatip taqarsuatigut nappaatit

2001-2004: uummatip taqarsuatigut nappaatit malitsigisaannik toqusartut amerlinerat

2008-2010: uummatip taqarsuatigut nappaatit malitsigisaannik toqusartut amerlassusaasa appiarinerat

Peqqinnissakkut aningaasatigut takussutissat

Kalaallit Nunaanni angerlartitsinerit

Rigshospitalimi napparsimasumut ataatsimut ullut uninnganerit

2008: ullut 7,38

2012: ullut 5,76

allannguut: -22 %

Innuttaasumut ataatsimut peqqinnissaqarfimmi aningaasartuutit

2008: 18.851 kr./innuttaasut

2012: 19.598 kr./innuttaasumut (2008-mi akinut naatsorsorlugit)

allannguut: 12,8 %

Taartaasartut allaffiinit atorfinit sitanut aningaasartuutit

2008: 71 mio. kr.

2012: 15 mio. kr.

allannguut: -56 mio. kr.

Rigshospitali uninnganermi ullormut akit

2008: 17.760 kr./ullormut

2012: 21.270/ullormut

Nakorsaatinut aningaasartuutit

Ukiumut agguaqatigiissillugu qaffariarneq 6,23 % (2001-2012)

PL qaffariarneq: 2,68 %

Pitsaliuineq Peqqinnissakkut takussutissat

Imigassaaq

2012-imi imigassanik pilersuineq:

Inummut 9,65 literi

(assersuutigalugu 1987-imi imigassamik pilersuineq: inummut 22,23 lite

Pujortarneq

Angutit 65 %-ii pujortartarpot

Arnat 68 %-ii pujortartarpot

2012: inummut ataatsimut ulloq unnuamat 4,22 cigarettit (1994-imiit
affaannanngorluni)**Imminornerup malitsigisaanik toqusoqarnera**

Imminortut amerlassusaat. Ukiumut imminortut 50-it missaaniittut
angutit 2/3-iupput.

Pissarsiffiusoq: Peqqissutsimut Attaveqarnermullu Naalakkersuisoqarfik

2.12 Silap pissusaa, Nukissiorneq Avatangiisillu

Nukik pillugu kisitsisitigut paassisutissat, ukiut tamaasa saqqummiunneqartartut, kiisalu NP ataanni silap pissusaa pillugu isumaqatigiisummi Kalaallit Nunaata aniatitsinera pillugu nalunaarutit, silap pissusaa nukissiornermullu tunngasuni annertussutsitigut pitsaasumik paassisutissiippuit. Silap pissusaatigut suliniutit aamma nukimmik pilersuinita isumannaatsuunerata sunniutit pillugit paasisaqarnerput nukittorsarniarlugu naleqqutissaaq kisitsisit pingaarutillit marluk ineriantorneri suliaqarfigineqarpata, tassa 1) kissatsittoornermiit gassnik aniatitsineq, aningaasarsiornikkut siuariantornermut naqqiiffagalugu aamma 2) pisortat atuinerisa nukimmik ataavartumik aningaasaliinerat. Takussutissat pingaarumik imaqarnissaat qulakkeerniarlugu kissattoornermiit gassnik aniatitsineq aningaasarsiornikkut ineriantornermut atatillugu isigineqartariaqarpoq. CO₂-mik aniatitsineq amerlanertigut aningaasarsiorneq siuariantorneq naapertorlugu annertusiartortarpoq. Isumannaatsumik silap pissusaatigut politikeqarnerup taakku marluk akornanni assigiimmik alliartornikkut ataqtiginnerat annikillivaa taamaalillunilu

aninggaasarsiornikkut siuariartorneq killeqartumik silap pissusaatigut artukkiilluni. Piviusumi assersuutigalugu tamanna pisarpoq suliffissuit nutaat nukimmik ataavartumik tunngaveqartinnerisigut. Nukimmi ataavartumi aningaaasaliinerit nukimmik pilersuinitta siunissamut qulakkeerinermut annertuumik takussutaapput aamma kissattoornermiit gassinit aniatitsinerput, partikelink mingutsitsineq aamma uuliamik eqqussuinermi isumalluuteqarneq annikillisillugu.

Silap pissusaanut tunngasumi nunat tamalaat isumaqtigiinniarerat naalakkersuisunit tapersorsorneqarpoq, tassani siunertarineqarluni silaannarsuarmi kissattoornermi gassit qaffasissusiannik patajaallisaanissaq. Silap pissussaa pillugu isumaqtigiissutip ataani sulineq uunga killippoq ilusissaa nunarsuaq tamakkerlugu silap pissusaa pillugu isumaqtigiissutissaq 2015-imi akuerineqartussaq inissikkiartulerluni.

2015-imi COP21-p tungaanut ataatsimiinnerit pingaarutilit arlallit ilimagineqarput, Naalakkersuisut peqataanissaat piumasarineqarluni, isumaqtigiinniarnerillu erseqqissarneqarneri naapertorlugit Kalaallit Nunaata piumasaqaatit suut tunngavigalugit nunarsuaq tamakkerlugu silap pissusaa pillugu isumaqtigiissutissami ilaarusunnera pillugu kiisalu tamatuma inuiaqtigiinnut kingunissai aningaaasatigullu kingunissai eqqarsaatigineqartariaqarput.

Kalaallit Nunaata kissattoornermiit gassinik aniatitsinera 2011-mi 763.827 tons CO₂-ækvivalentinut naatsorsorneqarpoq. Tassa 1990-imut naleqqiullugu 15,8 pct.-imik qaffariarneq, ukioq taanna Kyotomi isumaqtigiissummut tunngaviulluni. Naak erngup nukinganik nukissiorneq 2010-mi aamma 2011-mi qaffakkaluartoq kissattoornermiit gassinik aniatitsineq tamarmiusoq 2010-mi malunnartumik qaffariarpoq aatsaallu taamak 2011-mi qaffasitsigilerluni. Tamatumunnga pissutaavoq Kalaallit Nunaata kitaani uuliamik misissuinernut atatillugu nukimmik atuineq.

Ukiuni aggersuni inuussutissarsiornikkut annertunerusumik Kalaallit Nunaat ineriartussappat ilaatigut aluminiumik aatsitsivimmik pilersitsisoqarneratigut, uuliamik gassimillu piaanerit aallartinnerisigut, aatsitassarsiornerit annertuut ineriartortinnerisigut aamma uliamik ujaasinerit ingerlatiinnarnerisigut, tamanna nuna tamakkerlugu aniatitsinermut malunnartumik kinguneqassaaq aamma Kalaallit Nunaata aniatitsinera arlaleriaammik annertusissinnaallugu.

2.12.1 Silap pissusaa pillugu isumaqtigiissut nutaaq

NP-ip silap pissusaa pillugu isumaqtigiissutaata nunat tamalaat silap pissusaa pillugu ataatsimeersuarnerit 18-issaat Qatarimi, Dohami 2012-imi ingerlanneqarpoq, peqataasullu aalajangerlutik Kyotomi isumaqtigiissut piffissamut 2013-imiit 2020-mut sivitsorneqassasoq nunarsuaq tamakkerlugu silap pissusaa pillugu nutaamik isumaqtigiissusiortoqanngimmat. Taamaattorli nunat ikittuinnaat, nunarsuaq tamakkerlugu kissattoornermiit gassinik 15 %-ip missaanik aniatitsisut tapiliussap piffissaata aappaani pisussaaffilerput.

Ineqarnermut, Attaveqarnermut Angallannermullu Naalakkersuisup ulloq 2. oktober 2012-imi Kyotomi isumaqtigiissummut tapiliussap piffissami pisussaaffiusup aappaata nunatsinniit atortussanngortitsineranut atatillugu Danmarki Kalaallit Nunaat sinnerlugu nunamut

nangaassuteqarnissaa pillugu silap pissusaanut, nukissiornermut sanaartornermullu ministerimut noqqaassut pisortatigoortumik tunniuppaa. Noqqaassut taanna 2013-imik ukiakkut ataatsimiinnermi Inatsisartunit akuerineqassasoq ilimagineqarpoq.

Nunamut nangaassuteqarneq pillugu Kalaallit Nunaata noqqaassuteqarnerata piviusunngortinnerra imatut kinguneqassaaq Silap pissusaas pillugu isumaqatigiissummi 2013-imiiit 2020-mut nunat tamalaat annikilliliinissamut pisussaaffeqarnikkut Kalaallit Nunaat pituttorsimassanngitsoq. Taamaalilluni isumaqatigiissut Kalaallit Nunaannit ajortumik aningaasatigut kinguneqartitsissanngimmat, assersuutigalugu CO₂-mik akiitunik pisiaqarnissamut piumasaqaateqarnikkut.

Silap pissusaas pillugu isumaqatigiissummi aamma aalajangerneqarpoq 2015-imik nunarsuaq tamakkerlugu aamma inatsisitigut pituttuisumik silap pissusaas pillugu isumaqatigiissusiorqassasoq, Silap pissusaas pillugu isumaqatigiissummut tapiliussami peqataasunut tamanut 2020-miit sunniuteqalersussaq. Kalaallit Nunaat eqqarsaatigalugu ukiuni tulliuttuni nunarsuaq tamakkerlugu silap pissusaas pillugu isumaqatigiissut Kalaallit Nunaannut sutigut sunniuteqassanersoq erseqqissaalluni suliaqartoqartussaassaaq, isumaqatigiinniarnerit erseqqissiartornerat naapertorlugu paasinarsisussat.

2.12.2 Nukissiorfiit aktiatigut piginneqatigiiffinngorlugit allanngortissinnaanerat

Nukissiorfiit nalinginnaasumillu pilersuinermik ingerlataqarfiup aaqqissuunneqarnerat 1998-imili allanngorsimanngilaq. Pilersuinermut tunngasut naleqqunnerpaamik aaqqissuunneqarsimanersut nalilersornissaat pisariaqarpoq, ullumikkut innaallagiamik, imermik kiassarnermillu pilersuinermi unamminartuni Naalakkersuisut nukissiornikkut naalakkersuinikkut ingerlatsinermi anguniagaasa piviusunngortinnissaannut naleqqiullugit.

Piginnittut aaqqissugaanerat nutaaq niuernermut tunngaveqartumik ingerlatseqatigiiffiup aqunneqarnera nukittorsarsinnaavaa, ingerlatseqatigiiffiup akunnaannerusumik ingerlanneqalernissaa siunertaralugu, atuisunut ataatsimullu isigalugu inuiqatigiinnut iluaquatasumik.

Naalakkersuisut taamaattumik Nukissiorfiit aktiatigut ingerlatseqatigiiffinngortillugit allanngortinnerini iluaquatasut ajoquatasullu misissornissaannut sulinissamut tunngavissaqartumik suleqatigiissitamik pilersitsissapput. Suleqatigiissitaq ilimagineqarpoq nassuiaammik aalajangiinissamut tunngavissiamik 2014-imik upernaakkut ataatsimiinnissamut saqqummississasoq.

Aaqqissugaanikkut allanngortitsinerup agguassinermi naalakkersuinikkut eqqarsaatigisassat Inatsisartunit akuerineqarsimasut tapersersussavai kiisalu sapinngisamik akinut appasinnerpaanut kiassarnermik, imermik innaallagiamillu isumannaatsumik sunniuteqarluartumillu pilersuineq qulakkeerlugu. Suleqatigiissitap taamaattumik kingunissat arlallit nassuiaammi erseqqissassavai, ilaatigut akissarsiat qaffasiffiinut, akinut aamma nunatta karsianut kiisalu innaallagiap, erngup kiassarnermilu akinik iluarsartusseqqinnissamut periarfissat misissoqqissaarlugit.

Aktiatigut ingerlatseqatigiiffimmut allannguinerup peqatigisaanik pilersuinermut tunngasut inuiaqatigiinni iluarsartuunnissaannik suli pisariaqartitsisoqarneranut naleqqiullugu oqimaaqatigiissinneqassalluni. Nukissiorfinni piginnittuunermi aaqqissugaanerup allanngortinneranut atatillugu eqqakkanik ikualaasarneq ilanngullugu eqqarsaatigineqassanersoq pillugu nalilersuisoqarnissaanik pisariaqartitsisoqarpoq, soorlu kingulianittumi eqqaaneqartoq. Taamaalilluni eqqakkanik ikualaasarneq aamma eqqakkanik ikualaanermiit kissap atunngisap pitsaanerusumik iluaqtiginissaa pillugu Nukissiorfiit aamma kommunit akornanni suleqatigiinnejq ilanngunneqarsinnaavoq.

Aamma piginnittuunerup aaqqissugaanerani nutaami imermik, kiassarnermik innaallagiamillu pilersuinermi akinut unammillersinnaangitsunut Inatsisartut akuliunnissamut periarfissaqassanersut nassuiardeqassaaq, kiisalu aningaasaliinissamut aalajangiinernut annertuunut akuersisarnissamut pisinnaatitsinernik aamma Nukissiorfiit A/S-ip akiitsoqalerneranik nakkutilliinissamut pisariaqartitsisoqarnersoq.

2.12.3 Eqqakkanik passussineq

Eqqakanut tunngasuni anguniagaq tassaavoq mingutsitsinerup pitsaaliornissaa akiornissaalu kiisalu eqqakkat avatangiisitigut peqqinnissakkullu illorsorneqarsinnaasumik isumagineqarnissaat. Tamanna pissaaq isumannaatsuunissamik tunngaveqartumik, peqatigisaanillu isumalluutinik maangaannartitsineq killeqartinneqarluni atoqqiisinnaanerlu siuarsarlugu. Taamaalilluni eqqakkatigut kinguneqarluartumik aaqqissuussinerup ineriertortinnissaa, sumiiffinni akornutaasunik annikitsitsisoq, kiisalu eqqakkanik annikillisaanermi atoqqiinermillu siuarsaasoq isiginiarneqassaaq.

Ukiut sisamakkutaarlugit eqqakkanik passussineq pillugu pilersaarusiortoqartarpooq, 2010-meersumilu siunnersuutip immikkoortuisa ilaat atulersinneqalerlutik. Eqqakkanik passussinermi pilersaarut arfineq pingasunik immikkoortoqarpoq, aamma 2014-imut Aningaasanut Inatsisissatut Siunnersuummi atulersitsinerit ilaannut atatillugu 4,8 mio. kr.-it immikkoortinneqarlutik. Ilaatigut nunaqarfinit illoqarfinniillu mikinerusuniit illoqarfinnut anginerusunut ikualaaveqartunut eqqakkanik ikuallanneqarsinnaasunik assartuisoqarluni misiligtutit suliniutit aallartinneqarput, kiisalu tigooraaviit pilerfiilu tunngavigalugit immikkoortiterivinnik pilersitsinermut sanaartornermi tapiissuteqartoqarluni.

Maannakkut pigineqartumik eqqakkanik passussinermut pilersaarummi siunnersuutit amerlanersaat aningaasalersorneqanngillat. Anguniakkat tallimaat, 'Ikuallaavitsigut aaqqiineq' aningaasartuuteqarfissani annersaavoq aamma siunnersuummi aningaasaliiffigineqartussani amigaatigineqartut annersaat.

Avatangiisitigut aamma inuiaqatigiit aningaasaqarnerisigut pilersaarummi angusaasoq tassaavoq pitsaanerpaamik aaqqiineq nunatsinni eqqakkanik passussineq pillugu qitiunerusumiit aaqqiinissamut sangujartuinnarnera.

Pileraarummi inassutigineqarpoq tamanna piviusunngortinneqassappat eqqakkanik passussineq pillugu kommunit akornanni aaqqissugaasumik suleqatigiinnissaq pisariaqassasoq. Tamanna piviusunngortinneqarsinnaavoq kommunit ataatsimoorlutik eqqakkanik passussisarfimmik ingerlatseqatigiiffimmik pilersitsinerisigut.

Ullutsinnut naleqquttumik ikualaavimmik aaqqiinermik pilersitsineq ukiuni 20-ni pilersarusiorfigineqartumi 580 mio. kr.-it missaannik aningaasaliinissamut pisariaqartitsissasoq missiliorneqarpoq. Aningaasani taakkunaniippoq misisueeqqaarnernut, sanaartornernut, poortuisarfinnut aamma assartuinermi atortunut aningaasat.

Ikuallaanermik aaqqiissutissanik sulinerup ingerlaqqinneranut atatillugu taamaattumik pileraarummi qulaajaasut inassuteqaataat aamma eqqakkanik assartuineq pillugu maannakkut misiligutitut ingerlasunit misilitakkat iluaqtigineqarsinnaapput.

Eqqakkanut tunngasuni aningaasaliinerit Namminersorlutik Oqartussanit kommuniniillu ilaannakuusumik aningaasalersorneqassapput, inatsisit atuuttut malillugit kommunit eqqakkanik igitsinermut pingaarnertut akisussaallutik. Namminersorlutik Oqartussat aamma kommunit akornanni aningaasalersuinerup agguarneqarnissaa pillugu piviusumik pilersaaruteqartoqanngilaq, mingutsitsisup akiliisuunissaanik tunngaviusup saniatigut.

Peqatigisaanik nalilerneqassaaq eqqakkanik passussineq kiassanermik pilersuinerup aaqqissugaaneranut atatillugu ilaatinneqassanersoq, taanna Nukissiorfiit siunissami aaqqissugaanissaannut tunngatillugu eqqarsaatinut ilaalluni. Tassunga ilanngullugu nalilerneqassaaq kiassarnermik pilersuinermi ullumikkornit annertunerusumik eqqakkat atorneqassanersut. Ikuallaaviit taamaalillutik kiassarnermik pilersuinermi iluaqtigineqarsinnaapput peqatigisaanillu suliat ataatsimut katarsornerisigut annertuumik ingerlatsinermiit iluanaaruteqartoqassalluni. Tamanna sulinerup ingerlateqqinnerani ilanngullugu eqqarsaatigineqartariaqarpoq, akitigut aaqqissugaanerup iluarsartuussinermut, Nukissiorfiit allatut aaqqissuunnissaannut ataatsimoortumik siunnersuusiortoqarluni kiisalu eqqakkanik passussineq pillugu pilersarusiorstoqarluni.

Ineqarnermut, Pinngortitamut Avatangiisinullu Naalakkersuisoqarfip Aningaasaqarnermut Nunamullu Namminermut Naalakkersuisoqarfik suleqatigalugu siunissami eqqakkanik passussinermi pilersaarutip atulersinnerani inuiaqatigiit aningaasaqarnerannut kinguneqaatissanik erseqqissaalluni sulineq aallartippaa.

2015-imut AIS-ip piareersarneranut atugassamik maannakkut pileraarummut taartaasumik eqqakkanik passussinermut tunngasuni sanaartornissamut pilersarusiorstoqassaaq. Taassuma ukiuni aggersuni aningaasaliinissanik pisariaqartinneqartunik pilersarusiorneq piareersarnerlu erseqqissassavai. Taanna kommunit suleqatigalugit piareersarneqassaaq, aningaasalersuinissarlu tassunga atatillugu qulaajarneqassalluni.

2.13 Nunanut allanut naalakkersuinikkut ingerlatsineq aamma niuerneq

Naalakkersuisut nunani tamalaani ingerlataat Nunanut allanut tunngasutigut naalakkersuinikkut ingerlatsineq pillugu nassuaammi allaaserineqarput, tassunga ilanggullugu aamma nunanut allanut niuernermik ingerlatsineq.

EU-mut naleqqiullugu, EU-p Kalaallit Nunaatalu tunngaviusumik isumaqatigiissutaat 2011-mi aamma 2012-imik piffissaq missingersuuisorfiusumut tulliuttumut isumaqatiginninniutigeqqinnejarsimapput. Ukiunut 2013-2020-mut aalisarneq pillugu isumaqatigiissut nutaaq 2012-imik naammassillugu isumaqatigiissutigineqarpoq. Kisiartaalerporlu aningaasartai, piffissamut 2014-2020-mut EU-p aningaasatigut missingersuutaa apeqqutaassalluni.

Ilinniartitaanermut tunngasuni EU-p aamma Kalaallit Nunaata akornanni Peqatigiinnermik isumaqatigiissut piffissap qiteqqunnerani nalilersorneqarpoq, tamatumalu kingunerisaanik EU-Kommissioni suleqatigiinnermut arlalinnik inassuteqaateqarluni. EU-p 2012-20??-mut aningaasatigut sinaakkutissaa naatsorsuutigineqarpoq 2013-ip naanerani aalajangiiffiqeqarsimassasoq.

2013-imik ukiakkut ukiunut 2014-2020-mut ilinniartitaanernut tunngasuni missingersuutitigut tapiissutit pillugit isumaqatigiissut nutaaq isumaqatiginninniutigineqassaaq. Maannakkut EU-miit missingersuutitigut tapiissutit ukiumut 200 mio. kr.-inik annertussuseqarput. Isumaqatigiinniarnerit kalaallit tungaanniit Naalakkersuisut ilinniartitaanermi periusissaannik aamma ukiunut 2007-13-imut maannakkut isumaqatigiissummi tunngavitsigut angusaasimasut aallaavigineqassapput. Isumaqatigiinniarnerit ajornakusoorsinnaaneri sivisusinnaanerilu ilimagineqarsinnaavoq. OLT-mi nunanut missingersuutitigut sinaakkutissat piffissamut 2014-2020-mut EU-p missingersuutitigut ataatsimoortumik naleqqussaaneranut atasumik 16 pct.-inik ikilineqarput, tamannalu isumaqatigiinniarnerup ingerlaneranut sunniuteqassalluni. Tamatuma saniatigut naatsorsuutigineqassaaq ilinniartitaanermut aningaasartuit tamarmiusut aamma akileraarutitigut akitsuutitigullu kiisalu akiligassani akilinngisani ineriertorneq aamma pisortat missingersuutini naatsorsuutinilu paassisutissanik pissarsisinnaanerat nassuiarneqassasoq EU-kommissionimit kissaatigineqassasoq. Kiisalu ilimagineqarluni aningaasanik aqutsinerup atasinnaanera, akileraarutitigut isertitassatut nutaatut periafissat, Danmarkimiit ataatsimoortumik tapiissutinik aamma EU-miit missingersuutitigut tapiissutinik isumalluuteqarnikkut siunissamut ilimagisat aamma akileraartarnikkut ilangussisannginnerit aamma akileraartarnikkut aningaasartuit isumaqatigiinniarneri EU-mit pingartinneqassasut.

Ilimananngilaq ukiunut 2014-2020-mut peqatigiilluni isumaqatigiissut nutaaq 2014-imut Aningaasanut inatsimmik Inatsisartut akuersinissaat sioqqullugu atsiorneqarsimassasoq. Taamaattumik nalunarpooq aningaasanut inatsimmi peqatigiilluni isumaqatigiissummut atatillugu EU-mit isertitassatut tunngavigineqartut eqquutissanersut.

EU-p OLT-nut aaqqissuussaqarnera pissutigalugu Kalaallit Nunaat EU-mi niuerfinnut akitsuusigaanngitsumik suli isersinnaavoq. Tamatuma saniatigut OLT-mi nunat EU-mi suliniutini tamani peqataasinnaatitaapput. Maannakkut OLT-mik aaqqissuussineq december 2013-imi atorunnaassaaq, sulilu 2014-2020-mut isumaqatigiinniarnerit ingerlallutik. Ukiumi qaangiuttumi Koreamiut Kujallermiut Kalaallit Nunaannut pisortatigoortumik tikeraarnerisa malitsigisaanik tamatuma kingorna Koreamut Kujallermut inuussutissarsiorput aallartitaat angalasimapput. Suleqatigiinnissamut periarfissat arlallit aallartinneqarput, ilaatigut inuussutissarsionermut tunngasuni suleqatigiinnissamut isumaqatigiissut. Niuernermut tunngasuni isumaqatigiisutissap piareersarnerata isumaqatiginniniutigineqarnera aallartinneqarpoq.

Ukiuni aggersuni nunanik suli allanik niuernikkut isumaqatigiissuteqarnissamut tunngavissanik pilersitsisoqarnissaa pillugu sulisoqassaaq.

Kalaallit Washington D.C.-mi 2014-imi sinniisoqarfiannik ammaasoqarnissaa pillugu aalajangiisoqarpoq. Sinniisoqarfiup ilaatigut USA-mik aamma Canadamik niuernikkut attuumassutit iluaqutaanerusut anguneqarnissaat sulissutigissavai.